


## Great Quality

### Affordable Price



## Niuspepa bilong yumi ol PNG stret!

Wan Wik, Jun 16 - 22, 2005 NAMBA 1613 K1.00 long Mosbi tasol - Ausait Mosbi K1.30



**Pablik mas lukaut - PES 3**

**Wol i ken lainim long Bogenvil - PES 4**

**NRL Nius long pes 29  
Blues kik bek**

# RAUSIM BANIS

...Somare singautim Ona long wok bung

Veronica Hatutasi i raitim

KRAI, pen na hatpela taim we ol pipel bilong Bogenvil i bungim i karim kaikai taim Otonomes Gavman bilong ol i sanap na kirapim wok bilong em long Trinde long dispela wik.

Na long dispela taim, Praitim Minista Sir Michael Somare i bin mekim bikpela singaut i go long Francis Ona long rausim banis raunim ples em i stap long en na kam daun na wok bung wantaim nupela gavman na ol pipel. Sir Michael na Minista bilong Inta Gavman Rilesens, Sir Peter Barter i bin mekim wankain singaut long olgeta manmeri long wok bung na strongim Bogenvil olsem wanepela pipel tasol. (Lukim moa stori long Pes 3)

Pilai graun bilong Hahela Praitimeri skul long Buka Ailan i bin pulap kapsait wantaim planti tausen pipel bilong Bogenvil yet na ol ovasis poroman husat i bin bung long selebretim opisel kirap bilong Bogenvil Otonomes Gavman.

Dispela em i namba wan kain gavman olsem long PNG na Saut Pasifik rijen

Man husat i bin go pas long putim kamap Mama Lo bilong Bogenvil em Tony Regan taim em i tok amamas long bikde bilong ailan na pipel i tok Bogenvil Otonomes Gavman em i kamap olsem modol gavman long wol bilong stretim wankain hevi olsem dis-

pela i kamap long hia na planti lain long wol i lukluk long em.

"Wok bilong painim gutpela sindaun na Bogenvil Otonomes gavman i kamap olsem modol long ol arapela grup long wol husat i stap long wankain hevi. PNG em ol i lukluk long em olsem gutpela modol long bihainim. Mi amamas long PNG gavman na ol Bogenvil lida na pipel long stretim ol hevi long gutpela rot na tude, yumi lukim gutpela kaikai bilong em. Bihain taim bilong Bogenvil i luk gut. Na mi amamas olsem olgeta grup we i karamapim tu ol Me'ekamui i bung wantaim long ileksen bilong makim ol lida long nupela Bogenvil Otonomes Gavman." Mista Regan i tok.


Ol skul sumatin i bin stap insait long bikpela hap bilong dispela selebresen.

Long bikmoning yet olsem 4.30 am, samting olsem 900 skul sumatin bilong Tarlena na Hutjena Sekonderi skul, Hahela na Sohano Praitimeri skul i bin stap redi long wokim mas, singim Bogenvil na PNG Nesanel Entem o singsing na fomesen bilong Bogenvil Fleg. Fleg fomesen i bin kamap gut tru na pairap bilong singsing bilong Niuage ben i bin kirapim trupela spirit bilong ol yangpela na olgeta narapela manmeri i bin stap long witnesim dispela biked bilong ol. Stat long las wik yet, ol pipel bilong Saut, Sentrel na Atols i bin bung long Arawa long wetim bikde bilong ol.

*I go moa long pes 2*



• Bikpela de bilong amamas...Ol yangpela bilong Bogenvil i sanap holim flek bilong PNG na flek bilong nupela Bogenvil Otonomes Gavman.



• Wokabaut long nupela rot...Praitim Minista Sir Michael Somare na Otonomes Bogenvil Gavman Presiden Joseph Kabui i wokabaut i go long selebresen.



• Taim bilong small...Presiden Joseph Kabui na Bogenvil Etrministreta Peter Tsiamalili i lap na amamas long bikpela de.

# Somare askim ol memba long ritim gut lo

PRAIM Minista Sir Michael Somare i askim ol memba bilong palamen long ritim gut ol toktok na ripot we i stap insait long sampela nupela lo o

ol bikpela wok we gavman i laik kamapim insait long kantri.

Ol memba i noken tromoi toktok nabaut o sutim toktok nating olsem

olgeta samting i stap long pepa long kamapim nupela lo o wanpela projek i no stret. Ol i mas ritim gut na kisim save gut pastaim bihain long ol i egensim gavman long floa bilong palamen o go aut long pablik.

Sir Michael Somare i mekim dispela toktok bihain long memba bilong Alotau Isaac Taitibe i tromoi askim long Minista bilong Forest Patrick Pruaitch sapos em i ken rausim ol senis long lo bilong fores we i no stret long laik na sindaun bilong ol papagraun, Provinsal Gavman na ol memba bilong ilektoret.

Mista Taitibe i tromoi askim olsem inap Praim Minista tu i luksave olsem dispela lo i no stret na rausim bikos olpela Sief Jas bilong Papua Niugini Sir Arnold Amet tu i tok dispela senis long lo i no stret long ol papagraun, ol memba bilong ilektoret na Provinsal Gavman.

Tasol Praim Minista ino bekim toktok bilong Mista Taitibe hariap bikos ol non gavman grup lain i bin kirap sanap antap long palamen na wokabaut i go ausait taim

Long taim bilong Grivens Dibet em taim bilong ol memba i autim wanem kain belhevi na wari bilong ol. Olsem na Praim Minista Sir Michael Somare i yusim dispela sans long hatim ol memba long noken opim maus nating inap ol i save long wanem samting i stap insait long pepa na ripot.

Sir Michael i tok i no gutpela long ol memba i kisim ol komplek pepa bilong ol grup o NGO lain i kam na tromoi nating long palamen taim ol memba yet i no save long as tru bilong ol toktok na poin i stap insait na sapos ol dispela komplek i gat trupela as long interes bilong Papua Niugini o nogat.

# Rausim banis

I kam long pes 1

Ol intenesenel poroman husat i bin helpim Bogenvil wantaim mani na ol arapela sapot long kamap orait inap long nau em i kisim Otonomes Gavman bilong em i bin salim ol lain i makim ol tu long witnesim bikpela de. Em long Australia, Nu Silan, Fiji, Vanuatu, Solomon Ailan, Saina, Japan, Frans, Ingran, Yunaitet Nesen na ol han bilong em.

Praim Minista Sir Michael Somare, deputi bilong em Sir Moi Avei husat i bin mekim bikpela, wok tu long rot bilong helpim Bogenvil i kamap orait taim em i stap olsem Bogenvil Afeas Minista, Foren Afeas Minista Sir Rabbie Namaliu, Inta Gavman Rilesens na

Bogenvil Afeas Minista Sir Perter Barter, Sosel Developmen Minista Dame Carol Kidu, Jastis Minista Mark Maipakai, Sief Jastis Polis Komisina Sam Inguba, Komanda bilong PNG Difens Fos Brigadia Jenerel Peter Ilau, Sief Jastis Sir Mari Kapi na ol arapela bikman long nesenel na Bogenvil Otonomes Gavman i bin witnesim dispela bikde.

Seremoni i bin lukim namba wan lida husat bai i go pas long Otonomes Gavman bilong Bogenvil em Presiden Joseph Kabui na 40 memba i makim ol 33 konstituensi, tripela sia bilong ol meri na tripela sia bilong ol eks paitman na spika i wokim tok promis long

ai bilong samting olsem 5,000 pipel na bikpela san. Ren i bin gat wari long moning taim ren i pondaun tasol dispela i pinis na bikpela san i tekova na mekim ol selebresen i go gut.

Long 2 kilok apinun aste, Otonomes Gavman Asembli na ol nupela memba i bin sindaun long namba wan bung bilong ol.

Bkpela toktok ol pipel i bin witnesim selebresen i bin mekim em, ol i amamas long Otonomes Gavman i kirap bikos em i opim rot long samting we ol bin pait long em na i karim pen na tu, planti blut i bin lus i karim kaikai.

Dispela em long independens we bai kamap namel long 10 na 15 krismas. Tasol pastaim, i mas gat luksave olsem ol pipel bilong Bogenvil yet i ranim gutpela otonomes Gavman.

Wanpela pes i no bin stap long dispela selebresen em John Momis husat i foma Gavana na man i bin makim Bogenvil long Nesenel Palamen long longpela taim tru. Em bin pait hat tru wantaim ol arapela Bogenvil lida long ailan i kisim dispela Otonomkes Gavman.

Ol toktok i bin kamap olsem em i go long haus sik long Australia long lukim dokta.

Tasol planti pipel long Bogenvil i no amamas bikos ol i laikim em long stap amamasim bikde na nupela gavman bilong ol we em bin wok hat long em na tu, wok bung wantaim ol lida long dispela nupela Otonomes Gavman.

# Minista tok marasin i no sot

Memba bilong Unggai Bena Benny Allan i tok hevi bilong marain i sot insait long ol haus sik long Papua Niugini em bikpela samting tru long laip na sindaun bilong ol pipel.

Mista Allan i tromoi dispela toktok i go long Minista bilong Helt Melchior Pep long palamen olsem dispela sot bilong marasin inap kilim planti laip bilong ol manmeri long kantri nau.

Olsem na em i askim sapos em i tru marasin i sot long ol haus sik na wanem samting gavman i mekim long stretim dispela hevi hariap.

Em i askim tu sapos i gat bikpela asua i stap long wok bung namel long Minista na ol wokman bilong em long Helt Dipatmen we i mekim dispela hevi i kamap. Sapos olsem orait Minista i mas

rausim ol dispela opisa bilong em husat i asua long marasin i sot long kantri.

Minista Melchior Pep i tok i nogat wanpela bikpela hevi long marasin i sot long ol haus sik long Papua Niugini. Dispela i no tru na tu sapos ol manmeri i dai long dispela hevi orait ol memba i mas kamapim ripot long amas lain i dai long marasin i sot.

Mista Pep i tok i gat marasin i stap na ol bai stretim dispela hevi bilong skelim marasin long olgeta haus i sik long kantri.

Tasol dispela toktok bilong Mista Pep i abrus olgeta taim bikpela ripot i kamap olsem 6-pela bikpela haus sik long ol Hailans provins i sot long marasin long las wik. Dispela hevi i no kisim wanpela tok klia i kam yet long Minista gen.

**A COLLEGE TO CHANGE YOUR WORLD IN 2005**

**YOUR accredited international awards**

Invest in accredited qualifications and skills to gain a successful career. Everything you need for study success is provided; Training Materials, Guide, Exams, Revision Tests, Exam, Award.

**Diplomas (£150/US\$300/AUS\$360)**

- \*Accounts, Hotels, Tourism, Computers
- \*Business, Management, English, Stores
- \*Personnel, Office, Purchasing, Advertising
- \*Marketing, Insurance, Secretary, Office

**Advanced Diplomas, BBA, BCom, MBA**

- \*Business, Marketing, Finance, Organization

For a FREE Prospectus/brochure contact:  
**CAMBRIDGE INTERNATIONAL COLLEGE**  
 P.O. Box 1378, Southampton, SO17 3WX, Britain  
 Web: www.cambridgecollege.co.uk  
 email: info@cambridgetraining.com  
 Fax: +44 2380 337200  
 Accredited British Training & Education registered with the National Training Council & Ministry of Labour of Papua New Guinea

# Wenge askim gavman long taitim lo bilong bus graun

GAVANA bilong Morobe Luther Wenge i tok ol marasin bilong fektori na ol masin i wok long bagarapim gris bilong graun na wara na ol kaikai na abus bai bagarapim laip na sindaun bilong ol pipel long bihain taim.

Mista Wenge i mekim dispela toktok long sapatim Kyoto Agrimen we PNG i stap insait tasol em i no wanbel tru long wanem as na Australia na Amerika i no sain long dispela agrimen.

Mista Wenge i tok Australia i salim ol bikpela kampani bilong em i kam long kisim gol na kopa tasol na brukim ol bus graun na amamas long mekim mani. Tasol wanem kain bagarap insait long graun na wara em ol i no wari long dispela.


Olsem na em i askim gavman long sanap strong nau na taitim ol lo bilong banisim gut graun na wara bai ol bikpela maining na loging o projek i noken posinim graun na wara long bihain taim.

Em i tok nogut bai ol kaikai i gat posin na yumi kaikai kisim bagarap long kainkain sik long bodi.

Mista Wenge i tok pilai olsem nau planti pipel bilong wol i no groa bikpela na longpela manmeri moa. Planti i groa sotpela sotpela manmeri nau. Na ating kaikai i gat kemikol na bagarapim groa bilong ol pipel tude. Olsem na em i pret nogut bai ol dwof manmeri i pulap long kantri long bihain taim na sampela dwof tu bai kamap memba long palamen.

Em i askim gavman long strongim lo nau long banisim laip bilong ol pipel na tu banisim gut graun, bus na wara bilong PNG i ken stap gut bikos dispela tasol i wok long kamapim gutpela klipela win we yumi wok long pulim tude long stap laip.

**Nupela namba tu bilong Wantok**



WORD Publishing Kampani, mama kampani bilong Wantok Niuspepa, nau i kisim nupela namba tu Jenerel Menesa.

Elizabeth Konga, meri husat i holim wok long lukautim mani bilong kampani, nau i kisim luksave bilong Bod ov Dairektas long holim wok bilong Deputi Jenerel Menesa bilong Word Publishing.

Elizabeth i bin statim wok bilong em wantaim Wod Pablising long 1988 bihain long em i lusim Divain Wod Institut. Long 1994 em i kamap Kampani Akaunten. Long 1995 em i bin holim wok bilong Fainensel Kontrola i kam inap nau.

Mis Konga em bilong Maun Hagen na em i namba tu meri tasol insait long kampani long holim wanpela bikpela wok olsem.

Siaman bilong Wod Pablising, Pater Nick De Groot i tok em i save Mis Konga bai strongim wok na bilip bilong Bod na ol Seaholda long wanem em i wanpela gutpela meri bilong hat wok na dispela luksave nau em i kisim i makim longpela taim em i stap wantaim kampani long 17 krismas i go pinis.



**TORO**

TORO BAIM 12 PEKS NA GO LONG HAUS!!!

TORO, MAN! BAI YU WAN TASOL KILIM 12 PEKS, AH?

EM NAU!

BAI MI APIM ISI ISI TASOL NA LUKIM OL MARUNG BLOWAP!

TORO EM MAROONS SAPOTA!!!

BIFO GEM I STAT, TORO EM RILEX GUT TRU NA APIM WAN WAN I STAP!!!

GO MAROONS!!!

GLUG!

WE HAVE A CROWD OF 69,000 TO WATCH QUEER & BLUES ON THE SECOND ROUND

AYOO! PAPA MIPELA LUSTING LONG BAIM ISI PEI..

HUSAT PASIM PAWA! EM DAI BILONG YU!!

# Pablik mas lukaut

Paulus Tali i raitim

BIKPELA tok lukaut i go long pablik long was long ol liklik mani skim we i wok long paulim tingting bilong planti manmeri long PNG.

Ol liklik bisnis lain na ol arapela lain tu i wok long putim mani long ol dispela skim long helpim ol.

Tupela mausman bilong komyuniti long ples Buang i stap long Mosbi i bin toktok wantaim *Wantok Niuspepa* long tok klia olsem moa long dispela kain mani skim olsem wanpela ol i kolim Papalain Asosiesen i stap nau insait long kantri.

Sam Saking i tok klia olsem wanpela man Buang yet i bin go pas long dispela Papalain Asosiesen bipo, nem bilong em Pasto Simon Steven.


Mista Saking i tok ol pipel bilong Buang i stap long Mosbi i ting dispela bai helpim ol tasol nau i no moa wok nau.

Em i tok planti manmeri bilong Buang, Kaindi, Meklai na Bulolo taun i bin putim mani long dispela mani skim tasol dispela mani i no kamapim wanpela gutpela kaikai.

Mista Saking i mekim bikpela tok lukaut long pablik na ol pipel bilong Buang long Mosbi, Lae, Bulolo na Buang yet olsem wanem liklik mani ol i laik mekim wok bisnis long em ol i noken tromoi nabaut.

Ol i singaut tu long Pasto Simon Steven long tokaut klia long pipel bilong Buang na pablik long em i mekim wanem wantaim mani em i kisim long ol pipel.

*Wantok Niuspepa* i kisim toktok long opis bilong Gavana bilong Sentral Benk husati tok ol liklik skim olsem U Vistract, Mani Ren, Mile-nium Koporesen, Papalain Asosiesen na Bonanza 99 em i no ol tru tru mani bisnis bilong helpim ol. Olsem na ol pipel bilong PNG i mas lukaut gut.



• Mausman Sam Saking i givim tok lukaut long ol Buang pipel long noken harim giaman toktok bilong ol dispela mani skim lain.



TAIM bilong ol Nu Saut Wels Blues sapota long amamas. Na nau bai ol sapota bilong tupela sait wantaim bai beten narapela kain tru na wetim namba tri pilai bai kamap long Brisbane long tupela wik i kam.


WANTOK i bin go raun lukim ol liklik ples long Kerema. Man, em i go long hap na long nait bikpela pati i kamap long ples. Maski skin i tait, maski ol i ron long longpela rot, na maski i nogat bia. Pati on, musik pairap, na ol man i kirapim das tasol.

NA yu save...pasin bilong ol pati long ples. Jenereta i pairap, musik i pairap, ol manmeri i danis. I rong tasol long i nogat inap kaset, na wanpela singsing, ating ol lain i mas danis long en inap long 7-pela taim. Olgeta stail bilong danis i pinis.

SORE i mas i go aut long ol lain manmeri i stap long nambis husat i kisim toksave olsem solwara bai solap liklik. Tingting bilong sunami i stap yet na ol manmeri i no kisim gut toksave long wanem sampela long long lain i ting sunami na ol i go na raunim olgeta manmeri. Olsem na mipela i tok. Putim iau long redio na kisim gut toksave.

BIKPELA hevi long marasin i sot nau i wok long kamap bikpela moa. Ol dokta na nes i wok long haus sik i save olsem marasin i wok long sot. Ol i wok na ol i lukim long ai bilong ol. Tasol sampela lida long bikpela haus tambaran i wok long strong olsem olgeta samting i orait. Ating moabeta ol memba bilong palamen i mas traim slip na kisim marasin long ol pablik haus sik na noken hariap kisim balus i go long Australia long painim marasin. Em nau bai ol i save wanem kain hevi mipela ol tru tru liklik manmeri i wok long karim.

NA sapos yu painim rot long kisim gutpela stia tok long sait bilong helt na yu les long harim tok-tok bilong ol memba long Palamen, putim iau long YUMI FM long olgeta Tunde moning namel long 10 na 11 kilok. Mauswara stail manki ya Kas-T i gat wanpela redio so we em i save toktok wantaim ol dokta na nes na givim stia tok long ol manmeri bilong PNG.



• Praim Minista Sir Michael Somare i wokabaut lukim polis fos bilong Bogenvil.

## Bogenvil i opim rot

Neville Choi i raitim

SANAPIM bilong Otonomes Gavman bilong Bogenvil nau i opim rot bilong ol arapela bikpela wok long kamap insait long kantri.

Wanpela bikpela samting em luksave long ol meri insait long wok politiks.

Insait long Otonomes Bogenvil Gavman, i gat tripela meri i sanap na winim sit insait long gavman.

Praim Minista Sir Michael Somare i givim luksave long dispela na i tokim ol pipel long Buka olsem PNG gavman bai lukluk strong long bihainim dispela rot taim ileksen i kamap gen.

"Bikpela samting tru we ol pipel bilong Bogenvil i soim we ol pipel bilong PNG i luksave long en em wok bilong meri insait long ples bilong yumi. Mipela bai kisim kopi long buk bilong yupela taim nesanel ileksen i kamap gen," Sir Michael i tok.

Sir Michael i bin singaut tu long wok bung i mas kamap namel long ol lida bilong Bogenvil.

"Taim mi bin kamap hia long 5-pela yia i go pinis, mi bin givim wanpela salens. Mi tok.

*"Bikpela samting tru we ol pipel bilong Bogenvil i soim we ol pipel bilong PNG i luksave long en em wok bilong meri insait long ples bilong yumi."*

Ol lida bilong Bogenvil i mas putim het wantaim bai yupela i ken kamapim dispela samting. Tude mi kam na lukim dispela samting i sanap. Mi lukim yupela i ronim na ogenaisim ol samting.

Lusim tingting long bruk nabaut! Yupela wan pipel. Yupela olgeta ol Bogenviliens.

Sindaun na stretim ol hevi bilong yupela olsem ol Bogenvil pipel na givim mipela long nesanel gavman.

Mipela bai sanap bihain long yupela long mekim dispela Otonomes gavman bai wok," em i tok.

## PNG gat bikpela hevi: Singirok

Paul Zuvani i raitim

PAPUA Niugini mas mekim samting hariap long stopim hevi bilong ol manmeri i gat ol gan o em i bai kisim bikpela bagarap, bipo PNG ami komanda na nau siaman bilong Nesanel Gan Komiti Mesa Jenerol Jerry Singirok (ritaia), MBE, i tok.

Em i tok klostu planti man long kantri i gat gan na dispela i ken givim bikpela hevi sapos ol i gat hevi namel long ol yet o sapos ol i laik bagarapim narapela man.

Em i tok hevi bilong gan i kamap long wanem planti man i wok long kisim ol gan i kam insait long kantri long rong wei.

"Mi laik tok klia olsem kantri bilong yumi i stap long taim nogut. Planti bilong ol man i gat gan long laik bilong ol," Jen. Singirok i tok. "Bikpela hevi i ken kamap sapos ol man i pait long gan.

Tasol em i tok hevi i stap pinis na bikpela samting em kantri i mas painim wei long stretim.

Long dispela em i tok namba

wan samting em gavman i mas putim gutpela was long ol boda bilong kantri.

"Long dispela em (gavman) i ken save wanem samting i kam insait na wanem samting i go aut. Dispela bai i ken stopim hariap ol samting we i kam insait long kantri long ol rong wei. Planti ol samting i kam insait em ol samting nogut," em i tok.

Namba tu samting Jen. Singirok i tok em long , "gavman i mas kisim ol gan o tokim ol man long givim bek ol gan long em. Long dispela em i ken rausim gan long han bilong ol man.

Namba tri samting em long skulim ol manmeri olsem gan i no gutpela samting na olsem ol i no ken gat gan.

Tasol bikpela samting em Jen. Singirok i tok em long gavman i mas givim gutpela sevis long ol pipel.

"Planti ol kain hevi olsem long yusim gan i kamap long wanem ol manmeri i nogat gutpela sindaun.

Ol sumatin i pinisim skul tasol nogat wok. Ol i laik wok tasol ol wok i

sot. Ol i laik mekim bisnis tasol nogat mani orait ol i mas painim sampela kain wei long sapotim ol. Planti i tanim long ol pasin nogut.

Long Hailans Jen. Singirok i tok ol man i kisim gan long yusim long pait.

"Sapos yumi tok gut long pablik olsem pait i no gutpela na bringim kain gutpela toktok na sevis i go long ol pipel, mi gat bikpela bilip ol bai harim tok. Ol bai no lukluk long gan olsem em i ansa bilong hevi ol i gat long en.

Long tokaut moa long hevi bilong gan Jen. Singirok wantaim komiti bilong em i bin lukluk raun na mekim sampela wok painimaut long wanwan ol provins.

Em wantaim komiti bilong em na Minista bilong Polis Hon. Bire Kimisopa bai tokaut ripot bilong ol long bikpela Gan Komiti kibung we bai kamap long Yunivesiti bilong Goroka, Isten Hailans long Mande Julai 4 i go inap long Fraide Julai 8.

Ol Stori long Sanapim bilong Otonomes Gavman bilong Bogenvil wantaim Veronica Hatutasi long Buka

# Wol i ken lainim long Bogenvil

WOL i gat planti samting we em i ken lainim long Bogenvil long rot bilong painim gutpela sindaun long gutpela pasin.

Alan Weeks i wok wantaim wanpela Non Gavman Ogenaisesen Grup long Melbon, Australia i tok.

Mista Weeks em i wanpela gutpela pren bilong Bogenvil husat i save i go na i kam planti taim long Bogenvil pastaim long hevi na nau taim ol wok bilong kamaopim gutpela sindaun long ailan. Em na planti arapela gutpela pren bilong Bogenvil i bin kam gen long ailan long witnesim bikpeal de we Bogenvil i bin kirapim Otonomes Gavman bilong em long aste Trinde, Jun 15.

"Wol i gat planti samting em i ken lainim long wok bilong painim gutpela sindaun long Bogenvil. Dispela wok i kamap long ol negosiesen o ol toktok i bihainim pasin bilong mekim wok long ples klia wantaim nogat hait pasin (transparensi) na ol wan wan grup i karamapim Nesenel Gavman na ol Bogenvil

lida na grup i lusim tingting long ol yet na wok bung wantaim long kamp long level yumi lukim tude we ailan na pipel i kirapim Otonomes Gavman," Mista Weeks i tok.

Mista Weeks i tok rot we em na grup bilong em i bin kam insait long Bogenvil em Bernard Narokobi, wanpela bikman long PNG i bin singautim em long givim sampela helpim taim em i stap olsem Jastis Minista na ol bin wok klong painim ol rot long stretim Bogenvil hevi.

Na stat long ol toktok long Endeava Akod long Janueri 1990, Mista Weeks i bin kam insait long ol samting i kamap long Bogenvil.

Em i tok pastaim, nogat man i bin toktok long indipendens long Bogenvil bikos em i as bilong hevi na nogat man i redi yet long kirapim ol toktok long dispela inap long 1997.

Long dispela taim, tupela grup long Bogenvil i bin bung na tok-tok na kam wantaim. Na em bin stat bilong ol bikpela negosiesen

na toktok we long yia 2001, i bin kamapim Bogenvil Pis Agrimen na isi luksave i bin kamap na ol toktok i bin op long otonomi na indipendens.

Em i tok Bogenvil I gat gutpela agrikalsa beis na em i mas divelopim ol risos long dispela eria long helpim strongim ikonomi o wok mani bilong em long sapotim Otonomes Gavman.

Em i gat bikpela bilip olsem long ol pen na hevi Bogenvil na ol pipel bilong em i bin bungim, widom o gutpela tingting na saye tu i kamap.

Na ol lida bai tingim ol pikinini nau na ol dispela i kamap bihain.

Em i tok long lukluk bilong em, Bogenvil bai mekim wol i kirap nogut long pasin bilong kamaopim gutpela sindaun na bel isi pasin.

"Visen bilong mi long Bogenvil em i olsem, bai Bogenvil i go het long mekim wol i kirap nogut long pasin bilong soim trupela bel isi pasin i ken kamap na spirituel developmen i bikpela samting, olsem tasol metiriel developmen," Mista Weeks i tok.



• Ol meri bilong Bogenvil nau i pilim olsem olgeta hat wok bilong ol nau i karim kaikai wantaim sanapim bilong Bogenvil Otonomes Gavman na makim bilong tripela meri minista insait long Haus ov Representativ.

## Ol tingting long nupela gavman

WANTOK i bin kisim tingting bilong sampela meri husat i bin kam long witnesim namba wan Otonomes Bogenvil Gavman i kirapim wok bilong em aste long Buka.

Elizabeth Koneana bilong Buin, Saut Bogenvil i wok long

Hutjena Sekonderi Skul long Buka i tok:

"Mi amamas long Bogenvil i sanapim Otonomes Gavman bilong em bikos mipela i pait hat long em. Tasol ol lida i mas putim spirit bilong Papa God pastaim na larim em i go pas long ol. I gat yet ol gan na rot blok long sampela hap bilong Bogenvil na ol lida i mas putim God pastaim na ol samting bai wok na go ut.

"Bikpela samting em ol preia bilong ol pipel long Bogenvil, PNG na ausait i bin mekim na ansa i karim kaikai wantaim gutpela sindaun i kamap ma nupela Otonomes Gavman yumi witnesim tude.

"Ol meri i gat wok long dispela nupela gavman bikos ol bin mekim bikpela wok long rot bilong kamaopim gutpela sindaun.

Mi bin lukim stret long ai bilong mi na long hap bilong mi wei ol meri i bin wok hat tru. Long Buin, ol meri i bin brukim bus long kirapim ol wok bilong painim gutpela sindaun.

Ol man i no inap tasol ol meri yet i no pret na ol i go brukim bus na go wantaim aiwara na winim lewa bilong ol yangpela man long lusim pait na ol gan na go bek long ples long sapotim wok bilong painim gutpela sindaun.

Mi amamas long tripela meri i makim mipela long Otonomes Gavman tasol olsem mi tok, noken lusim tingting long Bikman Antap long stiaim rot bikos sapos nogat, bai ol wok i no inap long ron gut.

"Ol lida tu i mas wok bung gut wantaim nau long sapotim na ranim gut dispela nupela gavman," Ms Koneana i tok.

Pauline Kebonu em i sinia tisa long Bana Provinsel hai skul long bana eria, saut Bogenvil i tok:

"Em i gutpela long yumi bihainim longpela na hatpela rot long kisim samting we yumi bin krai long em. Dispela bai i pinisim ol wari na hevi we planti long yumi i bin gat long en.

"Tasol wanpela samting em tok klia i mas go long ol pipel i stap long ol ples long mining tru bilong Otonomi na Otonomes Gavman. Planti pipel long ol bus ples i no klia yet bikos ol i ting kisim Otonomes Gavman i min olsem yumi kisim pinis indipendens. Wanpela samting em ol pipel i bin amamas na go long vot long dispela Otonomes Ilekse. Eria mi wok long em i stap long No Go Zone na ileksen i bin ron gut, ol pipel i bin fri na nogat trabel i bin kamap long husat man o grup.

"Ol pipel i bin klia long husat ol i bilip olsem ol i raitpela lida na votim ol. Na risal i soim long ples klia laik bilong ol..

"Presiden Kabui i bin wokim klinpela kempain na em i win na mipela i amamas. Mipela i les long ol trabel, mipela i laikim ol wok i kamap na mipela i laikim gutpela sindaun," Misis Kebonu i tok.

Scholastica Baria bilong Not Nasioi long Sentrel Bogenvil i tok:

"Mi amamas long lukim nupela Otonomes Gavman i kirapim wok bilong em tude long wanem olgeta krai bilong mipela i karim kaikai. Bikpela samting nau em long ol lida i mas yunait na wok bung wantaim long ranim dispela nupela gavman," Misis Baria i tok.

## Bogenvil I kamap nupela Otonomes Rijen

STAT long aste, Bogenvil I stap aninit long Otonomes Rijen. Na i no moa aninit long Provinsel Gavman sistem.

Bogenvil Etministreta i tok dispela i min olsem Bogenvil bai bosim planti samting na mekim ol disisen long ol bikpela samting long sait bilong wok mani, etministresen, pablik sevis, polis na ol arapela bikpela samting. Difens na Foren Afeas tasol bai kam aninit

long Waigani o PNG Gavman.

Tasol Mista Tsiamalili i tok ol dispela samting bai i no inap long kamap kwiktaim tasol isi isi.

Em i tok bikpela samting em mani na long dispela taim, Bogenvil i nogat mani. Olsem na ol pipel i mas wok hat long kamapim beis long kamapim ol samting long kisim mani long em na sapotim Otonomes Gavman.

Mista Tsiamalili i tok Bogenvil I soim olsem

em inap long karimaut wok gut na long taim na dispela i kamap long ples klia wantaim ileksen na sanapim otonomes Gavman we em i amamas long em.

"Wok bilong redim Bogenvil Otonomes Ilekse na Gavman i bin kisim tripela mun tasol long redim. Nesenel Gavman I bin tok oraitim Bogenvil Mamalo long pinis bilong mun Desemba na givim tok orait long ileksen i mas go het. Mi tok tenkyu long bikpela

hatwok we ol woklain bilong Bogenvil Etministresen wantaim ol Ilektoel opisa long gutpela na bikpela hatwok ol i mekim na ileksen i bin go gut. Na ol wok redi bilong holim ol selebresen bilong sanapim Otonomes Gavman i bin kamap gut na long taim stret bilong em," Mista Tsiamalili i tok.

Em i tok long mekim dispela kain wok we i nupela long ol na long PNG, em i save kisim samting olsem 7-pela



# Is Nu Briten gavman laik lukautim Keravat

**IS NU BRITEN** provinsel gavman i redi long lukautim Keravat Nesenel Hai Skul.

Dispela toktok i kam long Provinsel Gavana Leo Dion taim em i bin givim wanpela sek mani inap long K30,000 i go long skul long stretim sampela skul samting bilong ol.

Em i tok gavman i redi long lukautim skul sapos Nesenel Gavman i tingting long givim i go long han bilong provinsel gavman.

Bikpela as tingting long ofa bilong Mista Dion em long wanem planti sumatin i skul long Keravat i stap em ol sumatin bilong as ples long Is Nu Briten-yet.

Hetmeri bilong Keravat, Nasain Sau i tok sapos provinsel gavman i lukautim skul em bai no inap bagarap olsem em i bagarap nau.

Tasol em i tok pasin bilong ol bipo sumatin tasol i bin bagarapim nem bilong skul.

Nau em i tok pasin bilong ol sumatin i bin senis na ol tisa na olgeta arapela manmeri i wok long wok bung long kamapim gutpela senis long skul.

Mis Zau i singaut long pablik insait long provins long helpim ol lon gstretim bek skul. Mani mak em i putim long olgeta wok senis long kamap i sanap long K100,000.

## Kokopo kisim ol taunam

MOA long 200,000 taunam bai go aut long 86 wod insait long Kokopo distrik long Is Nu Briten.

Ol dispela taunam i kam long Rotary Egens Malaria husat i bin givim tupela bikpela kontena long ol taunam bilong Kokopo.

Kokopo Distrik Etnimistreta Edward Lamur i tok rotary Egens Malaria i bin makim Kokopo long traim dispela projek we i go aut long ol arapela provins pinis.

Sapos em i wok gut na daunim namba bilong ol manmeri i kisim sik malaria, em bai go aut long olgeta arapela distrik insait long provins.

Mista Lamur i tok etministresen bilong em wok long halvim long painimaut sapos ol dispela taunam bai i wok gut.

Em i tok nau yet ol dispela taunam i go aut nating na ol manmeri i no givim mani long kisim. Tasol bihain long 5-pela yia, ol manmeri bai mas baim ol dispela kain taunam.

## TI singaut long sekim Wes Nu Briten mani

TRANSPARENSI Intanesenel (PNG) i singaut long Ombudsman Komisn long sekim K158,000 we Wes Nu Briten provinsel gavman i bin makim bilong wanpela raun bilong 4-pela gavman opisa.

Ripot i kamap olsem dispela mani i bin go long sanapim wanpela maikro fainens projek bilong provins, tasol dispeal 4-pela gavman opisa i bin go raun wantaim.

Planti sut toktok i kamap olsem dispela projek i no bin kam aninit long gavman tasol dispela mani i bin go long raun bilong ol opisa taim ol i no kisim tok orait i kam long eking provinsel etministreta William Edo o Gavana Clement Nakmai.

Mista Nakmai yet i tok dispela i no wanpela samting long anem Provinsel Eksekutiv Kaunsel (PEC) i bin givim tok orait long dispela raun na K50,000 bilong en.

Tasol Mista Nakmai i tok em i no klia long ol arapela mani na ol i mas glasm.

## Helpim go long ol lain turangu

NAMBA wan hap bilong ol kaikai samting nau i go pinis long ol pipel bilong Kep Glosta insait long Wes Nu Briten provins.

Sindaun bilong ol pipel long hap i no bin gutpela tumas bihain long Maunten Langila i bin pairap na bagarapim ples bilong ol.


Sip MV Langila 2 i bin lusim Kimbe las wik long go long Kep Glosta.

Ripot i kam long Wes Nu Briten Disasta Opis i tok samting olsem 3,500 manmeri i bin kisim bagarap.

Dairekta bilong disasta opis long hap Meja Paul Kaliop husat i bin go raun lukim ol ples i kisim bagarap las wik i tok ol manmeri i bin lusim ples bilong ol na go sindaun long arapela hap.

PNG Red Cross Society i wok long go pas long bungim ol kaikai na arapela samting bilong salim i go long ol lain turangu i kisim bagarap.

Ol i kisim ol manmeri bilong ol setelmen long Koki na Kesi long helpim long pekim ol kandis na wara plastik long balus long go long Hoskins na bihain i go long Kep Glosta.



## Skul i swit...

SKUL em i bikpela samting long ol yangpela. Nau ol dispela yangpela bilong Kalamanaganan Prameri skul long Is Nu Briten i wok long sekim sampela skul wok bilong ol. Skul nau i wok long kamap strong insait long provins. *Poto: CIMC*



**VITIS INDUSTRIES LIMITED**  
Extracts & Liquors Factory

PO Box 397, Port Moresby,  
N.C.D., Papua New Guinea  
Ph: 325-0616  
Lot 4-8, Sect. 34, Klinki  
Street, Hohola, N.C.D.

## PROMOTION PRIZES

June - December 2005

**Cash prizes from K2-00 to K100,000-00**

**Free Vitis drinks 375ml, 750ml and 1125ml**

**We give away 50,000 prizes**

K2	10,000
K5	5,000
K10	3,000
K50	2,000
K100	1,000
K500	250
K1,000	100
K5,000	10
K10,000	4
K50,000	2
K100,000	1

**Free Vitis Drinks 30,000**

**WIN BIG  
with  
VITIS**

**UP TO K100,000**

Buy any Vitis drink and find the prize notice on the internal side of the cap.

Bring the cap with the prize notice to Vitis Factory at Waigani Drive and receive your cash prize or free drink.

**CALL US FOR DETAILS ON 325-0616**

**YOU CAN BUY VITIS DRINKS IN THE FOLLOWING OUTLETS:**

Andersons Foodland Koki  
RH Hypermarket  
TST Gerehu  
TST 4 Mile  
Okari Shop Boroko  
Hohola Supermarket  
SVS 2 Mile

Andersons Foodland Harbour City  
Boroko Foodworld  
Waigani Supermarket  
TST Malaoro  
Econ Trading Shop  
TST Alotau  
City Cellers

# Mobail telepon go long Aitape

OL PIPEL bilong Aitape bai inap lukluk long kisim ol mobail telepon kol bihain long Memba bilong Aitape-Lumi na Minista bilong Diwai (Fores) Patrick Pruaitch i givim K150, 000 long Pasifik Mobail Komyunikesen kampani long sanapim ol samting we bai ol toktok i ken i go i kam long en.

Memba i givim dispela mani bihain long Pasifik Mobail i makim Aitape olsem em bai kamap olsem Pailot Distrik we em i laik kamapim Komyuniti Rihabiltesen Sevis long lukim kain sevis i go long ol manmeri long olgeta ples.

Long taim Memba i givim mani long Pasifik Mobail em i tok komyunikesen i wanpela bikpela samting ol pipel i laikim long en na em i amamas olsem Pasifik Mobail i makim distrik bilong em olsem pailot distrik long traim dispela sevis bilong em.

Kos bilong sanapim ol samting bilong kamapim dispela sevis bai go moa long K150, 000 em Memba i givim na dispela em i tok kampani yet bai



• Pasifik Mobail Komyunikesen Menesing Dairekta Noel Mobiha (lep han) i kisim K150,00 dami sek long Memba bilong Aitape-Lumi na Minista bilong Diwai (Forestri) Patrick Pruaitch long sanapim ol samting bilong kisim toktok long mobail telepon.

pinisim dispela kos. Long sanapim dispela ol samting menesing dairekta bilong Pasifik Mobail Noel Mobiha i tok ol bai sanapim long liklik taim tasol.

# Nupela kar bilong Lae polis tas fos

TAS FOS polis yunit long Lae bai inap long mekim wok bilong ol gut bihain long halivim i kam long Minista bilong Fainens na Treseri na Memba bilong Lae, Bart Philemon.

Long wanpela liklik bung we bin kamap ausait long Lae distrik opis long dispela wik, Mista Philemon husat em i memba na Siaman bilong Join Distrik Plening na Baset Praioriti Komiti (JDP na BPC) blong Lae distrik i bin givim ki bilong tupela nupela kar i go long bosman bilong Lae polis Simon Kauba.

Ol lain husat bin kamap long lukim dispela bung em Etministreta blong Morobe Manasupe Zurenuoc, Deputi Etministreta bilong Distrik Sevis Patillas Gamato na ol arapela memba blong JDP na BPC yet wantaim ol memba blong Lae tasfos.

Mista Philemon tok nesanel gavman luksave olsem lo na oda em wanpela bikpela sik insait long kantri na em i amamas olsem em inap long givim liklik helpim long ol polis insait long ilektoret bilong em long mekim wok blong ol gut.

Em tok olsem ol JDP & BPC bin oraitim mani long baim ol dispela kar bihain long miting blong ol.

Long wankain taim em tok olsem wok blong daunim lo na oda em wok blong olgeta man na i no blong ol lidaman blong kantri na plis tasol.

"Ol lain husat save mekim trabel insait long kominiti em ol pikinini we yumi yet kamapim. Ol i no pundaun long mun o sampela arapela ples nambaut olsem na wok blong stretim ol em stap wantaim yumi ol papamama blong ol,

"Yumi noken lukluk long ol lidaman na plis tasol long traim long daunim dispela



• Minista bilong Fainens na Treseri na Memba bilong Lae Bart Philemon i givim ki blong kar long Bosman blong plis long Lae siti Simon Kauba na ol memba blong polis tas fos.

hevi," em tok. Em tok olsem Lae gat ol nupela kar bai wok blong ol tasfos blong siti bai go gut. Mista Kauba husat bin kisim ol ki blong ol tupela nupela kar bin autim bikpela tok tenkyu go long Mista Philemon wantaim komiti blong em. Em tok wantaim ol dispela nupela kar. Em tok tu olsem igat ol rot istap we bai ol ken bihainim long lukautim ol dispela nupela kar.

# Ol Lae PMV i no save pinisim ron

Sape Metta i raitim

PASIN bilong bikhet na rausim ol manmeri nating nating long ol bas i mekim na planti toktok na bel kros i wok long kamap long Lae siti nau we ol Pablik Moto Vihikel (PMV) opereta i no save ron na pinisim gut ron bilong ol long olgeta hap kona.

Turangu ol pablik i wok long komplon olsem ol PMV bas sevis we i save ron insait long siti i wok long yusim ol sot kat rot na i dabol sasim ol manmeri.

Na ol i wok long kisim planti hevi tru long dispela pasin.

Ol PMV draiva i kisim laisens na namba long mekim gut ol ron bilong ol, tasol ol i no save bihainim stret wanem hap bai ol i wok na ron bihainim.

Ol wok manmeri, ol skul pikinini na ol arapela lain manmeri husat i save yusim ol PMV bas sevis long ron i go kam long wok, skul na mekim ol arapela bisnis i wok long bungim hevi yet taim ol i wok long tromoi planti mani long bas pe dispela i no stret.

Long mun i go pinis, Wantok Niuspepa i mekim lukluk raun long Lae siti na luksave olsem dispela hevi bilong PMV bas sevis i wok long go yet.

Na Wantok i kisim planti ripot i kam long pablik olsem ol i save tromoi moa mani long go kam long sotpela rot tasol.

Afinge Zimanga na meri bilong em Are i save slip arere long Ami Bareks long Igam.

Na tupela i save wok long Malahang. Long kirap na i go long wok ples, tupela i save senisim bas 5-pela taim. Na long wankain pasin long tupela i laik go bek long haus bilong tupela long Igam.

Em i tok bas i mas senis tupela taim, tasol nogat na dispela em i no stret.

Mista na Misis Zimanga i wok long tromoi K10 long wan wan de inap 5-pela krismas nau na i nogat wanpela senis i kamap.

Olsem na tupela i laik tok strong long provin-sel lens trenspot bod na ol arapela lain husat i gat atoriti long kamap wantaim sampela tupela tingting long stretim dispela hevi.

# Hap hap nius

Sip bilong Frans go long Aitape

WANPELA sip bilong kantri Frans we i save karimaut wok risets i bin kamap long Sissano Lagun insait long Aitape distrik long kisim wanpela 7 mita hap graun aninit long solwara.

Dispela sip, nem bilong em Marion Dufresne i kam mekim wok long hap bihainim askim bilong Profesa Hugh Davies bilong Yunivesiti bilong Papua Niugini na bai i go givim ol samting ol i kisim long yunivesiti taim em i kam sua long Mosbi long namba 24 de bilong dispela mun.

Dispela hap graun ol bai karim kam bai i ken soim ol taim we i bin i gat ol bikpela sunami o tait wara long solwara we i kamap long nambis long Aitape long bipo taim.

Sip i bin drip samting olsem 8 kilomita ausait long sua na bai i mekim liklik wok painim long hap pastaim long em i go raun long ol arapela hap insait long solwara bilong PNG.

Bikpela wok bilong sip bai stat bihain long em i kam long Mosbi.

# Kisim skul long helpim ol mama

Leroy Batia i raitim

MAK olsem 35 pipel insait long Yabim distrik long Morobe provins inap long mekim wok olsem helt volantia na halivim ol mama husat i laik karim pikinini.

Dispela em bihain long ol kisim skul long mekim dispela ol wok long wanpela woksop we ol Geajamsao blong Yabim distrik i kamapim.

Kodineta bilong ol Geajamsao Siling Ngawi long pinis bilong dispela kos bin tok olsem long

bipo ol meri long ples yet save helpim ol meri husat i gat bel long karim pikinini bilong ol.

Tasol Mis Ngawi tok olsem ol dispela meri bin sot liklik tu long sampela save long helpim ol dispela ol mama na pikinini blong ol olsem na sampela bin dai pinis.

"Sampela meri i no klia olsem wok blong helpim ol mama gat bel emi hatpela wok na ol mas lukautim gut ol dispela ol meri husat stap long dispela hevi.

"I save gat taim we ol meri long ples save

helpim ol meri na bihain long ol karim pikinini blong ol, ol save dai o pikinini blong ol save dai o tupela wantaim save dai," em i tok.

Em tok as tingting bilong dispela kos em long givim skul long ol long mekim dispela bikpela wok gut.

Long pinis blong dispela kos Bipo Siaman blong Rotary Club bilong Lae na Siaman bilong Angau Hausik long Lae Ross Humphries bin kamap long lukim ol dispela 35 meri i kisim setifiket bilong ol.



• Rotary man na Siaman bilong Angau haus sik Ross Humphries (sanap baksait) wantaim ol helt volantia long pinis bilong kos bilong ol long Lae siti.

Ol birua wanbel long wok bung

James Kila i raitim

WANPELA bikpela kopi projek insait long Daulo distrik long Isten hailans provins i soim tru olsem pasin bilong birua namel long ol yet i ken pinis sapos ol i holim graun na kamapim wok developmen.

Tupela lain birua husat em tumbuna bilong ol i save pait bipo i senisim tingting na tanim bel na wok.

Dispela eria we developmen i kamap long Uwoku long maunten bilong Kwonggi em bipo ol lain tumbuna bilong ol lain long Yves na Amosos i save bung na pait wantaim ol birua bilong ol em ol lain Namta, Miruma, Asaroiufa na lain Afoya.

Insait long dispela ples ol tumbuna i save pait bipo yu ken painim ol ston em ol paitman i save yusim long katapel na tromoi na paitim ol birua. Planti lain i bin dai na sampela ol pipel i save bilip olsem tewel bilong ol i raun yet long dispela hap i stap bikos blut i kapsait long hap pinis.

# Saina rais saveman lusim Isten Hailans isi tasol

James Kila i raitim

PLANTI ol rais fama insait long Isten Hailans i tromoi bikpela askim nau long wanem as tru na tupela lain saveman bilong Saina husat i wok hat insait long developmen bilong JUNCAO teknoloji long Isten Hailans i lusim kantri isi tasol na nogat toksave.

Tupela lain saveman bilong Saina husat i wok long drai len rais projek long Isten Hailans i lusim kantri isi tasol na dispela i mekim guria tru bel bilong ol fama husat i kisim gutpela save long ol dispela lain.

Wanpela fama long Kama viles klostu long Goroka na narapela bilong ples Nagamiufa i tok strong olsem ol i no amamas long kain pasin we i lukim dispela tupela lain bilong Saina i lusim kantri isi tasol. Ating i mas gat wanpela kain hevi i stap em Isten Hailans Provinsel Gavman i mas stretim na ol lain fama i ken amamas.

Tupela mausman bilong ol Isten Hailans fama i no laik long kolim nem bilong ol tasol ol i tokaut olsem dispela kain pasin we i kamap we i lukim ol lain saveman bilong Saina i kam mekim gutpela wok tru long Isten Hailans provins, tasol bihain ol i lusim kantri na isi tasol kisim balus na i go

em i gat sampela as na askim i mas kamap.

Dispela drai len rais em ol lain bilong Saina i kisim i kam long Isten hailans em nem bilong em "Golden Maunten Nambawan" na asples tru bilong dispela rais em long Fujian provins long Saina.

Ol saveman bilong Saina olsem Profesa Lin Zhanxi i bin karim dispela ripot i go long Saina na toktok long wanpela kibung long Fujian Agrikalsa na Forestri Yunivesiti JUNCAO Risets Institut na planti lain i guria stret.

Long ripot ol lain saveman bilong JUNCAO husat i go pas long bringim dispeal rais long Isten Hailans i tokaut olsem ol i bin planim rais ya namba wan taim tru long Mas 9, 2000 na namba wan taim ol i kisim kaikai bilong en em long mun Julai 25, 2000. Insait long dispela taim ol i bin kisim 6.75 tan long wanpela hekta. Long namba tu taim ol i kisim kaikai bilong rais long dispela wanpela mama as em long Jenuari 9, 2002 em ol i kisim 6.3 tan long wanpela hekta olgeta. Namba 3 taim ol i kisim kaikai bilong rais long dispela wanpela mama as em long Epril 20, 2001. Long dispela taim ol i kisim 6.3 tan long wanpela hekta.

Ripot i soim long namba 13 taim



Tupela saveman bilong Saina i bin mekim bikpela wok tru long halivim ol lokol rais fama.

dispela rais i karim kaikai mak bilong en 4.16 tan insait long wanpela hekta. Maski olsem ol tan i go daunbilo bikos rais ya i wok long go lapu, tasol em i brukim rekot long karim 13-pela taim olgeta.

Ol lain saveman bilong Saina husat i karim dispela rais 'Golden Maunten Namba 1' i go long Isten Hailans i tokaut olsem gutpela graun na san na ren long provins i mekim na dispela

rais i brukim tru rekot na winim ol arapela wankain rais ol i groim long ol kantri long Esia na Afrika.

Nau yet planti ol liklik manmeri long ol hauslain long Isten Hailans i groim dispela rais na masinim na kaikai wantaim ol famili bilong ol long ples. Sampela lain long Isten Hailans i pekim rais na salim pinis long stua na dispela i givim resis long ol narapela rais ol i save salim long stua.

## Polis reidim Kakaruk maket

Sape Metta i raitim

WANPELA seksen long biknem Kakaruk maket na 'Wol Tred Senta' long Goroka i bin stopim wok bilong em long wik i go pinis bihain long polis mobail na tas fos i bin reidim dispela hap.

Ol manmeri husat i save indai na kirap long yusim maket ya na husat i save salim ol kain kain hait bisnis olsem salim ol strongpela dring long pablik ples nau bai kisim taim na bikpela mekim save sapos ol i go het yet na karimaut dispela ol hait wok.

Long wik i go pinis bihainim ripot na strongpela toksave i kam long Inta Gavman na Provinsel Afes Minista Sir Peter Barter, polis long Goroka i bin reidim dispela ples long Kakaruk maket na stopim olgeta hait pasin.

Mobail na tas fos Komanda Andrew Wawia husat i bin go pas long karimaut dispela reid i mekim klia long pablik olsem dispela wok long stopim ol hait bisnis long Kakaruk maket i kam long palamen long stopim dispela kain

pasin we i gat bikpela tambu long en.

Komanda Wawia i givim strongpela tok tok i go long ol lain husat i save karimaut dispela ol bisnis we lo i tambu long en olsem lo em i stap, na husat i no laik harim na bihainim pasin lo na oda, orait lo i ken holim pasim na mekimsave long ol.

Em i tok dispela pasin bilong dring long pablik ples long Kakaruk maket i mas stop na pinis olgeta.

Ol arapela pasin tu we lo i no oraitim long en i mas pinis long hap.

Komanda Wawia i tok ol mobail skwat na tas fos polisman bai wok i go kam na was gut long dispela maket.

Husat i laik winim lo na i laik bikhet long salim, baim na dring strongpela dring, ol polisman bai i ken mekimsave long ol.

Em i tok Kakaruk maket em i pablik ples, na ol gutpela wok tasol i mas kamap long hap, long wanem turangu ol mama, ol pikinini na ol lapun manmeri tu i mas pilim fri long raun i go kam long dispela maket.

## Nupela Sihereni sios em baksait bun bilong kopi projek

James Kila i raitim

BIKPELA amamas na selebresen i bin kamap long Sihereni kopi projek long hap bilong Kongi-Miuma eria long apa Asaro long Daulo distrik long Isten hailans provins i no long taim i go pinis long makim opim bilong wanpela nupela sios.

Dispela selebresen i lukim planti Kristen manmeri i kamap long lukim wanpela nupela Sihereni Baibel Baptis sios i op. Planti kaikai na mumu na ol gutpela toktok i bin kamap long makim dispela bikpela de bilong lotu.

Wanpela pasto bilong Grace baptis Sios long Godens long Mosbi, Pasto Garona Vere i bin katim ribbon long opim nupela sios na mekim planti gutpela skul toktok long strongim bilip

bilong ol Kristen manmeri.

Nupela sios em i stail tru na i wankain tru olsem ol sios long ol taun na siti. Tasol em i stap long bus ples. Ol kapenta i wokim gut tru na sapos yu stap longwe bai yu lukim em i sain na nais moa yet.

Man i go pas long Sihereni Kopi Projek em David Oromarie, husat em wanpela strongpela Kristen na man i sanap strong tru long tok bilong Papa God.

"Pastaim long yumi kirapim wanpela bisnis o projek insait long komyuniti bilong yumi, yumi mas putim Papa God i go pas," Oromarie i tok.

Sihereni kopi projek i sanap long gutpela sait bilong kamapim gutpela kwaliti kopi we i save go aut long ol ovasis maket.

The All-New

# HIACE

- Bigger 3.0 litre Diesel engine
- Standard LWB 15 seater & Hi-Roof LWB 16 seater.
- AM/FM Radio cassette
- Airconditioning (Optional)
- Power steering
- Stability and comfort
- Most popular vehicle in it's class

Instrument Panel Mounted Gearshift

Open the front Panel

Mechanical Lock Type slide door

SRS Air Bags (Optional)

TOYOTA

TOYOTA TSUSHO (PNG) LTD.  
www.elamotors.com.pg

Now Available Nationwide

For More Information Contact: Port Moresby Ph 3229400 Fax 3217268 or Lae Ph 4781800 Fax 4722463

# Rigo meri laikim helpim

... pikinini laikim K50,000 long kisim operesen long Australia

KISIM helpim long marasin long dispela taim i no save isi.

Dispela i wankain long meri Rigo, Sentrol provins Maureen Miriam husat i gat hevi we em i no inap long yusim wampela sait bilong bodi bilong em.

Tasol long dispela taim em i gat kain hevi 3-ya pikinini bilong em Gwendolene i no inap long wokabaut na toktok tu.

Nau bihain long em i bin stap long haus sik long planti ya Miriam nau i save silip long narapela sait bilong rot

long hap sait bilong rot wantaim pikinini meri bilong em.

Ol dokta i tokim em olsem pikinini bilong em i gat hevi long het bilong em na ol bai mas operetim em long stretim sampela samting i rong long het we i mekim pikinini i no inap long toktok.

Dispela operesen em ol dokta i no inap mekim long hia.

Tasol Miriam i tok long taim em i gat bel presa bilong blut long bodi bilong em stap antap.

Dispela long wanem em i bin gat planti wari na olsem em i go long haus sik na ol dokta i save givim em planti marasin.

Em i bin kisim ol marasin na dispela i givim hevi long pikinini bilong em.

Na long helpim pikinini bilong em Miriam i singaut nau long pablik long helpim pikinini bilong em bai em i ken go long Australia long kisim operesen.

Kos bilong go long Australia na kisim operesen i sanap olsem long K50,000.

# Skul nogat klasrum na haus tisa

OL papamama bilong ol pikinini husat i skul long St Mary's Inawi Praimeri Skul long Sentrol provins oltaim i save wok hat long painim mani na baim ol nius pepa bilong ol manki long mekim skul wok bilong ol.

Dispela pasin em 16-ya Lucy Oaisa husat i mekim Gret 8 i tokaut long em long taim Sentrol provins gavana Alphonse Moroi i mekim wokabaut bilong em i go long skul long las wik Sarere.

Oaisa i tok skul i nogat libreri long ol manki i yusim long mekim wok bilong ol na olsem ol tisa i save yusim ol niuspepa long givim asainmen long ol. Em long dispela taim ol papamama oltaim i go aut long baim niuspepa

bilong ol manki bilong ol. Long taim Oaisa i tokaut long dispela em i givim tupela askim i go long Gavana Moroi. Dispela em long Sentrol provinsol gavman mekim tupela dabol klasrum bilong skul na wampela tisa haus.

"Mipela i mekim dispela askim long Gavana long wanem mipela i nogat klasrum na olsem ol manki i save stap ausait tasol long lainim ol samting. Na nau namba bilong ol Gret 3 sumatin long i go antap long 22 long wampela klas," Ms Oaisa i tok.

Na haus bilong tisa i bikpela samting long wanem dispela i ken helpim tisa long narapela hap long stap na skul ol manki, em i tok.

# Is Papua Bisop holim bung

LONG Uniated Sios long ol bisop i bung dispela em i bikpela samting. Long dispela as Saroa ples long Sentrol provins i stat long redim ples na ol samting we ol bisop bai bung long Ogas bihain long dispela ya.

Bung bilong Is Papua bisop we bai kisim wampela wik stat long Ogas 26 bai lukim ol minista long 10-pela ol ples i bung na paitim toktok long ol samting bilong sios.

Kos bilong holim dispela bung em ol ples lain bai bungim. Dispela em long redim ples bilong stap na silip, kaikai, dring na wanem samting em ol bisop bai yusim long holim bung bilong ol.

Komiti husat bai go pas long lukim ol samting em ol save man bilong ples Saroa we siaman Marabu Joseph i go pas long em.

Namba wan samting em komiti i mekim long painim mani long bungim ol kos long em i holim wampela wokaton long Mas we 100 manmeri wokabaut long kamapim K7000. Bihainim dispela fanresing ol i salim 100 klab tiket we ol i droim tiket long Botanical Gaden.

Tasol Mista Joseph i tok komiti bilong em i lukluk long kamapim K400,000 long holim dispela kibung. Dispela em long mekim wei bai lukim het kwata bilong Is Papua i senis na stap long Saroa ples. Dispela em long kamapim gutpela wok.


ing em ol save man bilong ples Saroa we siaman Marabu Joseph i go pas long em.

Namba wan samting em komiti i mekim long painim mani long bungim ol kos long em i holim wampela wokaton long Mas we 100 manmeri wokabaut long kamapim K7000.

Bihainim dispela fanresing ol i salim 100 klab tiket we ol i droim tiket long Botanical Gaden.

Tasol Mista Joseph i tok komiti bilong em i lukluk long kamapim K400,000 long holim dispela kibung. Dispela em long mekim wei bai lukim het kwata bilong Is Papua i senis na stap long Saroa ples. Dispela em long kamapim gutpela wok.

Dispela em bihain long wara Angabanga i bagarapim sampela hap bilong rot. Tasol dispela i no stopim ol manmeri long mekim kain hatwok na bihain baim K30 PMV sas na



## PNG GAN KIBUNG (SAMIT)

Mande Julai 4 - FRAIDE Julai 8, 2005  
YUNIVESITI OV GOROKA

Intenel Sekyuriti Minista Hon. Bire Kimisopa bai holim PNG Gan Kibung long Yunivesiti bilong Goroka, Isten Hailans provins long Mande Julai 4 i go inap long Fraide Julai 8.

Praim Minista Rait Hon. Sir Michael Somare bai opim kibung.

Long dispela kibung Gans Kontrol Komiti bai tokaut long ol wok painimaut bilong Rot So.

Long dispela Kibung aninit long Hon. Bire Kimisopa Komiti bai redim ol polisi na ol toktok we em bai givim long Nesenel Eksekyutiv Kaunsel long kamapim sampela wok long em.

Husat i gat laik na i laik kamap long dispela Kibung i mas toksave long dispela ol lain:

### GANS KOMITI

#### Siaman

Mesa Jenerol Jerry Singirok, MBE (Rtrd)  
Email: jsingirok@hotmail.com  
Mobile: 686 5343

#### Deputi Siaman

Sir Barry Holloway  
bholloway@online.com.pg  
Mobile: 682 8934

### GAN SEKETERIAT

Mr Mathew Nelson  
Eksekyutiv Opisa  
Ph/Feks: 311 2141  
Email: pnggunscon@global.net.pg

### NRI SEKETERIAT

Mrs Loa George  
Ph: 326 0300  
Email: nri@global.net.pg

### Jenerol Korespondens

PNG GANS KONTROL KOMITI  
P.O. Box 1270  
Boroko  
NCD  
Papua Niugini  
Ph/Feks: 311 2141  
Email: pnggunscon@global.com.pg

### Atoriti i kam long

Mesa Jenerol Jerry Singirok, MBE (Rtd)  
Siaman



Australian Government  
AusAID

# Ol rot nogut i no stopim wok maket

MEKEO husat i save kamapim buai maket long siti nau i pilim wankain pen olsem ol manmeri long Galp provins.

Rot i bagarap na olsem ol i mas karim samting bilong ol long sampela hap bilong rot bipo long ol i kalap long ka na ron long rot gen.

Dispela em bihain long wara Angabanga i bagarapim sampela hap bilong rot. Tasol dispela i no stopim ol manmeri long mekim kain hatwok na bihain baim K30 PMV sas na go long siti long mekim maket.

Na yes mani em i bikpela samting. Sapos graun i gutpela na kaikai na buai samting i gro na karim i nogat wampela samting i ken stopim dispela ol lain manmeri long go i kam na mekim maket long samting bilong ol.



# Ol Maining meri i bung

Veronica Hatutasi i raitim

MADANG bai lukautim bung bilong ol meri i wok long insait long Maining bisnis long neks wik.

Bung bai kamap long Madang Risot. Rejistresen long konferens bai stat long belo taim Sande Jun 19 na ol bai skruim kibung i go inap long Trinde Jun 22.

Het tok bilong bung long dispela yia em long "Mainstreaming the Vision: Successful initiatives in development and equal opportunity". Long Tok Pisin, em i tok, "Glasim Driman: Ol samting i karim kaikai long developmen na wankain sans".

Ol wok redi long dispela konferens i bin kamap na askim i bin go aut long ol lain husat bai i kamap long dispela konferens.

Ol meri i wok long ol maining kampani olsem Ok Tedi, Porgera, Tolokuma, Lihir, Hiden Veli Kainantu na Misima bai i kam long konferens na prisanim ol ripot bilong ol.

Bai i gat ol meri i kam long ol maining kampani long ol ovasis kantri olsem Indonesia, Australia, Fiji, Romenia, Polen na ol arapela kantri moa i kamap long konferens na givim ol ripot bilong ol.

Bikpela samting em ol lain i givim ripot, bai glasim sans long ol meri i wok long ol maining projek na rot we projek i helpim developmen bilong ol meri.

Na tu, rot we maining bisnis i sapotim, senisim laip o

kamapim gut laip bilong ol meri i stap klostu long main eria.

Bung bai glasim rot we ol program long main we i kamapim ol bagarap o samting i no gutpela long ol meri na ol dispela we i helpim na sapotim ol meri na tu, lukluk long wanem samting ol i ken mekim long go insait long ol sosel na ol arapela senis i wok long kamap hariap insait long ol komyniti tude.

Konferens ya bai kisim i go insait na promotim ol program, projek na wok we i helpim ol meir na famili bilong ol.

Ol i askim ol lain i makim ol sinia kampani opisa, ol dispela i makim asosiesen bilong ol meri insait long ol maining komyniti, sosel developmen speselis, ol provinsel na nesanel ejensi, ol developmen asisten ejensi, ol NGO na ol komyniti grup long kam stap long konferens ya.

Antap long ol ripot presentesen, woksop, ol bik manmeri i toktok, ol bai askim ol lain long woksop long serim ol eksperiens bilong ol wantaim ol arapela long bung.


Rejistresen bai kamap namel long 12 na 5.30 apinun long Sande Jun 19 na long 2.00 apinun nau, bung bai stat tru tru.

Maining Minista Sam Akoitai bai opim konferens. Ol arapela bikman bai givim toktok em long mani makim Wol Beng, Sosel na Komyniti Developmen Minista Dame Carol Kidu na Maining Seketeri Kuma Aua.


## Raun lukim ol meri na pikinini



• Ol YWCA meri long olgeta hap bilong wol i bung long wanpela trening kos bilong ol long bikpela siti Rotorua insait long Nu Silan. Sampela bikmeri i makim PNG long dispela bung. *Poto: Lorraine Siraba- YWCA Pot Mosbi. Stori bilong YWCA bung long neks wik*



• Ol Esia, Pasifik na wol YWCA meri insait long trening kos long Rotorua Rijnel Trening Institut. 8-pela yangpela meri PNG i stap long bung tu. *Poto: Lorraine Siraba- YWCA.*



• Planti meri nau i wok long skruim save bilong ol. Tupela meri i sindaun insait long Fainens kos bilong ol wok manmeri bilong ol Katolik Daiosis long kantri i kamap long Mosbi. *Poto: Veronica Hatutasi.*

• Tupela pikinini ya i bilas gut tru long go insait long lotu taim sampela arapela poro bilong ol i strongim kona long pilai i stap. *Poto: Veronica Hatutasi.*

# Painim haus long taun i hat tumas

PLANTI yangpela meri i painim hap bilong stap insait long Pot Mosbi siti.

Dispela em ol wokmeri, ol singel mama, ol yangpela meri na ol sumatin.

Tru long siti na taun i gat ol haus, hostel na ol rum we sampela lain i save putim long rent na ol meri i ken beim long stap long ol.

Planti ol ples we ol i putim long rent i save kostim bikpela mani tumas na em i save mekim hat long planti meri i painim inap mani long peim long potnait tasol sampela i save sea wantaim ol poromeri bilong ol na em i save orait liklik.

Sampela hostel bilong ol sios i save ofaim gutpela ples bilong ol meri long stap long em. Ol

meri i save kisim gutpela lukaut, pilim seif, lainim na strongim gutpela Kristen pasin na pasin bilong wokim gutpela poroman namel long ol, sea na pre wantaim, strongim spirit bilong komyniti, lainim olsem Papa antap i luksave long ol na ol i pikinini bilong em.

Sapos yu wok na yu wanpela singel mama long Pot Mosbi siti o yu wanpela singel meri o sumatin na yu painim ples bilong stap long em, Kongrikesen bilong ol Sen Anne Sister long Gerehu Stes 6 i gat ol rum long hostel bilong kisim ol meri i wok long en. Na em i no kostim bikpela mani.

Sister Ciara Joseph i tok hostel i

stap long wankain ples we ol Sister i stap long en long Gerehu Stes 6.

Em i stap long narapela sait bilong PNG Baibel Sios long Seksen 314, Lot 27.

Bai yu peim K60 bon fi. Dispela em fi yum as baim pastaim bipo yu go insait. Orait, rent mani we yu peim long potnait em K60.

Sapos yu laik save moa o yu gat laik long kisim wanpela rum, yu ken rait o toktok long ol Sister long dispela etres:

Sisters of Charity of St Anne, P O Box 2784, Boroko, NCD. Telipon namba 6883170. na yu ken toktok long Sister Clara Joseph o Sister Alice George.

## Bung bilong ol Polis meri long Oktoba

...fan resing sapot

BILONG redi long konferens bilong ol Polis meri long kantri, fan resing apil i stat pinis.

Long lons bilong fan resing apil bilong namba 8 bung bilong ol Polis Meri long PNG i bin kamap long Pot Mosbi.

Taim Minista bilong Komyniti Developmen Dame Carol Kidu i bin opim dispela lons, em bin autim strongpela tok olsem ol man i mas lukim ol meri olsem wankain na i stap long wankain mak wantaim ol. Na noken lukim ol olsem ol samting we i stap daunbilo long ol.

Em bin tok Mama Lo, Developmen Gols, Polisi

bilong Gavman long Jenda (man na meri) i toktok long ikwaliti o wankain luksave long ol man na meri wantaim, maski tupela i narakain.

Em bin tok wanpela wol lida na leit Prait Minista bilong India em Mahatman Gandhi i bin tok tu olsem ol man na meri i narakain tasol ol i wankain tasol wantaim wankain rait.

Dame Carol i tok dispela narakain namel long ol i save kamapim ol gutpela samting we tupela sait i narakain tasol ol i wok wantaim long kamapim ol gutpela samting.

## Lo bilong lukautim ol pikinini



Ol Stet Pati bai lukim olsem ol meri i mas gat wankain rait na sanap long sem level wantaim ol man.

Na nogat pasin bilong rabisim ol i kamap.

Na ol i mas gat wankain sans long makim gavman bilong ol long intenesenel level na go insait long ol wok bilong ol intenesenel ogenaisesen.

*Ol toktok i kam long liklik buk ol i kolim CEDAW we Pasifik Rijnel Human Raits Edukesen risos Tim i redim.*

## Sotpela tok lukaut

### Skruiim tok long HIV/AIDS Denial o Tok Em i no Tru

Long pastaim, sampela pipel i no inap bilipim olsem ol i gat AIDS. Ol i tok dokta i rong. Em i no tru. Mi pilim strong.

Sapos ol i tokim yu olsem yu gat HIV o AIDS, kaunsela bai helpim yu long luksave long mining bilong em.

*Ol toktok i kam long liklik buk ol i kolim "Living with HIV/AIDS, A Guide for self care and positive Living" National AIDS Council i redim.*



Kuk Kona wantaim MERI WANTOK

## Fish Pie (Pis Pai)

**Yu mas i Gat:**  
1-pela bikpela tinpis  
1-pela kiau  
4-pela anien  
8-pela spun bata o majarin  
4-pela kap susu sol  
Sampela poteto

long wanpela dis na brukim pis gut. Putim kiau wantaim pis.  
4-Putim majarin long sospen na hatim.

Putim plaua na tanim wantaim. Kapsaitim liklik susuna tanim na kapsaitim liklik moa i go i go olsem inap yu tanim pinis olgeta susu.

5-Katim anien liklik tru na tanim wantaim sos.

2-Putim kiau long sospen i gat wara long en na bolim inap long 15 minit.

6-Tanim pis na kiau wantaim sos na putim long wanpela dis.

Kwiktaim putim kiau long kolwara. Taim em i kol rausim skin bilong em na katim i go liklik.

7-Putim poteto antap long pis. Putim long aven na hastim inap poteto i kamap braun.

3-Kapsaitim tinpis



**TOKTOK NATING**  
Wantaim  
Fr. Paul Liwun SVD

**WANPELA** papa i laik skulim pikinini bilong em, bai em i kamap gutpela man long bihain na em bai luksave olsem rot bilong skelim samting em i wanpela bikpela samting. Na em i laik bai pikinini bilong em i mas bihainim tok gut na wokim wanem samting i tru na gutpela.

Olsem na taim pikinini bilong em i makim wanpela samting i krangki o i no gutpela, papa bilong em i save givim wanpela hama na nil long nilim wol long baksait bilong haus bilong ol.

Bihain sapos pikinini bilong em i wokim wanpela samting i gut na stret, papa bilong em i tokim pikinini long kamautim wanpela nil long wol, we em i bin nilim taim em i mekim wanpela samting rong.

Taim pikinini i kamap 15 krismas bilong em, i gat sampela nil i stap yet long wol bilong haus bilong ol. I luk olsem, taim em i kamautim olpela nil long wol, sampela taim em tu i bin nilim sampela nupela nil long wol. Mi no save wokim samting i gutpela tasol. Em i save wokim samting krangki tu. Olsem na em i save kamautim narapela nil, tasol em i save nilim sampela nupela gen long wol.

Taim krismas bilong em antap long 20, i luk olsem pikinini ya i bin wokim planti gutpela samting tasol. Na long wanpela de, papa bilong em i singautim em na tupela i go long wol we em i bin nilim na kamautim sampela nil long en.

Taim ol i kamap long dispela wol, ol i no bin lukim wanpela nil i stap. Olgeta nil em i bin kamautim bikos i luk olsem pikinini i no mekim wanpela samting i rog moa.

Taim tupela i kamap long wol, papa bilong em i bin tokim em olsem: "Pikinini!" Nau mi laik yu lukluk gut long dispela wol, na tokim mi wanem samting yu lukim i stap".

Pikinini i lukluk long wol na em i bin painimaut olsem olgeta nil em i bin nilim bipo i no stap moa long dispela wol. Bihain em i bin tokim papa bilong em: "Mi no bin lukim moa ol nil mi bin nilim bipo long dispela wol. Tasol mi bin lukim samting i stap long wol. Olgeta nil mi bin nilim bipo na mi bin kamautim, ol i bin kamapim hul. Na olgeta hul i stap long dispela wol yet".

Taim Papa bilong em i harim dispela tok bilong pikinini bilong em, em i bin bekim tok olsem: "Pikinini. Nau, Mi, papa bilong yu i laik tokim yu long wanpela samting. Yu save olsem wok nogut yu bin wokim, maski nau yu bin tok sori na ol manmeri i bin pogivim yu, na dispela samting nogut i no stap wantaim yu moa, olsem nau yu no inap lukim wanpela nil moa i stap long wol. Tasol ol nil yu bin nilim long wol, ol i bin kamapim hul long dispela wol. Maski ol nil yu bin kamautim pinis, tasol MAK bilong ol i stap yet. Olsem na, wanem samting nogut yu bin wokim, maski yu kisim tok sori o givim bel long ol narapela manmeri, tasol, mak bilong rong yu wokim long en bai stap insait long bel bilong yu yet, olsem mak bilong nil i stap yet long dispela wol na bagarapim gutpela samting bilong dispela wol."

Olsem na, tingim gut na skelim tingting gut bipo long wokim wanpela wok, tok o narapela pasin nogut. Pogif pasin na tok sori i stap insait long yu, tasol mak bilong samting nogut i stap yet.

# Pop egensim ol "gei marit"

Veronica Hatutasi i raitim

**HETMAN** bilong Katolik Sios long wol Pop Benedict 16 i egensim pasin bilong ol manman na merimeri marit na i tok dispela i giaman fridom o fos fridom we i kamapim hevi long familli.

Dispela em i namba wan kliapela toktok nupela Pop we i bin kamap hetman bilong Katolik Sios long mun Epril tasol i mekim long ol gei marit.

Nupela Pop i egensim tu divos o bruk marit, yusim ol marasin long stopim karim bel, traim marit na tupela manmeri i stap wantaim tasol ol i nogat opisel luksave olsem ol i marit. Em i tok ol dispela kain samting i birua long familli.

"Ol kain giaman marit i wok long kamap tude, ol fri yunien, traim marit na ol narapela marit namel long ol man man mari na meri meri marit i autim kain giaman fridom na i mak bilong giaman rot ol man i tok em i laik bilong ol na ol i ken wokim wanem samting ol i laikim long en," Pop i tok.

Pop Benedict 16 i wokim dispela toktok i go long ol familli long Sen John's Katitrel long Rom long samting we planti toktok egensim na sapatim i wok long kamap long en. Dispela i moa yet long Yurop na Amerika.

Long mun Epril bilong dispela yia, ol Katolik pipel long kantri Spein we i save bihainim ol lo bilong sios long bipo yet i bin givim tok orait long ol gei marit i kam aninit long lo.

I gat bilip olsem Palamen bai tok oraitim samting ya na kamapim lo long en.

Tasol long las wik, Asembli long Kalofonia i bin rausim Bil o Lo we i bin inap long larim ol gei lain i marit. Kalifornia em dispela Stet we i gat bikpela mak bilong ol manmeri insait long Amerika.

Pop husat taim em bin stap olsem hetman i lukautim ol bilip bilong Katolik Sios moa long 20 krismas taim em bin Kadinel Joseph Ratzinger, i tok ol giaman fridom olsem ol gei marit em i beis long samting em i kolim long "banalisation of the human body" o stopim bodi bilong man long kari-maut wok na man yet.

## Rabaul Memorial Sios laikim helpim

Veronica Hatutasi i raitim

**ASKIM** bilong helpim i go long ol pablik na bipo sios memba bilong Rabaul Memorial Sios (RMC) long Is Nu Briten long givim liklik mani long halivim long sanapim bek sios bilong ol.

Maunten paia long 1994 i bin bagarapim sios. Nau kongrikesen i save wokim lotu sevis bilong ol ausait long ples bilong sanapim ka long em.


Siaman bilong RMC Nasshon Sailas i tok taim maunten paia i bin bagarapim ples, ol sios memba i bin lusim Rabaul na i go stap nabaut.

Na em i askim ol long helpim na salim donesen mani i go long helpim sanapim nupela sios bilding.

Mista Sailas i tok kongrikesen i laikim nupela sios bilding bikos ples we ol i save mekim lotu long em i liklik.

Em i tok ol bai sanapim sios long ples we em i bin sanap long en bipo.

Em i tok husat man o bipo sios memba i laik givim donesen i ken go long Benk Saut Pasifik na salim mani long dispela akaun namba: Rabaul Memorial Church building Project, Akaun namba-10000688608, BSP Kokopo.



• Nupela Pop i egensim tu divos o bruk marit, yusim ol marasin long stopim karim bel, traim marit na tupela manmeri i stap wantaim tasol ol i nogat opisel luksave olsem ol i marit.

## Yunaitet Sios i gat nupela rijen

...Namba 9 long kantri

Paulus Tali i raitim

IS Sentrol Papua Rijon i kamap olsem namba 9 na nupela rijen bilong Yunaitet Sios long PNG. PAPAUA region.

Modereta bilong Yuniatet Sios Reveren Samson Lowa i bin go pas long sios sevis bilong kirapim wok bilong nupela rijen we i bin kamap long las Sande.

Long kirapim wok bilong nupela rijen, ol bin makim Bisop bilong dispela rijen long go pas long ol wok. Em long Reveren Laka Renagi.

Hetkota bilong nupela rijen bai stap long Kwikila.

Memba bilong Abau we dispela nupela rijen i karamapim em Dokta Puka Temu i bin givim ol samting bilong sanapim ol nupela bilding olsem haus bilong bisop na

opis bilong rijen. Ol dispela samting i kos K10,000.

Rijinel Seketeri bilong nupela Is Sentrel Papua Rijon Reveren Labe Buruna i tok Yunaitet Sios Asembli i welkamim husat lain i laik givim sampela donesen i go long dispela projek long sanapim hetkota opis bilong sios.

Ol pralvet kampani, gavman na ol wan wan manmeri i ken givim helpim, Reveren Buruna i tok.



### PASIN BILONG WARI NA TINGTING PLANTI

Jisas i tok moa olsem, "Olsem na mi tokim yupela, yupela i no ken tingting planti long laip bilong yupela na tok, 'Bai yumi kaikai wanem samting? Bai yumi dring wanem samting?' Na yupela i no ken tingting planti long bodi bilong yupela na tok, 'bai yumi pasim wanem laplap?' Ating laip em i winim kaikai, na bodi em i winim ol laplap samting. Yupela lukim ol pisin.

Ol i no save planim kaikai, na ol i no save bungim na putim long haus kaikai. Tasol Papa bilong yupela i stap long heven em i save givim kaikai long ol. Ating yupela i no winim tru ol pisin, a?

MATYU 6: 25-26

## Baibel bai senisim laip

Paulus Tali i raitim

**BAIBEL** bai senisim laip bilong ol sumatin bilong Divain Wod Yunivesiti long Madang, Saplen bilong Gideon's Intenesenel Ministri John Chokoli i bin tok.

Na yumi mas ridim Baibel buk olgeta taim.

Em i wokim dispela toktok bihain long sios i bin donetim ol Gideon Intenesenel poket sais Buk Baibel i go long ol sumatin las wik.

Ministri i save givim aut ol buk Baibel i go fri long ol kalabus, hotel na motel ol skul, ol polis na ol skul.

"Driman bilong mipela em long olgeta manmeri long

kantri i mas save long Tok bilong Bikpela.

Em i tok ol lain long hetkota bilong Gideon's Ministri long Amerika i bin go na kirapim wok bilong ol long Madang provins long 1992.

Glasm Tok wantaim  
Bisop Peter Fox



# Tingim histri

OLSEM planti wantok bilong mi bilong Ingran, mi gat bikpela laik long histri. Histri em i bikpela samting long yumi.

Mipela i kam long ol ples we i gat ol kasel o ples ol King na Kwin i save stap long en, ol katitrel o ol bikpela haus lotu na ol bilding i gat luksave bilong bipo taim yet.

Olgeta liklik ples i gat sios bilong em yet. Sampela i go bek long ol yia 18 Senseri.

Mipela ol "Brits" o ol lain bilong Briten i bin groap harim ol stori bilong Robin Hud na King Arthur, ol King na Kwin na ol biknem pairret.

Mipela i bin wokim ol bilding long ol brik na i no long kunai na ol pam, olsem na ol bilding bilong mipela i no bagarap taim ol kain hevi i bin save kamap.

Mipela i wok long raitim ol histri bilong mipela stat yet long taim bilong ol Romen husat i bin papa bilong mipela.

PNG tu i gat histri. Namba wan tumbuna bilong ol PNG pipel i bin kamap long hia 50,000 krismas i go pinis.

Tasol planti histri bilong PNG i lus na nogat man i tingim. I nogat ol buk na i nogat planti bikpela samting ol i bildim i gat histri long em.

Memori o tingting bilong ol lapun em rot we PNG i save long ol samting i bin kamap bipo na taim ol i dai, ol samting i save lus.

Na dispela em i samting bilong sori long en. Yumi ken lainim ol samting long ol dispela i bin kamap long bipo taim.

Taim yumi save long histri, yumi ken save long tumbuna bilong yumi na yumi ken abrusim ol asua we ol bin wokim na kisim gutpela save bilong ol long staim yumi long gutpela rot.

Yumi ken yusim ol samting yumi lainim na hanmak yumi lusim bihain ol tumbuna bilong yumi i ken lukim na amamas long en. Sori tru olsem ol arapela lain i raitim na autim ol stori bilong PNG.

Ol PNG lain yet i mas tokim na lukautim stori bilong PNG. I moabeta yumi harim ol stori bilong ol bikpela na lapun na putim long teip

rekoda na raitim ol samting ol i tokim yumi long en bipo ol i lus.

Stori i kamap long taim bilong yumi em yumi mas lukautim. Yumi noken lusim long han bilong ol ausait lain long raitim histri bilong yumi.

Kristieniti tu em i lotu we i gat histri long en. Em i stori long ol gutpela samting God Papa i bin wokim bilong yumi long taim bipo na ol samting we em i wokim nau long taim bilong yumi. Histri bilong God em i raitim long laip bilong ol manmeri nating olsem yumi.

Histri em stori bilong em. Em bin wok i stap pinis long PNG bipo ol misinari i bin kam hia. Tasol planti samting em bin wokim long ol tumbuna bilong yumi em i lus pinis.

Tasol tenkyu tru nau ol lain i wok long ol yunivesiti na wantaim ol ogenaisesen olsem Melanisen Institut long painim histri bilong PNG tasol planti wok i stap yet long mekim.

Yumi wan wan i gat wok long mekim bilong raitim na lukautim histri bilong PNG na ol pikinini na bubu i kam bihain i ken lukim. Na yumi gat ol samting bilong mekim kamap dispela.

Yumi ken rait, yumi gat ol video na ol odio rekoda. Raitim stori bilong famili bilong yumi i bikpela presen long ol pikinini na bubu i kam bihain long lukim. Tru, i no oltaim ol tumbuna bilong yumi i tok tru. Histri long pipel bilong mi em i kliapela evidens long dispela.

I nogat man husat i no inap long asua tasol i moabeta long givim sans long ol tumbuna bilong yumi i kam bihain long lainim long ol mistek o asua bilong yumi.

Noken wari sapos ol i no pablisim ol samting we yumi raitim.

Tasol sapos yumi tokim stori long ol pikinini bilong yumi, bai i gutpela tru long yumi givim gutpela samting i go long famili bilong yumi.

Dispela i bihainim tok i stap long tempela Mandato bilong God we i tok long onaim papamama bilong yumi.

Tingim ol wantaim tok tenkyu em liklik samting we yumi ken wokim long onaim ol.

# Turanguman luksave long kraais

Paulus Tall i raitim

WANPELA turangu o yumi ken kolim em disebol man i luksave long pawa bilong Kraais na em i wok long yusim dispela pawa long painim gutpela sindaun.

Andrew Awateng em bilong liklik ples Lomalom long ples Buang long Morobe provins.

Mama bilong em Gonn Awateng i bin karim em long Pot Mosbi jenerel haus sik long namba 29 de bilong mun Jun long 1976. Dispela mun bai em i painim namba 27 krismas bilong em.


Taim em i liklik yet, mama bilong em i save karim em long baksait bilong em na em i save mekim wok bilong em.

Papa bilong em Awateng Michael na mama bilong em i bin gat 4-pela pikinini we tupela i dai pinis na tupela tasol i stap laip. Narapela brata bilong Andrew i kamap olsem man husat i save lukautim haus lotu long 8-Mail Lutheran Kalvari kongriksen.

Papa bilong Andrew i save wok olsem ti boi long ANZ Benk long daun taun Pot Mosbi siti.

Andrew yet, taim em i kamap olsem 12 krismas, papa mama bilong em i putim em i go long konpamesen skul long lainim tok bilong God long Towamo Lutheran Haus Lotu long Morata 1 long Mosbi.

Long skul bilong konpamesen i gat 25 manmeri i go skul long kisim tok bilong God. Olgeta taim, maski mama i isi long mekim ti bilong em long go long



• Disebol man Andrew i sanap wantaim mama bilong em. Maski lotu i go long we long hap ples em i stap, Andrew bai go na harim gut nius bilong God na kisim strong long sindaun bilong em.

skul, em bai hariap long go skul pastaim long olgeta arapela gutpela manmeri.

Long konpomesen skul, pasto Zeriga Megen, i bin tokim ol konpamesen lain olsem ol i mas harim tok bilong God na bihainim bai ol i ken kamap gutpela pikinini bilong em.

Long pinis bilong yia 2001, Andrew wantaim ol arapela 24 manmeri i bin kisim blesing long Pasto Zeriga. Long stat bilong 2002 ol raskol i bin sutim Pasto Zeriga long Gerehu na em i bin dai.


Bihain long en, maski lotu i kamap long longwe ples olsem Jun Veli o Waigani, turangu man Andrew i save laik go long harim tok bilong God long strongim bilip bilong em.

Long las yia, bikpela lotu bilong sios i bin kamap we i lukim Lutheran Wol Federesen Seketeri Dokta Nook i kamap na givim toktok long moa long 8,000 long ol Lutheran Kristen manmeri. Andrew i bin stap long dispela bikpela bung long harim tok bilong God i go long ol wok manmeri bilong em.

Papa bilong Andrew i bin kisim luksave bilong Kwin long wok em i givim long sios inap long 11 krismas olgeta. Praim Minista Sir Michael Somare i bin givim em long dispela medol long luksave long wok bilong em.

Long sait bilong Andrew yet, em i soim olsem maski yu wanem kain man o meri, sapos yu kisim toktok bilong God, yu ken strongim bilip bilong yu na kamapim gutpela sindaun insait long laip bilong yu.

## Yut sanap long tok bilong God



• Ol Lutheran sios long Mosbi i sanap long bikpela selebren bilong strongim ol yut long sait bilong lotu.

Paulus Tall i raitim

OL YUT na ol papamama i mas sanap strong long tok bilong God. Dispela toktok i bin kam long bipo sief jastis Sir Arnold Amet long bikpela de bilong Luteran sios long Papua Distrik we moa long 1500 kristen manmeri i bin kamap long Marimari Luteran kongriksen long Gordons long Pot Mosbi long amamasim.

Dispela de ol i amamasim bilong ol yut na mekim bikpela tenksgiving.

Ol yut i kam long 8-pela kongriksen insait long siti na soim gutpela pasin long amamasim dispela de.

Ol i tingim prea de bilong sios long displea taim tu we i lukim ol

yangpela i kisim prea long wan wan tokples bilong ol long Hagen, Goroka, Kote, Yabim na tok pisin yet.

Ol lain bilong trampet ministri na "Girls' Brigade" i bin i go pas long mekim musik bilong dispela Sande.

Presiden bilong Papua Distrik Luteran sios, Revren Sommy Setu i go pas long autim tok we em i tok: "Yupela ol yangpela i gat moa bikpela wok long bihainim rot bilong Kraais.

"Wanem pasin yupela i stap long en nau i mas senis na yupela i mas sanap long tok bilong God."

Ges spika Sir Arnold husat i tok ol yut na papamama i mas sanap strong wantaim long tok bilong God.

"Tok bilong God i gat pawa na strong long strongim laip bilong yumi," em i tok.

Em i tok bipo em i stap olsem sief jastis em i no luksave tumas long tok tru bilong God.

"Tasol nau mi kam long sios na mi senisim laip bilong mi na mi laikim yupela ol narapela tu i mas senisim pasin na laip bilong yupela wanwan," Sir Arnold i tok.

"Sapos yumi ol Luteran i bihainim lek mak bilong Martin Luther King bai sios inap senis," em i tok.

Long Dispela em i salensim ol yut, mama grup, ol sande skul tisa na evenjells na ol pasto long ol i mas go aut na surukim wok bilong sios na tok bilong God i go moa.

## Nupela wasman bilong Salvesen Ami Sios

NUPELA hetman bilong Salvesen Ami Sios long PNG em Kenel Andrew Kalai na Misis bilong em Kenel Julie Kalai i kisim blesing na wokim tok promis long nupela wok bilong ol long go pas long sios insait long wanpela seremoni long Sande Jun 5 long Pot Mosbi. Kenel Kalai em i namba wan PNG asples man long go pas long sios insait long 49 yia histri bilong sios long PNG.

long London, Ingran taim ol i kisim tok long kam bek na holim top

wok bilong sios long PNG. *Poto: Veronica Hatutasi*



Ol i tekova long Kenel Trevor Tuck na Memory Tuck bilong Saut Afrika. Kenel Andrew na Julie Kalai i bin wok i stap

# Bung bilong ol nes bai glasim HIV/AIDS

Veronica Hatutasi i raitim

OL nes long kantri i laikim helpim wantaim mani long holim wanpela wik Anuel Nasing Rises Simposium o bikipela bung bilong ol long mun Ogas long dispela yia.

Olsem na Mosbi han bilong PNG Nesas Asosiesen i bin lonsim fan resing apil bilong em na askim ol bikipela koporet kampani, ol bisnis haus, gavman dipatmen na pablik long givim helpim mani na ol i ken go het wantaim dispela bung na tu, lukautim ol lain bai i kam stap long bung.

Presiden bilong Pot Mosbi brens bilong PNG Nesas Asosiesen Sister Eimi Kaptigau i bin tok moa long 300 nes long olgeta hap bilong kantri bai kam long bung we bai kamap long Pot Mosbi long Ogas 15 inap de namba 19.

Bikipela samting we dispela rises bung bai lukluk long en em long HIV/AIDS.

Na het tok bilong dispela bung em long "Strongim na givim moa save long ol nes na ol nes i lukautim na karimaut ol etvoke-si wok o wok long daunim sik HIV/AIDS.

Sister Kaptigau i tok sik HIV/AIDS i wok long go bikipela tru na kalap long planti manmeri long PNG stat yet long namba wan taim ol bin painim dispela sik long PNG long 1987 na ol nes em ol i go pas long lukautim ol siklain.

Na olsem ol i mas save gut long olgeta samting i sut long dispela sik, long lukautim ol na go insait long ol wok bilong pait egensim sik ya.

Na em i tok dispela konferens long mun Ogas bai lukim na harim ol rises wok we bai ol presenta i bin redim na givim aut long em.



• Sister Eimi Kaptigau wantaim logo bilong ol PNG Nesas Asosiesen long lonsing bilong fan resing apil bilong ol nes. Foto: Nicky Bernard

Sister Kaptigau i tok bikos mak bilong ol lain bai kamap long konferens i bikipela na ol wok rises we ol bai prisenim long dispela konferens i bikipela samting, ol i laikim helpim wantaim mani na olsem long fan resing apil ol i askim ol bisnis haus, ol koporet ejensi na ol arapela lain moa long givim helpim bilong ol.

Han bilong Nesas Asosiesen long Pot Mosbi em i bikipela moa long kantri wantaim samting olsem 1,000 memba.

Long las yia, ol bin holim bung bilong ol nes long Rabaul insait long Is Nu Briten provins na dispela bung i helpim planti nes long luksave long wok bilong ol na we bilong helpim ol sik manmeri.

## Lukautim gut environmen ...skulim pikinini

SINGAUT i go long olgeta manmeri long kantri na moa yet, ol skul sumatin, long lukautim gut environmen insait long kantri long stap klin na grin long olgeta taim.

Environmen em ol bus, draun, diwai, wara na ol samting i stap insait, aninit na antap long en.

Long wankain taim tu, tok i go long ol bikipela manmeri na ol papamama long skulim ol pikinini long luksave na lukautim gut environmen.

Ekting Edukesen Seketeri Joseph Pagelio i bin wokim dispela toktok long makim Wol Environmen De las Fraide.

Het tok bilong Wol Environmen de bilong dispela yia em long "Green Cities Plan for the Planet" o "Dispela graun i mas gat ol grinpela siti wantaim ol flaua, diwai, gras samting long en.

Dokta Pagelio i tok het tok i karim salens long planti pipel nau i wok long muv i go long ol taun na olsem, yumi mas luksave na lukautim ol grinpela eria insait long ol taun na siti.

Mak bilong populesen bai gro moa long ol taun na siti long ol taun na siti bilong ol developing kantri we PNG i kam aninit long en. Long PNG, bikipela mak bilong pipel i



## Ol elementeri pikinini i soim bikipela intres!

Ol Elementeri skul pikinini bilong Alotau Elementeri skul i stap isi na harim ol skul bilong ol tisa bilong ol. Foto: Barbara Tomi- CIMC

stap long ol ruel eria tasol planti i wok long muv i go long ol taun na siti nau.

Dokta Pagelio i tok taim yumi givim bikipela tingting long sevim ol naturel risos o ol samting i stap long bus, graun na wara bilong yumi, mipela i mas skulim tu ol pikinini long luksave na lukautim environmen bikos ol i stap long em na laip na

sindaun bilong ol em i stap long han bilong em.


Taim em i tokaut olsem Edukesen Dipatmen i sapotim Dipatmen bilong Environmen na Konsepesen na Yunaitet Nesens Environmen Progrem long promotim Wol Environmen long olgeta yia, em i tok ol skul i gat bikipela

wok long lainim ol pikinini long environmen, rot bilong lukautim na luksave long en.

Em i tok ol pikinini i mas kisim gutpela stia long lukluk long ol kain rot we ol pipel i save stap wantaim na wantaim tu environmen na ol i ken kamap wantaim ol gutpela tingting long go hetim laip na sindaun bilong ol.

# Nius Bilong HIV/AIDS

wantaim David Ephraim



LONG ol wik i go pinis, i gat planti ripot long HIV/AIDS na long manmeri husat i wok long helpim long tok aut long nogut bilong dispela birua.

Planti ol ripot long nius i singaut long ol politikel lida long go pas long woa egensim dispela hevi. Bilong wanem yumi nidim ol?

Askim yumi wan wan mas tingting long en.

Olgeta toktok na wok painimaut i kam em ol save traim skelim wantaim ol arapela kantri.

Ol i skelim wantaim ol Afrika kantri na ol i tokim yumi long en.

Na planti taim planti pipel bilong yumi i bihainim na traim bihainim rot bilong abrusim HIV/AIDS olsem long narapela hap graun long Afrika.

Na dispela i save wokim planti pipel bilong yumi paul na ol i no klia long wok bilong helpim long daunim HIV/AIDS long skelim wok bilong HIV/AIDS awenes long kantri tete.

Olsem bipo mi save tok awenes woksop na kain kain wok i save kamap tasol long taun na i no go stret long ol lain manmeri bilong yumi i stap long ol kliklik ples.

Ol manmeri long bus i save stap orait stret bikos ol i holim yet strong bilong kalsa bilong yumi.

Ol lida bilong yumi long gavman i mekim wanem, givim mani o givim awenes? Tingim mani bai helpim o laikim na wok bung bilong pipel bai wok. HIV/AIDS stap pinis, yu nidim wanem?

## Tok Lukaut

Gavman bilong Australia i save putim samting olsem \$600 milien long ol Intanesenel wok bilong helpim daunim HIV/AIDS.

Long dispela yia Australia Gavman i givim inap long \$50 milien i go insait long Global Fund long pait egensim AIDS, tuberculosis na malaria.

Global Fund em wanpela nupela rot we ol wol ikonomi kantri olsem UK, USA, na France i kamapim long helpim ol Ted Wol kantri olsem yumi.

Long kantri yet Gavman bilong Australia yet i save givim olsem long \$492.3 milien long ol helpim long ol wok insait long kantri. Long HIV/AIDS yet olsem long \$60 milien.

Gavman yet i givim olsem long K10 milien namel long ol dispela mani yet.

Planti ol manmeri husat i stap insait long bus bilong kantri i no save long HIV/AIDS yet.

Planti mani kam yet ol NGO na Gavman Ejensi i wok long singaut long mani yet. Planti taim sol manmeri husat i gat HIV/AIDS i no save kisim gutpela helpim.

Na yet planti toktok i wok long kamap long helpim ol.

Moabeta gavman na yumi mas helpim ol manmeri husat i gat HIV/AIDS. Olsem mi tok pinis yumi nidim mani ol laikim.

HIV/AIDS stap pinis mani ken kamapim rot gut na yusim gut.



# Singaut long Askim bilong kisim Mani Sapot aninit long Fiseris Projek Dvelopmen Fan

Wanpela hap bilong mani i kam long Multilateral Fiseris Tiriti namel long ol Pasifik Ailan Kantri na Yunaitet Stets ov Amerika bilong opim rot bilong ol US pes sain flek sip i go insait long Eksklusiv Ikonmik Zon bilong ol Pasifik Ailan Kantri i stap long han bilong wan wan Pasifik Ailan Kantri na long Forum Fiseris Ejensi long Honiara, Solomon Ailans.

Dispela fan ol i kolim Projek Dvelopmen Fan (PDF). Bihainim laik bilong mekim dispela fan i op moa long ol fiseris projek, wanpela PDF Stiaring Komiti i bin kamap long go pas long PDF bilong Papua Niugini. Komiti bai lukautim mani bai em i klia na op long olgeta manmeri long lukim na ol bai was gut long rot bilong mani.

PDF Stiaring Komiti nau i singaut long ol askim bilong mani sapot aninit long Projek Dvelopmen Fan. Ol dispela proposel o askim i mas pundaun aninit long dispela tupela hap:

## A. Komyuniti Fiseris Progam Sapot

Ol Komyuniti Fiseris Progam em ol progam i sut long planti manmeri husat bai kisim kaikai bilong ol dispela projek we i no bilong mekim winmani tasol.

Husat i ken aplai:

- Ol Komyuniti bes fiseris asosiesen o kopretiv

Mani bai go long mekim wanem:

- Baim ol kapitel ikwipmen o samting bilong huk olsem fising gia, ais bokis na ol masin samting bilong opis na wok maketing.

Mani mak bilong wan wan projek:

- Ten Tausen Kina (K10,000)

Namba bilong ol projek bilong skelim:

- Tenpela projek tasol bai kisim helpim mani

## B. Liklik i go Midium Skel Bisnis Sapot

Mani go long Liklik i go Midium Skel Sapot em long givim wanpela liklik hap sapot long ol SME insait long fiseris sekta, bilong paim ol kapitel samting we bai i strongim wok bilong bisnis.

Husat i ken aplai:

- Ol liklik i go medium kampani we ol sitisen tru tru bilong kantri i holim 100%
- SME we i wok pinis inap long tripela yia i go pinis
- SME wantaim 50% ekwiti o i ken givim hap bilong kos bilong samting ol i laik baim

Mani bai go long mekim wanem:

- Baim ol kapitel masin samting we bai i strongim wok bilong bisnis

Mani mak bilong wan wan projek:

- Twenti Tausen Kina (K20,000)

Namba bilong ol projek i ken kisim mani:

- Tenpela (10) projek tasol bai i ken kisim helpim mani

## Ol Jenerel Kondisin

Olgeta kapitel masin o arapela samting i mas i gat invois i kam long saplaia.

I mas i gat evidens long ekwiti kontribusen long sait bilong SME Sapot

Komitmen na strong bilong givim ol ripot long projek we man ii go long en

Ol apliken i kisim tok orait bai i mas wet 28 de we ol mani bai kisim tok orait na bai i go aut.

Peimen bilong ol samting bai go stret long saplaia aninit long lukaut bilong PDF Stiaring Komiti

Mani no bilong operesenel kos o long yusim long ronim bisnis, bekim dinau o salim


Olgeta aplikesen i no kisim tok orait bai go bek long apliken Strepela rot bilong kamapim proposel i mas i gat ol dispela samting:

- Projek Taim
- Introdaksen o tok i go pas
- Problem o hevi
- Propos Solusen o rot bilong stretim dispela hevi
- Fanding Rikwaimen o mani bilong stretim dispela hevi
- Proponens Kontribusen o mani bisnis bai givim
- Taimskel o taim we olgeta samting bai pinis

Olgeta proposel i mas i gat klia toktok aninit long nem 'PDF' na i mas i go long PDF Steering Committee, c/-National Capital District

Olgeta sabmisen i mas kam pastaim long namba 30 de bilong mun Jun 2005.

Tok orait i kam long:



Mista Sylvester Pokajam,  
Ekting Menesing Dairekta, NFA na  
Siaman bilong Projek Stiaring Komiti



Salim ol pas i kam long WANTOK NUSPEPA: P.O. Box 1982, Boroko N.C.D 111 Fax: 325 2579 Email: word@global.net.pg

## Gavana Yawari mekim stret wok

**Dia Edita**  
MI WANPELA mangki long lalibu distrik, liklik ples Kendayamo. Mi gat bikpela amamas tru long rait i kam long Wantok Niuspepa.

Mi laik autim bikpela filings na amamas long wok papa bilong mi Hami Yawari i mekim na tu mi laik tok klia long ol bikpela sevis o developmen i kam long em.

Ol sevis o developmen olsem fri edukesen, polis konstabulari, silim rot, mentenim pis wantaim kompensesen na ol arapela moa.

Mi laik sapotim na soim amamas bilong mi i kamaut long pablik.

Pastaim tru mi laik toktok long fri edukesin long Sauten Hailens provins i kamap gutpela tru.

Papa na mama bilong ol skul pikinini i no save peim skul fi bilong ol pikinini na tu ol i no save baim pen, pensil, rula o olgeta ste-senari samting.

Na mipela i kisim gutpela saplai bilong kaikai olsem na mipela i no save karim belo mani o kaikai. Long fri edukesin polisi bilong Yawari i karim gutpela kaikai na mi amamas nogut tru.

Narapela long Polis Konstabulari long Sauten Hailens i ron gut tru. Ol wan wan distrik bilong Sauten Hailens i gat ol nupela polis kar long pait wantaim ol lain i save brukim lo.

Taim mi lukim ol nupela polisi kar, ol polisi i amamas long wok na ol problem o hevi i wok long go daun.

Dispela polisi bilong Yawari i karim gutpela kaikai na mi amamas nogut tru.

Silim rot long olgeta hap bilong Sauten Hailens i wok long kamap gutpela.

Taim mi kalap long kar na ron long lalibu rot i go long Walum, oloman, mi kisim wanpela bikpela filings stret ya na mi ting mi ron long balus o narapela kain spit kar tru ya.

Dispela polisi bilong yu i karim gutpela

kaikai na mi gat bilip long yu Gavana.

Long strongim pis wantaim kompensesen em ol sait wok Gavana i wok long mekim we ol arapela gavana i no save mekim bipo long dispela provins.

Taim kompensen paimen i kamap long Sauten Hailens, Gavana i save sapotim wantaim bikpela mani olsem tausen kina na i go antap.

Long dispela pasin bilong em pis i save kamap long provins na mipela i stap isi tasol.

Planti ol bikpela bikpela samting em i wok long mekim na dispela i soim tru kala bilong Yawari na mi gat bilip long wok bilong em.

Bilong wanem ol manmeri bilong Sauten Hailens i wok long bagarapim nem na wok bilong Hami Yawari long niuspepa?

Sauten Hailens traim tingim na skelim bipo ol Gavana i save givim ol sevis o developmen long yumi o nogat?

Sapos nogat, yu noken bagarapim nem bilong Yawari long niuspepa. Nogut em i helpim bilong yu na yu wok long bagarapim em long niuspepa i stap.

Mi laik mekim wanpela tok piksa olsem, nogut yupela i mekim olsem na pasim rot, tingim gut bipo yu bagarapim nem bilong em.

Lukim na skelim olgeta wok bilong gavana yu lukim em tru tru papa bilong Sauten Hailens provins.

Mi lukim laip wan stret yu save stretim wari na klinim aiwara bilong Sauten Hailens pipel.

Olsem na mi gat bikpela amamas na bilip long wok bilong yu. Tru tru mi tokim yu dispela Gavana posisen nogat wanpela man bai i senisim yu, sapos yu dai yes bai narapela man bai i kisim. Em tasol.

**DANIEL WAREPA MENDI SAUTEN HAILENS PROVINS**

## Kondom promotim sik AIDS

**Dia Edita**  
MI PASTO Roman Mawen i laik agensim AIDS Awenes Progem tim.

Mi no wanbel long yupela karim kondom bilong manmeri long strit na soim ol pablik na tok yupela yusim kondom na pamuk i go het.

Dispela awenes i no stopim HIV/AIDS. Nogat. Yupela promotim AIDS.

I gutpela sapos yupela painim rot bilong noken givimaut kondom na noken tu salim long stua o long haus sik.

Mi ting dispela em i rot bilong stopim AIDS. Pasim olgeta rot bilong kondom.

Tokim ol pablik olsem, yu wan wan i mas i stap wantaim man o meri bilong yu yet olsem Baibel i tok long 1 Korin 7:2.

Tokim ol manmeri i no marit olsem, yupela i mas wetim taim bilong yupela long marit na lukautim gut laip bilong yu yet.

Laip i stap long han bilong yu nau. Yu laik lusim o yu laik holim? Save i stap long yu yet. Tenkyu tru.

**PASTO ROMAN MAWEN BOROKO NCD**



Toksave; Sampela ol pas mipela i kisim i longpela tumas na i no givim spes long ol arapela pas, plis raitim pas liklik. Na tu putim nem na adres bilong yu long olgeta pas yu salim i kam, tenkyu. - Edita

## Siti kaunsol givim wok long mipela ol yut mangi

**Dia Edita**  
MI WANPELA strit manki bilong siti. Mi laik autim bel kros bilong mi long Wantok Niuspepa na i go long siti kaunsol.

Bel kros bilong mi i olsem, mi stap nating long siti tasol mi nogat wok na nogat mani long poket.

Mi save painim hat tru long kisim mani. Olsem na mi save baim buai, smuk, PK, dring, kilok, redio

bateri na planti ol liklik samting moa. Mi save wokabout long maket long dispela ol samting long kisim mani long sevim famili bilong mi.

Tasol mi save salim mi yet long siti kaunsol na ol i holim mi na senisim pes bilong mi na lusim mi long sel.

Olsem na mi askim tasol, plis siti kaunsol noken wokim dispela.

Yu mas stop. Sapos yu wokim dispela long mipela olgeta wokabout maket, orait bai mipela i stop long wokabout maket na bai mipela kamap olsem raskol na bagarapim siti na yu wantaim. Em tasol na mi nidim sapot bilong wokabout maket.

**EFANG JONAH LAE MOROBE PROVINS**

## Kolim nem bilong ples o papagraun Wafi

**Dia Edita**  
HET tok bilong Lapun Saab long ples Mare i tok olsem, 'Tingim nogut na gutpela pasin'.

Em i rait na i kamap long Wantok Niuspepa long 26/05/2005. Lapun Saab i tok em i belhat long husat i papa graun long Wafi, na pinis bilong pas bilong em i tok, 'Mi Saab i papa bilong graun.'

Orait, askim bilong mi olsem, i gat ol narapela ples i papa bilong graun tu o? Nogat mi laikim papa Lapun Saab sapos yu lukim dispela pas bilong mi orait rait na bekim na bai mi lukim long Wantok Niuspepa na bihain bai mi autim tingting bilong mi. Tenkyu.

**PAUL SUMAN POT MOSBI**

## Feri man i save wok Sande tu Sande

**Dia Edita**  
MI LAIK helpim ferri man bilong Wari Waria na autim wari bilong em. Ferri man Mista Barnabas Giu i save wok Sande tu Sande. Tasol Morobe Gavman (LLG) i no save peim em.

Kaunsol bilong Pema Wod mas toktok wantaim presiden bilong Morobe LLG na helpim em long sampela rot. Ferri man i save givim sevis i go long Morobe wantaim Oro pipel. Na i no gutpela long Kira LLG tasol i peim em i stap. Dispela i no stret liklik.

**Y. SEMASE EBA KIRA LLG ORO PROVINS**

## Maus Pas na Ai Pas Memba

**Dia Edita**  
MI LAIK bekim pas bilong wanpela mangi Nabak, em yet em Mista Robert Naio bilong Goldie River, husat i komplem long Memba bilong Nawaeb long Wantok 28 Epril, 2005.

Mi laik bekim tok bilong em olsem: Mipela Erap i no save laikim ol lida husat i save toktok planti tumas i nogat wok bilong ol. Mipela i save laikim maus pas lida husat i save toktok liklik na mekim planti wok. Na tu, mipela Erap i save wetim Gavman mani long givim sevis. Mipela yet save bungim mani long givim sevis. Mipela yet save bungim mani na kirapim wok long ples na i no mani bilong Gavman. Sapos yu wetim mani bilong Gavman, em bai nogat senis long ples bilong yu long Mogom. Na tu sevis i no kamap long Nawaeb em long asua bilong yupela ol Nabak. Yupela laik bilong toktok, planti i no laikim kirapim kainkain developmen bipo, 30 yia yupela sindaun long Palamen. Nau em yu leit long toktok long developmen na sevis long Nawaeb. Las tok, em mi laik tokim yu na lain bilong yu long noken karim brif kes na foldas na raun raun long Lae siti olsem ekting lida man.

**NABAK NEMBA LAE MOROBE PROVINS**


## Bai mipela kisim dinau moni o nogat?

**Dia Edita**  
YU INAP givim hap spes long mipela ol memba bilong MPRDC o Morobe People Resources Development Cooperation. Mipela olgeta memba namba bilong mipela olgeta sarap olsem 1,700 memba mipela i no kisim mani bilong mipela yet. Mipela i putim mani long yia 1998 na i kam inap long nau mipela i no kisim dinau o loun long kopresin em dispela kopresin Morobe Gavana Mista Luther Wenge i papa long em.

I kam inap nau mipela i no kisim ol mani bilong mipela olsem na long nau mipela i askim Gavana Mista Luther Wenge bilong wanem na yu giamanim mipela ol pipel bilong yu long dispela kopresin na taim mipela ol pipel i putim mani long kopresin na yu salim wanpela Chief of Staff bilong yu go na kisim ol mani long kopresin na wokim kempen bilong yu pinis long yia 2002.

Gavana Mista Luther Wenge mipela olgeta memba i laik tokim yu olsem mipela i no kam long yu bai yu givim fri mani bilong Gavman bilong yu em nogat. Em mani i kamap long hatwok na long tuhat bilong mipela olsem nau mipela i askim yu long mani bilong mipela nau i no yia i kam. Tenk yu long yupela olgeta long lukim na harim. Yu husat man o meri laik sapotim o agensim, mipela memba bilong MPRDC, rait tasol.

**MAZI KUME LAE, MOROBE PROVINS**



**WANTOK**  
**KOMENTRI**

**Bogenvil i ken skulim yumi**

TRINDE namba 15 de bilong mun Jun nau bai i kamap wanpela bikpela de we i mas kism luksave bilong olgeta manmeri insait long kantri i go inap long bihain taim olgeta.

Dispela de em bai yumi tingim dispela taim we namba wan provins bilong kantri i bin kism pawa bilong lukautim em yet.

Planti bikman na meri bilong PNG na ol arapela kantri insait long Pasifik rijen i bin kamap long Bogenvil long makim sanapim bilong Autonomous Bougainville Gavman o ABG. Dispela hap nem tu em bai mipela i harim moa long nau i go long bihain taim.

Bikpela toktok i kam long Praim Minista Sir Michael Somare na Minista bilong Inta Gavman Rilesens Sir Peter Barter em long ABG long strongim ol yet long taim bilong kamapim ol polisi bilong nupela gavman.

Em i tru olsem i gat bikpela wok ol i mas mekim nau. Tasol i gat ol hevi i stap insait long Bogenvil yet we nupela gavman i mas stretim.

Long lukluk bilong nesanel gavman namba wan samting i mas klia em i wok bung namel long ol lida bilong Bogenvil i mas strong. Sir Michael na Sir Peter wantaim i mekim strongpela toktok i sut long tok promis bilong ol Bogenvil lida. Tupela i tok sapos nupela gavman bilong Bogenvil i laik ron stret, dispela tok promis bilong ol lida i mas karim kaikai.

Yumi olgeta i save olsem Bogenvil i kalapim bikpela maunten hevi long kamap long dispela mak. Nesanel gavman i tokaut pinis olsem ol bai stap sambai long givim helpim long ABG. Tasol Sir Michael i bin tok tu olsem gavman na pipel bilong Bogenvil yet i noken lukluk tumas long nesanel gavman long makim mani bilong ol insait long baset.

Long sait bilong ABG, Presiden Joseph Kabui i mekim bikpela tok klia olsem olgeta memba i win long ileksen i pasim tok pinis long kamapim wanpela bikpela kolisin gavman bilong lukautim Bogenvil.

Kabui i no apas man na em i autim wan wan samting we em i tok ABG i luksave pinis long en na ol bai stretim.

Namba wan samting em long wok bung namel long ol lida. Em i tok wokabaut bilong Bogenvil long nau i go long bihain taim bai stap long han bilong dispela bikpela kolisin gavman.

Long sait bilong kirapim strongpela ikonimi bilong ol, Kabui i tok ol bai lukluk long strongim wok maikrofainens long wanem em i wok long kamap bikpela na strongim wok bisnis i stap pinis.

Tasol bikpela hevi nau i stap yet we Mista Kabui i tok i mas pinis em ol pait gan ol man i holim stap yet.

Tru tumas, sapos i gat ol gan yet insait long rijen, tingting bilong hevi bai stap yet long planti hap.

I gat ol samting we Kabui na ol memba bilong nesanel gavman i bin wanbel long en. Olgeta i givim luksave long halivim i bin kam long ol wansolwara kantri na ol bikpela intanesenel lain olsem Yunaitet Nesens, Yuropien Yunion na ol arapela husat i bin halivim. Olgeta yet i bin singaut long ol pipel, ol lida, ol sief na ol meri, sios na bisnis insait long Bogenvil long sanap wantaim na lusim kros na birua pasin namel long ol yet.

Long pinisim, i gat planti samting mipela i ken kism skul long en nau na taim ABG i staitim wok.

Dispela bai namba wan taim bilong wanpela bikpela kolisin gavman i kamap; namba wan taim wanpela ileksen i kamap we ol i makim sit bilong ol meri tasol; hat wok na indai bilong planti manmeri nau i karim kaikai na dispela em i bikpela samting namel long planti arapela kantri i gat hevi bai laik bihainim; mipela bai lukim sapos ABG i ken daunim hevi bilong ol giaman man husat i save stilim mani bilong ol gutpela manmeri; na nau bai mipela olgeta i lukluk sapos ABG na ol pipel bilong Bogenvil i ken strongim ol yet.

Tasol mipela i no lukluk nating. Lewa na bilip bilong planti manmeri insait long Papua Niugini i stap wantaim ol.

**Hevi bilong marasin stap long nus bilong Mista Pep**

DISPELA wik na las wik planti toktok i kamap long hevi bilong marasin long kantri. Las wik ol bikpela haus sik olsem Goroka, lalibu na Tari long Sauten Hailans, Wabag na Kundiawa i ripot olsem ol i sot tru long ol kain kain marasin bilong oraitim ol sik lain. Ripot tu i tok olsem, Tari distrik haus sik i pas olgeta bikos i nogat marasin long lukautim ol sik lain.

Dispela wik, Sief Sekretri bilong Gavman, Joshua Kalinoe, i singautim Helt Sekretri, Dokta Nicholas Mann, long wanpela helt woksop long Kimbe long Wes Nu Britin long go bek hariap long Mosbi na stretim dispela hevi bilong marasin. Mista Kalinoe i laik save long wanem as na ol haus sik long kantri i sot long marasin.

Taim ol bos dokta long ol bikpela haus sik long kantri i tok aut olsem i nogat marasin na ol samting bilong wok long stretim ol sik lain, Minista bilong Helt, Melchior Pep, i bin tokim Palamen las wik olsem dispela toktok long ol haus sik i sot long marasin, em ol giaman toktok. Mista Pep i tok, ol marasin long ol haus sik i no sot na i gat mani long baim ol marasin.



**TOK PISIN**  
wantaim  
**PETER MAIME**

Mista Kalinoe tu i bin givim oda long Fainens Sekretri, Thaddeus Kambanei, long mekim wanpela wok panim aut long rot Helt Dipatmen i save bihainim long kism ol saplai bilong marasin. Mista Kalinoe i luksave long hevi bilong marasin taim em i bin kamap long Kundiawa Haus Sik, taim em i go olsem siaman bilong wanpela bikpela kibung bilong gavman long Simbu.

Mista Kalinoe i tok, long 2005 Nesanel Baset, gavman i givim K53 milien long Helt Dipatmen long baim marasin. Em i tok, ol mani Helt Dipatmen i yusim pinis long baim ol marasin em K1.8 milien tasol. Em i tok planti hap mani i stap yet.

Mista Pep i tokim Palamen olsem, i gat mani long dipatmen. Dispela hevi bilong marasin i no hevi bilong em na Nesanel Gavman. Em i tok dispela hevi i stap wan-

taim ol lain i lukautim wok bilong odaim marasin saplai long Helt Dipatmen.

Ol nesanel dokta tu i bin tok aut long sot bilong ol marasin long olgeta hap long kantri. Presiden bilong Nesanel Dokta Asosiesen, Dokta Kauve Pomat, i tok dispela sot bilong marasin em wanpela bikpela hevi ol haus sik long kantri i bungim long dispela taim.

Dokta Pomat i sutim tok long sistem bilong odaim marasin na skelim long ol haus sik insait long Helt Dipatmen. Em i tok dispela sistem bilong odaim marasin na skelim i mas kism gutpela glasim na mekim em i wok.

Marasin em bikpela samting long laip bilong ol pipel bilong Papua Niugini. Marasin i mas hariap i go long ol haus sik, helt senta na ed pos. Dispela hevi, em i bikpela samting na inap bagarapim plenti laip bilong ol pipel.

Hevi bilong marasin i stap long nus bilong Helt Minista, Mista Pep. Em i mas tokim Sekretri bilong em Dokta Mann long hariap long stretim. Ol pipel bilong PNG i no wetim kofin bokis, ol i laikim marasin.

**Mama Lo bilong Heven na graun God yet putim**

- 1. Yupela i mas bihainim mi (God) wanpela tasol. Yupela i noken bihainim ol giaman god.
- 2. Yupela i noken wokim wanpela giaman god. Na yupela i noken wokim piksa bilong wanpela samting i stap long heven o i stap long graun o insait long wara i stap aninit long graun. Yupela i noken brukim skru long wanpela giaman god o piksa na lotuim em, long wanem mi Bikpela mi God bilong yupela na mi no inap larim wanpela giaman god i senisim mi nogat tru.

3. Yupela i noken kolim nating nem bilong mi God Bikpela bilong yupela long wanem bai mi mekim save long ol manmeri i kolim nating nem bilong mi God Bikpela.

4. Yupela i mas tingim gut de Sabat na mak makim olsem de bilong mi God Bikpela. Yupela i gat 6-pela de bilong mekim wok insait long wanpela wik.

Tasol de namba 7 em i bilong mi God Bikpela bilong yupela em i de bilong malolo na long de Sabet yupela i no ken mekim wok.



**Ol prinsipel bilong gutpela lida**  
wantaim  
Evangelist  
**OHARE JABERE**

- 5. Yupela i mas aninit long papamama bilong yupela na bihainim tok bilong ol sapos yupela i mekim olsem bai yupela i no inap dai kwik. Nogat bai yupela i ken stap long taim long dispela graun mi God Bikpela bilong yupela mi laik givim long yupela.
- 6. Yupela i noken kilim i dai ol arapela manmeri.
- 7. Yupela o marit yupela i no ken mekim pasin pamuk.
- 8. Yupela i noken stil.
- 9. Yupela i noken giaman na kotim nating ol arapela manmeri.
- 10. Yupela i noken mangalim haus bilong arapela man. Na yupela i no ken algris long meri bilong arapela man na

yupela i no ken mangalim wokboi o wokmeri bilong en o olgeta arapela samting bilong em tu.

Long Papua Niugini i gat planti manmeri i tingting planti na i laik save wanem kain man o meri i mas i kamap Lida na gutpela Lida bilong yumi. Na long Sios tu, ol kristen i laik painim ol gutpela Lida bilong strongim sios. Long Baibel, Bikpela Jisas Kraus i tok yumi mas was gut bai yumi makim ol gutpela manmeri tasol i kamap Lida.

Yu kamap Lida, yu mas bihainim Mama Lo bilong God. Em yu gutpela Lida. Tasol yu no bihainim Mama Lo bilong God em yu man bilong korapsen. Exodus 20:1-17

**WANTOK**

Published Weekly, Wednesday, for Word Publishing Company, Ltd.

P.O. Box 1982, Boroko, NCD

Papua New Guinea

Telephone: 325 2500

Fax: 325 2579

Email: word@global.net.pg

Pe bilong wanpela yia  
52 niuspepa

<b>Ples:</b>	<b>Air:</b>
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

General Manager  
Justin Hansu Kil

Editor  
Neville Choi

Published by Justin  
Hansu Kil, MBE of  
Section 58, Allotment 3,  
Office 2, Waigani Drive.

Word Publishing Company Limited is owned by the four major churches of Papua New Guinea - Catholics 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



**PASIFIK NIUS**

Cook Islands:

**Tok lukaut long pis i ken kilim dai man tu**

BIKPELA tok lukaut i go aut long ol manmeri long Cook Ailians olsem ol i ken kisim wanpela sik posin i stap insait long mit bilong ciguatera pis.

Ol dokta bilong ol animal long Ester Honey Faundesen i luksave olsem ol i wok long givim marasin inap long samting olsem 15-pela dok na pusi long wan wan de we bipo ol i save stretim tupela o tripela tasol long wanpela de.

Dispela kain pis posin i no save bagarapim ol anima tasol na i ken bagarapim ol man tu.

Ministri bilong solwara risos i karimaut wanpela wok painim long ol pipel husat i bin kisim bagarap long dispela pis namel long 1989 na 1996 na painim olsem namba bilong ol i go antap tru long mak bilong 150 i go inap long 300 long 1996.

Ciguatera posin i save kamap bihain long ol manmeri i kaikai rip pis i karim ol dispela binatang ol i kolim cigutoxins.

Koro Romea, Ekting Dairekta bilong solwara na graun fiseris i tok olsem ol manmeri i go painim pis i noken go long Titikaveka ples long wanem ol ripot long dispela kain posin i kamap i kam long dispela hap.

Kamap na groa bilong ciguatera toxin o posin i stap insait long wanpela hap rip tasol.

Wok glasim i painimaut olsem ciguatera i kamap long wanpela maikro alga ol i kolim Gambierdiscus toxicus we i save stap insait long rip.

Dispela posin i save stat wantaim ol liklik rip pis na bihain i save go kamap long man taim man i kilim na kaikai ol dispela rip pis.

Yu no inap long kilim ciguatoxin long taim bilong kuk, putim long bokis ais o lusim i drai.

Solwara ministri i save glasim na sekim Rarotonga lagun long dispela ciguatera algae olsem na pablik i mas save long ol ples we ol i ken painim birua long en.

Mista Romea i tok i gat planti kain as long dispela bikpela hap mak bilong ciguatoxin long Rarotonga.

Ol dispela rot i karamapim ol bikpela hap rip i bruk long taim bilong bikpela raun win; taim wara i go hot moa; planti nupela gris i go insait long wara (olsem taim ol pipia na pekpek na arapela samting olsem marasin bilong graun) i go daun stret long solwara.

Sampela han mak bilong dispela posin em pilim trauf, pekpek wara, trauf, het i pen, masol i pen, skin i paia, bun i slek na skin i sikirap em sampela tasol.

Pasifik:

**Karim klinpela wara i go long Pasifik**

WANPELA man Fiji husat i save mekim ol nupela kain samting o long tok inglis ol i save kolim ol dispela kain man 'inventat' i mekim wanpela kain masin we i ken givim ol pipel long Pasifik na wol wanpela isi rot long kisim klinpela wara bilong dring.

Radio Australia i ripot olsem 'Watergenie bilong Ram Karan em i wanpela paiap wantaim wanpela bikpela ambrela antap long en.

Ambrela i save op long taim bilong ren long holim wara, na bihain em yet i save pas taim ren i pinis.

Mista Karan i tok dispela masin em bai ol i ken mekim planti long tupela mun antap.

Em i tok ol risot long Fiji we ol i save sot long pres wara i wok long lukluk long baim dispela masin em i mekim.

"Mi lukim bikpela wok bilong dispela masin long ol kain kain hap bilong wol. Na long Australia tu," em i tok.

"Long planti hap we ol i save sot long wara o ol i nogat gutpela wara bilong dring, dispela masin bai halivim ol long holim wara i kam daun stret long skai."

Fiji:

**Man Fiji kamap spesol UNAIDS mausman**

YUNAITET Nesens Progrem long HIV/AIDS (UNAIDS) i makim spika bilong Fiji Haus ov Representativ, Ratu Epeli Nailatikau olsem Spesol Mausman bilong Pasifik.


Ratu Epeli i gat luksave long olgeta hap long Pasifik bihain long longpela wok em i mekim long Fiji na insait long rijen.

UNAIDS i tok hat wok bilong Ratu Epeli long strongim wok aweanes long hevi bilong HIV long ol liklik ailan kantri i mekim i kamap namba wan bilong holim dispela wok.

Em i bin save mekim strongpela toktok long pasin bilong yusim kondom. Bipo em i bin save makim maus bilong UNAIDS na em i bin wok long strongim ol hevi bilong ol pikinini na ol yangpela.


Long mun Oktoba 2004 em i bin holim na siaman bilong Namba wan Konfrens bilong ol Pasifik Palamentenen long "Wok bilong ol Pasifik Palamen Mema long pait egensim HIV/AIDS" i bin kamap long Suva.

Nau yet em i sindaun olsem Siaman bilong Pasifik Palamenten Asembli long Populesen na Dvelopmen.



**Holim strong...**

**Ol pasindia long India i hangapim strong long sait bilong wanpela tren i go long siti Patria long India. Dispela kain pasin i save kamap olgeta taim long wanem namba bilong ol manmeri long India i wok long groa kwiktaim tru.**




**Haitim Pes...**

**Wanpela pait man bilong wanpela grup ol i kolim al-Aqsa matir brigid long siti Nablus long Wes Bank long Gaza Strip long Palestain i haitim pes bilong em. Presiden bilong Palestain, Mahmoud Abbas i kisim wanbel long ol paitman na ol arapela lain husat i bosim Gaza Strip long stopim pait.**



**Kros long bagarapim buk santu**

**Wanpela paitman bilong Palestain i pait long Jihat muvmen bilong Islam i holim Koran, buk santu bilong Islam na mas long refuji kem bilong Not Gaza Strip. Em wantaim ol arapela wan paitman bilong em i bin wokabaut long siti Jabally bihain long ol sampela sut toktok i kamap olsem ol soldia bilong Israel i bin brukim wanpela buk Koran. Tasol ol opisa bilong wanpela haus kalabus long Israel i tok ol i bin sekim ol gat bilong ol na nogat wanpela kain samting olsem i bin kamap. Ol Palestain manmeri i bin belhat tru taim ol i harim dispela sut toktok olsem wanpela gat long Megiddo haus kalabus i bin mekim olsem.**




**Givim marasin...**

**Wanpela man Thailand we ol i save kolim ol ol mahout o man bilong skulim elefant i stretim bus marasin bilong putim long lek bilong Malai, wanpela lapun elefant i gat 98 kris-mas. Malai i bin brukim lek bilong em bihain long em i brukim lek bilong em taim em i pait wantaim wanpela arapela elefant.**



WOL NIUS WOL NIUS WOL NIUS




WOL NIUS WOL NIUS WOL NIUS



**Pulap kapsait**

Dispela man Vietnam i karim ol pato bilong em i go long Ha Vy holsef kakaruk na pato maket long Ha Tay provins long noten Vietnam. Bihain long sik bilong pisin i bin kamap bikpela na kilim planti manmeri long Esia, Wol Helt Ogenaisesen i tok ol nupela sik bilong pisin i kamap long Vietnam long dispela yia i wok long senis we em i ken kalap i go long ol man. REUTERS/Kham



**Kar o bot?**

Tupela wantaim. Dispela em i wanpela teksa bilong solwara long kantri Cuba. Ol refuji manmeri i bin ronawe lusim kantri bilong ol insait long dispela teksa bot. Ol wara polis bilong Amerika i bin holim 13 Cuba manmeri i stap insait. REUTERS/Reuters Tv

**Meri o wanem samting?**

Andrei Kudrin, wanpela atis bilong kantri Yukrein (Ukraine) i bin mekim dispela meri long wesana tasol. Em i mekim long wanpela bikpela resis long mekim ol kain kain samting long wesana we i kamap long taun Haifa long Israel. Dispela resis i pulim ol saveman bilong mekim samting long wesana i kam long olgeta hap long wol. REUTERS/Gil Cohen magen



**Sindaun gut, ol kisim piksa ya**

Fopela skwirel monki i sindaun antap long wanpela diwai insait long banis bilong ol long Hellabrunn Zoo o ples bilong holim ol animal long siti Munich long kantri Jemeni (Germany). REUTERS/Michaela Rehle



**I no tang ya!**

Dispela samting ol i kolim kamilion em i wanpela kain palai we i gat longpela tang tru we em i save tromoi long holim pasim ol liklik nat nat bilong kaikai. Em i ken senisim kala bilong skin bilong em long haitim em yet bihainim wanem kain hap em i wokabaut long en. REUTERS/David Gray



## MINISTRI BILONG ENVAIRONMEN NA KONSAVESEN

### OPIS BILONG MINISTA

#### WOL ENVAIRONMEN DE TOKTOK I KAM LONG

HON. WILLIAM DUMA, LLB LLM, MP  
MINISTA BILONG ENVAIRONMEN NA KONSAVESEN

# TOK LUKSAVE

Rt Honourable Sir Michael T. Somare, Prais Minista bilong Papua Niugini, Oi bikman na meri, Dokta Wari Iamo, Dokta Joseph Pagello, Alex Lee, Siaman bilong Fiseris - Bamake Rumbam, Prinsipal na Wok manmeri bilong Pot Mosbi Nesenel Hai Skul, Oi sumatin, oi man na oi meri.

## BIKPELA TOKTOK

Mi amamas olsem Minista i bosim Envaironmen na Konsavesen long givim luksave na makim dispela de, Wol Envaironmen De (WED), we i bin kamap long Yunaitet Nesens Jenerel Asemli long 1972. I gat bilip olsem dispela de bai stap long as bilong opim ai bilong wol long envaironmen.

Tete, WED em oi manmeri long moa long 100 kantri i save givim luksave long en olgeta yia long namba 5 de bilong mun Jun na em i wanpela long namba wan tripela bikpela de bilong Yunaitet Nesens wantaim Intanesenel Meri De na Humen Raits De.

Oi wok plening i bin kamap pastaim long dispela de na i go het long dispela de nau i karamapim planti samting. Wol Envaironmen De em i taim bilong "pipel" wantaim oi kain kain samting olsem oi strit rali o wok aweanes, oi wilwil pareit, oi grin konset, resis long raitim stori insait long oi skul, planim diwai wok na wok bilong klinim ples.

Wol Envaironmen De em i wanpela bikpela samting bilong midia tu, we i mas strongim bilip bilong oi nius manmeri long olgeta hap long wol na long PNG tu long raitim nius na ripot long oi bikpela stori bilong envaironmen. Em i mas wanpela de bilong lukim samting long ai stret, wantaim oi TV program o so, oi potu eksibisen na posta displei na i mas taim bilong strongim save bilong oi lain husat i save laik sindaun long oi bikpela kibung.

WED i save kirapim wok long politiks. Oi lokol na rijinel opisa, Hetman bilong Stet na Gavman na tu Minista bilong oi envaironmen i save givim bikpela toktok long lukautim mama graun. Olsem long 1994, taim Presiden bilong Filipins, Fidel Ramos i singaut long olgeta Filipino long stopim wok long belo taim long June 5 long "tingim klin, tingting grin na kirapim skin long bekim dinau bilong eneji mipela i kisim long envaironmen."

Oi bikpela tok promis tu i save kamap we i save kirapim wok bilong oi gavman straksa we i save sut long menesmen bilong envaironmen na ikonmik plening. WED i givim sans bilong oi kantri long sainim o givim luksave long oi bikpela intanesenel konvensen o loa.

Long wankain taim, mi, olsem Minista i bosim Envaironmen na Konsavesen bilong kantri bilong yumi PNG, i laik singaut long olgeta manmeri hia long stop na tingting klin, tingting grin na amamasim dispela naispela envaironmen hia we i nogat samting i bagarap. Mipela i mas lukautim dispela envaironmen gut tru bilong oi pikinini bilong yumi long bihain taim.

### OL PNG WOL ENVAIRONMEN DE PROGEM

PNG aninit long Dipatmen na Ministri bilong Envaironmen na Konsavesen i wok long mekim wok long givim luksave na makim dispela bikpela envaironmen program. Dipatmen na Ministri i go pas long oi nesenel program aninit long lukaut bilong Wol Envaironmen De Komiti we i gat oi mausman bilong oi arapela lain dipatmen na opis.

Dispela selebresen i kamap long wan wan oi skul insait long NCD na oi ples i stap klostu. Sampela long oi em:

- |                          |      |
|--------------------------|------|
| 1. Gordon Sekenderi Skul | 1997 |
| 2. Fisherman Ailan       | 1998 |

- |                                  |      |
|----------------------------------|------|
| 3. Gerehu Sekenderi              | 1999 |
| 4. UPNG                          | 2000 |
| 5. Lele Firu Viles, Galp provins | 2001 |
| 6. Sogeri Nesenel Hai Skul       | 2002 |
| 7. Nesenel Museum na At Galeri   | 2003 |
| 8. Tubuseria                     | 2004 |

Long Wol Envaironmen De lonsing long Tubuseria Ples las yia, Dipatmen bilong mi i lonsim wanpela skul diwai neseri program, we oi sumatin yet i skul long neseri na planim diwai.

Dispela program i bihainim program bilong Nesenel Gavman long mekim olgeta maunten i stap klostu i mas grin wantaim diwai na bus.

Dispela tupela program i bihainim oi arapela program nabaut long wol long mekim oi siti i mas kamap grin.

Oi arapela Dipatmen program o projek we i bung wantaim dispela intanesenel wok bilong menesim gut oi siti i karamapim:

- Polisi bilong plastik
- POPS
- Klaimet Senis

Na tete em i namba 32 krismas bilong Wol Envaironmen De Selebresen. Long tripela mun antap, em bai tripela ten krismas nau mipela i stap indipenden.

Em i bikpela ona bilong mi tete olsem Minista i bosim Envaironmen na Konsavesen long tokaut na givim tok promis long senisim nem Moltaka Wailaip Senksueri long NCD i go long "Sir Michael Thomas Somare Wailaip Senksueri bilong Papua Niugini". Dispela em i bikpela ona na luksave long lidasip wok Prais Minista bilong yumi i mekim long go pas long sanapim RENFORES KOLISIN long raitim bek envaironmen triti long Klaimet bihainim Kyoto Protokol. Prais Minista bilong yumi i soim bikpela laik long lukautim envaironmen na em i save givim bikpela sapot long taim em i kamap namba wan Prais Minista bilong dispela kantri na i go yet tete.


Dipatmen na Ministri bilong mi bai karimaut wok stretim long luksave long dispela nem aninit long Nesenel Eksekutiv Kaunsol.

Long pinisim tok, mi laik kisim dispela sans bilong givim luksave na tok tenkyu long oi indastri, oi kain kain NGO Grup na oi arapela ogenaisesen na ples komyniti insait long kantri husat i givim taim na hatwok bilong oi long lukautim graun, bus na solwara bilong yumi.

Mipela olgeta i mas amamas long envaironmen bilong yumi na halivim long lukautim i stap klin na grin bilong yumi yet na tu bilong oi lain tumbuna bilong yumi long bihain taim.

Tenkyu na God i Blesim Papua Niugini.

Hon. William Duma, LLB, LLM, MP  
Minista



**ADDRESS BY THE PRIME MINISTER  
THE RT HON SIR MICHAEL T. SOMARE GCMG CH K St.  
ON THE OCCASION OF WORLD ENVIRONMENT DAY  
AT THE PORT MORESBY NATIONAL HIGH SCHOOL,  
FRIDAY JUNE 03, 2005**

### Acknowledgements

I thank the Minister for Environment and Conservation, Hon. William Duma and your Department for the honour of asking me to give the KEYNOTE ADDRESS at today's celebration of World Environment Day.

It gives me great pleasure to speak about this very important subject, the environment - especially to young audience. You are the ones that will use the information that you receive today to make contentious contributions and choices not only for PNG but also for the planet, which we live and share with the rest of the humanity.

I thus extend my thanks to the Headmistress of the Port Moresby National High School, your staff and students for organizing with the Department this occasion to celebrate the World Environment Day.

Educators play a pivotal role in making our young people fully aware about the importance of our fragile environment and the principles of sustainable development; of how we can prudently manage our rich and diverse natural resources to achieve our development goals. We must plan if we want to preserve our environment while developing and progressing as a nation.

We are a fortunate country to have both renewable resources like forest resources; agriculture resources; fisheries and marine products; abundant land and water resources; animals of all species and clean seas. We also have the non-renewable resources like mineral gas and petroleum.

We are the envy of many nations who do not have the abundance of natural resources that we have. But in order for us to maintain this abundance we must manage our resources wisely through proper planning.

We must as a nation play our part

in taking care of our planet. The theme this year for World Environment Day is 'Green Cities: Plan for the Planet!'

When we think of cities we don't envisage them as green. The common images we conjure up in our minds are overcrowded streets with cars, people, and noise and air pollution. We pay little attention to our green areas in the city that are so important for the quality of air that we breathe everyday. While developing our urban and rural areas we must not forget the importance of the environment and planet in our planning.

The cost of our development must not be to the detriment of the environment. While PNG does not contribute a large per cent to the global climate change we have our own peculiar environmental concerns that we must take seriously and address.

Both the Government and the community have a role to play in preservation and conservation of our environment.

You may have read that I have been spearheading the dialogue on carbon trading under the UN Environmental Treaty, the Kyoto Protocol. At the moment the Kyoto Protocol only looks at compensating the reduction of carbon emissions by industries in developed nations but does not take into consideration the natural reduction of carbon emissions by rainforests. PNG is important in this regard because we are among the largest rainforest nations in the world.

This government is doing its best to strike a balance where we use these resources sustainably to fulfill our role of bringing about development and providing improved services to our people.

At the same time we also want our people from isolated but resource-rich area to benefit from the development and utilization of their natural resources like land, minerals,

forests, seas, etc. they must in exchange for their resources get access to roads, bridges, schools and health facilities in their communities.

As in other developing nations, many of our people live in rural communities and yearn for access to roads, better services in health, education and improved living standards and conditions. To generate sufficient revenue to provide these essential services the government is pushing certain projects like the Queensland gas pipeline and the development of the Nickel cobalt mine in Madang; fish loining and canning industries and other downstream processing.

But all these developments come at a cost. These costs can be social as well as environmental.

As a government, our responsibility is to monitor population growth and urbanisation. Both these phenomena impact on the environment. With increases in population we need increased access to services such as water supply, electricity, proper sewage and waste disposal systems.

While we are fortunate in PNG that we have vast water resources, we are still experiencing waterborne diseases occurring frequently in our settlements and villages where populations have increased rapidly in recent years.

The government must also ensure that emissions from fossil fuels do not become major hazards by enforcing regulations on motor vehicle owners. We must also look at alternatives to electrification instead of the conventional fossil fuel to power generator that add significantly to air pollution.

While the government has a great role to play in policy and legislation on the preservation and conservation of the environment, every person in the community also has a role to play. As I have mentioned earlier, we contribute very little to

the global climate change but we have our own environmental problems that are of real concern.

We have a beautiful country but wherever you look around in towns you see plastic bags, red betel nut stains and graffiti. We take for granted our surroundings and environment. To plan and prepare for a better future we must get rid of some of these bad habits. We must change the attitude that it is the concern of the city council only. This is our country and we must feel responsible for its health and wellbeing.

It is also the responsibility of the community to ensure that bush fires are not lit up during dry season. Papua New Guineans are prone to respiratory illnesses and air pollution from fire affects and health of everyone in the community.

Last but not the least, we all need oxygen to breathe. Trees provide that essential ingredient. While many of our people still use wood to cook, it is important to also replace the trees that you are chopping down. Trees release oxygen and absorb the carbon dioxide that is in the air - giving us cleaner air to breathe.

We all have our part to play in the preservation and conservation of the environment. Nature has given so much to us and we must give back to her by looking after our environment.

In order to achieve this balance the community must work together. We should not leave the issue of environment for just the government to resolve. Our universities, research institutions should support the initiative to save our planet and contribute towards ideas and alternatives for better planning especially in our urban centres.

Finally let's work together to improve the environment in which we live by developing good habits. Thank you. Happy Environment Day.



# PAPUA NIUGINI FORES ATORITI NESENEL FORES BOD

## FORESTRI (AMENMEN) BIL 2005

### TOK I GO PAS

1. Lông toksave long ol Memba bilong Palamen na pablik long dispela Forestri (Amenmen) Bil 2005;
2. Long tok klia long sampela hap bilong dispela Bil long stretim ol sut toktok i kam long PNG Iko Forestri Forum.

### STORI BILONG EM

- Stat long mun Jun 1992, 4-pela bikpela senis i kamap insait long Forestri Ekt, 1991.
- Las bikpela senis i bin kamap long 2000.
- Forestri (Amenmen) Bil 2005 em i namba 5 senis.
- Long mun Mas 2003, gavman i bin karimaut wanpela independen rivi o wok lukluk bek long ol forestri projek nau i ron yet.
- Kaikai bilong dispela wok rivi i go pinis long Nesenel Eksekutiv Kaunsol (NEC) long mun Jun 2003.
- Bihain long NEC i glasim ol dispela samting rivi i painim, insait long NEC Disisen 89/2003.  
Em i tokim PNG Fores Atoriti long glasim bek Forestri Ekt, 1991 (wantaim ol senis) na painim rot long strongim wok gavanens insait long Seksen 137, Rejistresen, Makim bilong Menesing Dairekta; Ol Probiti Stendat na ol arapela.
- Nesenel Fores Bod long kibung namba 101 long namba 25 de bilong mun Februari 2004 i skelim ol disisen bilong NEC na makim wanpela komiti bilong Bod (wantaim Iko Forestri Forum) long karimaut wok rivi na mekim ol senis.
- Bod i bin skelim na tok orait long ol nupela senis long kibung namba 102 long Jun 17 2004. Bihain long dispela ol toksave long minista.
- Atoni Jenerel i kliaim (setifiket ov nesesity) long mun Ogas 2004 bai ol senis i go long NEC.
- Tasol bihain long Wol Benk na Gavman i paitim toktok i go i kam, ol i pilim olsem ol narapela senis mas kamap tu.
- Long mun Februari 2005, Bod i luksave long ol senis na givim tok orait long Minista go kisim tok orait bilong NEC. Minista i skelim ol senis ya na yusim pawa bilong em aninit long mama lo na i mekim senis long Seksen 10 (Fores Bod Membasip).
- NEC i oraitim ol senis long Epril 2005 kibung bilong ol long karim go long Palamen.
- Dispela Bil i kisim tok klia bilong Atoni Jenerel na Fes Lejisletiv Kaunsol.

**Bilong Wanem na Ekt I Mas Senis?**

- Forestri Ekt, 1991 nau i wok inap 10-pela krismas olgeta.
- Namel long dispela taim; PNG Fores Atoriti i bungim ol etministretiv na ligel hevi o ol hevi long sait bilong karimaut sampela hap long dispela Ekt.
- Olsem na sampela hap insait long Ekt we i mas i gat senis long em i karamapim:
- Wok bilong Atoriti (Seksen 7);
- Membasip bilong Bod (Seksen 10);
- Sanapim bilong Independen Bod Seketeriet (Seksen 20A)
- Makim bilong Menesing Dairekta (Seksen 34);
- Nesenel Fores Plen (Seksen 47)
- Provinsel Fores Plen (Seksen 49);
- Kisim Tok Orait bilong ol Papa graun long Fores Menesmen Agrimen (FMA) (Seksen 57)
- Toktok wantaim ol tru tru Papa graun na Provinsel Gavman (Seksen 59)
- Ol Timba Atoriti (Seksen 87); na
- Ol Sevings bilong ol Permit I Stap Nau, na ol arapela... (Seksen 137).

### BIL NA OL BIKPELA TOKTOK

- Notis bilong Bil i bin kamap long Palamen long namba 3 de bilong mun Me, 2005.
- PNG Iko-Forestri Forum i mekim toktok long en na kamautim ol dispela hevi, na bekim bilong gavman i olsem:

**Namba 1 hevi** - Dispela bil i rausim pawa bilong ol as ples manmeri, ol Memba bilong Palamen bilong ol na ol Provinsel Gavman long paitim toktok long wanem loging o timba kampani bai kisim permit;

**Bekim bilong gavman:** Bil i no rausim ol raits i stap insait long Seksen 59. Ol dispela rait i kam aninit long sabseksen 3 bilong Seksen 57.

**Namba 2 hevi** - Em bai putim bek wanpela mausman bilong ol loging kampani bilong arapela kantri i go long Nesenel Fores Bod.

**Bekim:** PNG Semba ov Komes i stap long Bod na ol i makim Fores Industris Asosiesen (FIA) Inc. olsem mausman bilong em. Olsem wanpela bikpela stekholda insait long industri, em i stretpela pasin long ol i stap long Bod. FIA i makim ol lokol kampani na ol kampani bilong arapela kantri i stap insait long kantri. Presiden bilong FIA em i wanpela man PNG.

**Namba 3 hevi** - Em bai givim Gavman bikpela kontrol long Bod.

**Bekim:** Senis i apim namba bilong Bod membasip i go long 10. Faivpela memba i makim

ol gavman ejensi, na narapela 5-pela memba i makim ol non gavman ejensi. Dispela bai strongim gutpela wok gavanens. Olgeta memba i gat wankain rait long vot.

**Namba 4 hevi** - Olgeta timba permit we i no bihainim lo na i no inap long kamapim gutpela kaikai we ol i bin kisim pastaim long 1991 Forestri Ekt bai ol i skruim i go yet.

**Bekim:** Olgeta timba permit i go aut pastaim long Forestri Ekt 1991 i bihainim lo. Ol senis long Seksen 137 bilong Bil bai larim ol dispela timba permit long skruim wok bilong ol tasol ol mas bihainim mak bilong kamapim ol komyuniti na ikonmik wok we lo i stap nau i no givim rot long skruim ol dispela permit.

**Namba 5 hevi** - Rausim NGO Mausman long Nesenel Fores Bod.

**Bekim:** Sia bilong PNG Iko-Forestri Forum bai senis wantaim wanpela mausman insait long komyuniti husat i save mekim wok forestry. PNG Iko-Forestri Forum i ken sindaun long dispela sia yet.

### TOKTOK BILONG PINISIM:

Ol senis i bihainim mama lo. Bihainim spirit bilong mama lo, Fores Ekt i sanap long tupela bikpela pawa bilong paitim toktok na mekim disisen we i stap wantaim ol grup manmeri long Nesenel Fores Bod na ol Provinsel Fores Menesmen Komiti (PFMC). Rait bilong ol papa graun na ol provinsel maus man nau bai strong. Ol PFMC nau bai mas soim klia olgeta samting ol i wokim insait long etministresen bilong Fores Ekt. Ol senis i no givim Minista bikpela pawa long mekim disien o daunim ol disisen bilong ol PFMC o bilong Bod.

I nogat as long pret olsem Iko-Forestri Forum i wok long tok. Ol dispela senis i kamap long moa long tupela yia na dispela i givim sans long olgeta manmeri o grup i wok forestri long givim tingting bilong ol - we ol i mekim pinis.

Ol dispela senis bai strongim wok bilong PNG Fores Atoriti long lukautim ol nupela forestri projek na ol dispela i stap pinis.

**Tok orait i kam long Nesenel Fores Bod:**

  
VALENTINE KAMBORI  
CHAIRMAN  
NATIONAL FOREST BOARD.

# Buka studio makim Otonomes Gavman wantaim ol nupela rilis

WANPELA nupela pes long buk bilong ol pipel bilong Bogenvil i bin kamap wantaim sanapim bilong Otonomes Gavman bilong ol aste we Pralim Minista Sir Michael Somare na planti long ol minista bilong em na ol nupela memba bilong nupela Bogenvil Palamen i bin luksave long en.

Nà taim bikpela de i bin kamap long Hahela Katolik Misin we i stap 500 mita samting long nupela Bogenvil Palamen haus long Kubu, wanpela arapela selebresen i bin kamap long sait bilong musik long Buka ailan.

Tambolema Rekoding Studios i makim rilis bilong 8-pela nupela musik albam long makim kamap bilong nupela Bogenvil Otonomes Gavman. Na namel long dispela 8-pela i gat wanpela albam ol i kolim Goodbye Bougainville em Jamm Crew bilong Solos long Buka Ailan yet i bin rekodim.

Jamm Crew em i wanpela studio grup em kibot man na komposa Thomas Ruhin na ol poroman na famili bilong em long Gagan long Solos eria husat i givim save bilong ol long pinisim dispela projek.

Nem bilong albam i kam long wanpela singsing i gat wankain nem we i tok PNG i wok long brukim olgeta han bilong em long ailan provins we i gat 17 krismas pait na i kamapim bikpela hevi long ol pipel na ailan bilong Bogenvil na Buka.

Dispela singsing, we Thomas Ruhin yet i raitim i go olsem "Pikinini bilong mi, taim i kamap long lusim yu go na yu sanap long lek bilong yu yet, mi luksave long hevi yu karim na amamas long ol samting yu skulim mi na mi amamas long lusim yu go. Gutbai Bogenvil."

Goodbye Bougainville em ol i makim bai i wanpela strongpela singsing long Bogenvil yet na bai i sutim bel bilong ol pipel husat i amamas long dispela nupela divelopmen we i lukim nau fri Bogenvil rijen na lusim gavman bilong em long go pas long ol pipel.

Eksekutiv Produsa bilong Tambolema Studios, Aloysius Laukai i tokim Glasim Musik olsem 8-pela ben na musik atis husat i wok long rilisim ol rekoding em olgeta i rekodim namba wan albam bilong ol na ol i amamas tru olsem albam bilong ol bai i kamaut wantaim bikpela de bilong Bogenvil.

Laukai i tok ol arapela albam bai kamap em ol solo albam bilong Thomas Ruhin, Wakunai long



Sentral Bogenvil i givim nupela rekoding i kam long Robert Sipo na Moses Kewokewo bilong Nagovis, Saut Bogenvil em i rilisim solo albam bilong em tu.

Ol arapela grup em Lost Angels bilong Nagovis, Tepure Telani Band bilong Mortlock Ailans, Suagu Stringben bilong Tinputz, tasol wanpela gospel tasol i kam long Charlie Tukana bilong Buka.

**Goodbye Bougainville em ol i makim bai i wanpela strongpela singsing long Bogenvil yet na bai i sutim bel bilong ol pipel husat i amamas long dispela nupela divelopmen we i lukim nau fri Bogenvil rijen na lusim gavman bilong em long go pas long ol pipel.**

Em i gutpela tru long lukim wanpela ben bilong ol liklik ailan i redi long mekim nem long wanem ol dispela ailan i stap longwe tru na ol i no save kisim planti sevis.

Long dispeal as tasol na ol ben bilong Motlok na Tasman ailan na ol arapela liklik ailan i save painim hat tru long brukim PNG musik maket.

"Mipela i amamas tasol long halivim ol ben bilong ol dispela ailan long kam aut long pablik wantaim musik bilong ol," Laukai i tok. "Na i gutpela tru olsem hula musik bilong ol Polinisia bilong Bogenvil nau i kamap long ples klia."

Laukai i bin raun i go long Motlok Ailans long mun Mas long dispela yia, tasol bot MV Sankamap i bin

painim birua na em i bin stap long Motlok inap long 3-pela wik olgeta.

Em i no sindaun nating. Em i sanapim mobail rekoding studio bilong em na mekim sampela rekoding bilong 8-pela nupela ben.

"Mi rekodim sampela gutpela musik tru long Motlok Ailans na nau mi wok long stretim ol rekoding hia long Tambolema Studios bai mi rilisim long ol mun antap."

Laukai i tok em bai lukluk strong long promotim stringben musik long tripela mun bihain.

Em i tok ol string ben musik bilong Bogenvil long wanem ol manmeri i wok long lusim tingting long en.

"Dispela hevi nau em mi laik lukluk long en long promotim string ben musik na mipela i stat wantaim dispela Suagu String ben na Tepure Telani Hula grup bilong Motlok."

TTL Studios bai go het yet long opim rot bilong stringben musik long dispela yia na bihain bai ol i lukluk long ol flut o win paip. Bogenvil i gat ol mambu ben, pen paip musik na Tsigul we olgeta yet i ken bung wantaim ol musik masin bilong tete long kamapim nupela pairap bilong ol Bogenvil ben.

"Mipela i wok nau long promotim ol Pen Paips na Mambu Ben long Tinputz Kakao Festival Stringben Resis long 2006. Tambolema Studios bai wanpela bikpela bisnis long sponsaim dispela resis," Laukai i tok.

Studio bilong em i bin statim ol bikpela wok long dispela yia tasol taim em i rilisim ol namba wan lokal kaset na CD em ol i mekim bilong Solomon Ailans maket na Laukai bai salim ol nupela rilis i go long Gizo na ol arapela maket long Solomon Ailans.

"Mi bin sanapim Tambolema Studio bikos mi lukim i bin i gat nid long halivim ol yut bilong Bogenvil husat i gat planti na bikpela save long musik tasol ol i nogat wei long rekodim musik biong ol, na tu ol i no save long wanem rot long promotim musik bilong ol ausait long Bogenvil.

Laukai i tok ol musik atis bilong Bogenvil i save pret long prais bilong go long Mosbi na rekodim musik bilong ol wantaim ol studio long hap.



• Manki Manus ya i soim strong bilong kalsa long Niugini Ailans rijen.



• Pasin kalsa bilong Hailans rijen i bin strong tu.



• Na noken lus ting long ol Momase

## Strongim pasin kalsa

OL SUMATIN bilong Pot Mosbi Nesene! Hai Skul i bin soim stail bilong kalsa bilong wan wan ples bilong ol long bikpela Kalsa De bilong ol long wiken i go pinis.

Niusman ANDREW MOLEN i bin raun na kisim poto bilong ol sumatin i singsing na danis.




•Tepure Telani Hula ben bilong Motlok i wanpela long 8-pela albam Tambolema Studios i rilisim wantaim sanapim bilong Otonomes Bogenvil Gavman.

EMTV GAID

Table with EMTV GAID schedule for various dates including 6/16/05, 19/06/05, 20/06/05, 21/06/05, 22/06/05, and 8/06/05. Columns include time, program name, and genre.



Raun wantaim Kanage olgeta wik!!




YUMI FM NATIONAL WEEKLY HITPARADE Sarere Jun 18, 2005 Twisties i sponsa

Table with YUMI FM NATIONAL WEEKLY HITPARADE listing songs, artists, and weeks. Columns include Singing, Musik Atis, Dis Wik, and song details.

CATHOLIC RADIO 103.5 FM

Table with CATHOLIC RADIO 103.5 FM schedule for various dates including 6/16/05, 19/06/05, 20/06/05, 21/06/05, 22/06/05, and 8/06/05. Columns include time, program name, and genre.



# National Fisheries Authority

P. O. Box 2016, Pot Mosbi, Nesenel Kapitel Distrik, Papua Niugini.  
Telepon: 321 2643 Facsimile: 320 2061, Email: nfa@fisheries.gov.pg

## Pres Stetmen bilong Minista bilong Fiseris Hon. Ben Semri long namba 59 Forum Fiseris Komiti Ministeriel Kibung long Majuro, Marshall Ailans, 9 Jun 2005

Pres Stetmen bilong Minista bilong Fiseris Hon. Ben Semri long namba 59 Forum Fiseris Komiti Ministeriel Kibung long Majuro, Marshall Ailans, 9 Jun 2005

Minista bilong Fiseris, Honourable Ben Semri i tokaut long stat bilong namba 5 Forum Fiseris Komiti Ministeriel kibung i kamap long Majuro, Kapitel bilong Ripablik bilong Marshall Ailans.

Minister Semri i no bin kamap long dispela kibung long wanem palamen i bin sindaun. Tasol; em i makim PNG Hai Komisina long Solomon Ailans, His Ekselensi, Parai Tamei long makim em na Gavman bilong PNG.

Hai Komisina Tamei i go pas tu long delegesen i go long ol sab-rijinel fisers kibung - ol Pati aninit long Nauru Agrimen (PNA), Palau Agrimen na Federetet Stet of Maikronesia (FSM) Rijinel Laisensing Arensmen. PNG Delegesen em ol opisa bilong Dipatmen bilong Foren Afeas, Nesenel Fiseris Atoriti, Dipatmen bilong Atoni Jenerel na ol maus manmeri bilong PNG tuna fising industri.

Ol kampani i bin go sindaun long ol sab rijinel fiseris kibung em RD Tuna Fishing, South Seas Tuna Corporation, Fairwell Fisheries, BSJ Fishing na Western Pacific Tuna Enterprise.


Nesenel Fiseris Atoriti em i ejensi bilong gavman i lukautim wok fiseris menesmen insait long kantri na ol i bin stap long tupela sab rijinel fiseris kibung na Forum Fiseris Komiti kibung we i bin kamap long namba 31 de bilong mun Mei i go inap Jun 3, 2005 na long Jun 6 i go inap Jun 10.

Wanpela long ol bikpela toktok i bin kamap aninit long Palau Arensmen em dispela Vesel De Skim (VDS) we bai em i senisim 205 kep mak long namba bilong ol pes saines sip. VDS bai stat wok bihain long olgeta kantri i sindaun aninit long Palau Arensmen, we PNG em i wanpela long ol, i sainim MOU o Memorandum Ov Andastending. Ol VDS bai stat bihain yet long dispela yia wantaim wanpela hap taim inap long 18 mun long larim olgeta kantri long stretim ol yet. NFA i paitim toktok wantaim industri long namba 13 de bilong mun Mei 2005 wantaim

halivim bilong Forum Fiseris Ejensi. PNG i wanbel long dispela VDS. Tasol dispela bai kamap bihain long wanpela wok glasim long namba bilong ol de ol i makim bilong PNG bai inap. PNG i mekim sampela bikpela wok kamap aninit long lukaut bilong Hai Komisina Tamei long bung bilong ol FFC opisel. Bikpela toktok long kibung i sut long lukautim bilong Forum Fiseris Ejensi. Long Forum Lidas kibung long Apia, Samoa las yia, ol Pasifik lida i bin laikim ol minista long was long FFA long strongim wok akauntabiliti o lukautim gut mani long karim ol sevis i go long ol memba kantri long strongim sastenabol menesmen na developmen bilong ol fiseris na solwara risos bilong ol. Ol i laikim moa politikel wok lukaut long tuna pis bilong ol bihain long stat bilong Westen na Sentrel Pasifik Tuna

Konvensen na wok bilong ol flek stet long daunim ol lligel, Anreguletet na Anripotet (IUU) pasin bilong pulim pis hait.

FFC Ministeriel Kibung em Presiden bilong Ripablik bilong Marshall Ailans i bin opim long Jun 9, 2005 long Marshall Ailan Risot Hotel. Ol Fiseris Minista bilong 16 memba kantri ausait long Samoa, PNG, Kiribati na FSM i bin sindaun long dispela kibung. Long bikpela toktok bilong em, em i strongim singaut bilong ol Pasifik Ailan Kantri long yusim gut fiseris na ol arapela solwara risos bilong ol



bilong tete na taim bihain bilong ol.

Ol minista i paitim toktok long nupela kopret gavanens bilong FFA long traim na mekim moa wok long sait bilong stratejik plening na pulim ol liklik Pasifik ikononi i go bung wantaim wol ikononi. Ol minista i tok oraitim FFA Stratejik Plen 2020 we bai i makim wok bilong FFA i go inap long 15 yia i kam long kari-maut wok na luksave long driman bilong en.

Namba 59 FFC kibung i bin pinis long namba 10 de bilong mun Jun 2005.

Minista i tok tenkyu long Hai Komisina amei na ol gavman opisa long go long dispela kibung na givim gutpela tingting long ol kamapim`gutpela kaikai long ol dispela kibung.

**Hon. Ben Semri, MP**  
**Minista bilong Fiseris**



# Sanapim bilong Namba wan Autonomous Bougainville Gavman

## TOK AMAMAS!



Mi tok amamas long Papua Niugini na ol pipel na lida bilong Bougainville, long sanapim bilong Namba wan Sindaun bilong Haus bilong Representativ o (Haus bilong ol Mausman) bilong Autonomous Region bilong Bougainville.



Wok bilong kamapim gutpela sindaun na bel isi long Bougainville em i wanpela gutpela piksa tru bilong wol long bihainim. Yu senisim Bougainville hevi wantaim wanpela bikpela tingting long painim bel isi bilong oltaim, sekuriti na developmen.

Australia i stap wantaim yu long dispela taim bilong amamas: Mipela i sanap klostu olsem wanpela gutpela poroman bilong ol pipel bilong Papua Niugini, na wanpela strongpela sapota bilong Bougainville pis proses o wok bilong kamapim bel isi long Bougainville. Mipela i amamas long givim halivim long dispela rot bilong painim bel isi (pis proses), taim mipela i bin go pas long ol paitim tok na kibung i bin kamap long Townsville long 2001.

Mipela i amamas long wok wantaim ol wanwok bilong mipela insait long rijen aninit long Trus Monitoring Grup, Pis Monitoring Grup na Bougainville Trensisen Tim.

Mipela i soim laik bilong mipela long rot bilong painim bel isi (pis proses) aninit long eid o halivim progrem bilong mipela. Mipela i sapotim ol bikpela wok bilong strongim bek na karim developmen long Bougainville, wantaim ikonmik developmen, lo na jastis, helt na edukesen, na ol bikpela infrastraksa o wok i kamapim rot na bris.

I no long taim i go pinis mipela i soim bilip bilong mipela long lo na jastis long Bougainville taim mipela i salim ol Australia polis aninit long Enhens Koporesen Progrem.

Olsem wanpela poroman na wansolwara mipela i halivim wantaim ileksen. Australia i bin stap long Yunaitet Nesens ileksen obseva misin na givim moa long \$A1 milien long halivim wantaim ol wok redi bilong ileksen. Kaikai bilong en em wanpela gutpela ileksen we i nogat hevi i bin kamap na planti arapela kantri i managalim.

Wantaim sanapim bilong gavman long dispela wik, narapela hap bilong wanpela longpela na hatpela rot i pinis nau.



Dispela sanapim bilong gavman tu i makim stat bilong wanpela narapela wokabaut, bilong Papua Niugini na bilong Bougainville. Long sait bilong ol nupela memba bilong Autonomous Bougainville Gavman, dispela wokabaut nau i karim wantaim em planti salens long taim bihain, taim ol i go het long sanapim na karim dispela Autonomous Region bilong Bougainville i go het.

Bilong Papua Niugini Gavman, bikpela wok nau em long givim luksave na lukaut olsem Bougainville bai wok olsem wanpela otonomes gavman insait long wanpela kantri i gat kain kain manmeri na kalsa.

Gavman na pipel bilong Australia i sanap wantaim na redi long halivim yu taim yu bungim ol dispela salens i stap long taim bihain.

Bikpela tok amamas i go long yupela.

**Hon. Alexander Downer, MP**  
Australia Minista bilong Foren Afes na Tred







Rot bilong groim ol spisis diwai i save groa insait long PNG



Cocos nucifera (kokonas)

**Nem bilong en:** kokonas; kelpas  
**Ples diwai i kam long en:** Ol i ting em i kam long Saut Is Esia na Osenia. As ples bilong dispela pam i no klia. Bipo tru ol i tok em i bin go aut long ol ples i hot na nau em i save groa long olgeta hap nambis long wol wantaim ol kantri long Saut Is Esia.

**Wanem kain diwai:** Em i save groa i go inap 25 mita samting. Bikpela bilong namel bilong em i ken groa inap namel long 20 na 40 sentimita. Ol lip long ol bikpela diwai i save groa namel long 4 na 5.5 mita na longpela bilong bun bilong em i ken groa inap 1 mita o longpela moa. I gat moa long 100 lip na longpela bilong em inap long 1 mita. Meri plaua bilong diwai i stap long as bilong lip diwai na bilong man i stap long het bilong em. Ol prut bilong em i raun na longpela bilong em i save stap namel long 12 na 25 sentimita na i gat karamap we i rap na i gat planti rop long en. Planti kain kain kokonas i stap. Na i gat ol dwof o hai brid tu. Em i no save groa gut wantaim ol arapela diwai. Groa bilong kokonas bihain long em i stat long groa inap long 20 sentimita long wan wan yia.

**Ples we em i save groa:** Kokonas i save laikim ples hot i stap klostu long nambis na em i save laikim ren inap long 1500 milimita o moa long wan wan yia. Maski planti i tok em i diwai bilon nambis, em i ken groa i go inap long 1500 mita antap long mak bilong solwara. Prut bilong em i ken stap long taim insait long sol wara olsem na em i kamap long planti kain kain hap. Kokonas i save groa long ples i gat wara namel long 600 na 2500 milimita. Em i gat strong long stap inap long tripela mun long taim bilong drai. Em i save groa gut long graun i

### Bisnis bilong Groim Diwai insait long PNG - Planim diwai long ol renfores eria

gat inap wara na gris na em i save laikim graun i gat wesana long en.

**Strong bilong em:** Prut i gat kain kain wok bilong en. Yu ken yusim long mekim ol pos, sanapim banis wantaim, yu ken kaikai, dring wara bilong em, mekim banis bilong haus, basket, ol mat bilong sindaun, bros, brum, plet, spun na pok, mekim bia long en na tu yusim wel bilong em. Yu ken yusim diwai bilong em long katim timba. Ol arapela wok bilong en em ol wel na gris. Yusim olsem marasin olsem marasin bilong kilim ol snek insait long bel bilong ol pik na bul makau na long rausim win insait long bel. Yu ken yusim skin bilong kokonas long planim ol arapela plaua. Ol rop insait long skin em yu ken yusim bilong mekim ol mat na matras. Strongpela sel bilong em ol i save yusim long mekim ol henkraf. Yangpela grin kru bilong em yu ken kaikai olsem kumu.

**Birua bilong em:** Em i save groa isi isi; bikpela hat wok long rausim mit bilong prut.

**Karim na wok bilong en:** Prut bilong em namel long 45 na 120 prut long wanpela diwai long wanpela yia. Kopra - namel long 2.5 na 3.5 tan long wanpela hekta long wan wan yia. Paiawut - i no gutpela tumas tasol yu ken yusim. Em i save mekim gutpela sit bilong paia.

**Rot bilong groim:** Groim wantaim, pikinini diwai o sidling. Yu ken groim insait long neseri inap namel long 5 na 6 mun bihain long kru bilong em i groa gut. Em i ken sindaun groa long san insait long neseri.

**Sid tritmen:** Katim hul long skin bilong em. Putim insait long wara inap long tupela wik. Em bai orait inap long tupela yia.

**Menesmen:** Sapos yu givim wara long taim bilong drai, bai yu karim planti moa prut. Planim ol arapela diwai aninit long het bilong kokonas i ken apim namba bilong prut.

**Agro forestry Wok:** Yu ken groim wantaim yam, tapiok, taro, kopi na ol arapela spais. Planim wantaim banana inap long tupela yia o miksim wantaim ol prut plantesen olsem ol mango, kakao, raba, na muli samting. Ol bulmakau i ken kaikai gras insait long ol kokonas plantesen bihain long em i namel long 6 na 8 krismas. I noken moa long 2 na 3 bulmakau long wan wan hekta.

**MCCARTHY & ASSOCIATES (FORESTRY) PTY. LTD.**

**National & International Forest Consultants**

mccaf@datec.net.pg

*"Long kisim tok stia long olgeta wok diwai"*

# Monica, trupela bisnis meri

...Kamapim bisnis bihainim "longpela rot"



• Monica wantaim ol wokmanmeri bilong em. L-R. Gia Renagi, Benedict Kua, Monica, na Tukau Senai. FOTO: PAUL ZUVANI

### Paulus Tali i raitim

INSAIT long wok bisnis sampela manmeri i laki long painim mani isi o kisim gutpela skul hariap long wok bisnis, tasol planti nogat. Ol i mas mekim planti wok pastaim o wet longpela taim pastaim long ol i kirapim na ronim bisnis.

Monica Igua bilong Omo ples long Nu Ailan provins i wanpela bilong dispela ol lain manmeri husat i mas "wokbaut long longpela rot" pastaim long ol i statim bisnis.

Em i wetim taim, go long skul, bungim ol hevi bipo long em i ronim bisnis.

Nau Monica i ronim Mig Trans Limited, wanpela akaunting bisnis o bisnis bilong lukautim na skelim mani long Pot Mosbi siti.

Dispela akaunting bisnis bilong Monica i save halivim ol manmeri long kisim halivim long Intenel Revenu Komisen (IRC) na Invesmen Promosen Atoriti (IPA).

Stori bilong Monica long kamap na ronim dispela bisnis i longpela rot tru.

Em i pinisim Gret 6 long Kavieng Praimeri Skul long 1975 na bihain em i go long Madina Provinsel Hai Skul.

Namel long 1982 na 1983 em i mekim Gret 11 na 12 long Kerevat Nesanel Hai Skul long Is Nu Briten provins.

Bihain long dispela em i pinis na wok wantaim Remington olsem wanpela kuskus o klak. Em i wok

sampela taim pinis na bihain em i lusim na go wok wantaim IRC olsem akauns klak long akauns seksen bilong Komisen.

Em i wok hat inap ol i makim em olsem supavaisa bilong dinau koleksen long det menesmen seksen. Long wankain taim em i wok olsem prosekyusen klak.

Bihain long dispela em i lusim wok na go skul long Komesel Trening Koles.

Em i bin pinisim skul bilong em na em i go wok wantaim Chevron Niugini na wok olsem akaunting asisten pastaim na bihain olsem edministresen klak. Em i wok inap em i kamap olsem dispets klak.

Long planti bilong dispela ol wok em i mekim long taim em i stap wantaim Chevron em i bin lukautim ol kontrak bisnis.

Long dispela taim tu em i lukautim piul olsem JA lait na hevi helikopta disel na fiul bilong ol ka.

Em i save stap na wok long Gobe long Sauten Hailans provins na bihain long dispela em i go long Moro Rids Kem etministresen opis na wok olsem trevel klak.


Long 2000 em i ritrens na statim bisnis bilong em yet.

Em i tok em i lukim olsem i gat nid long helpim ol manmeri i save baim takis olsem na em i statim bisnis long wok olsem ejen bilong helpim ol.

Long save moa ol manmeri i ken ringim Mig Trans Limited long telepon namba 323 4588 o rait long edres PO Box 1356, Pot Mosbi, NCD.

## Cat® 'C' Series Hydraulic Excavators


305C, 307C,  
308C, 311C,  
312C, 314C,  
315C, 318C,  
320C, 322C,  
325C, 330C



*Caterpillar® 'C' Series Hydraulic Excavators incorporates innovations for improved performance and versatility.*

- **Engines and Hydraulics** - Cat® engines combine with proven hydraulics to give consistently high power and control in the field.
- **Structures** - Rugged Caterpillar® undercarriage design and proven structural manufacturing techniques assure outstanding durability in the toughest applications.
- **Operator Stations** - Operator work stations are quiet with ergonomic control placement and convenient adjustments, low lever and pedal effort, ergonomic seat design and highly efficient ventilation.
- **Serviceability** - Longer service intervals and easier maintenance results in better machine availability and lower owning and operating costs.

## Hastings Deering



PORT MORESBY  
Phone: 300 8300  
Fax: 325 0141

LAE  
Phone: 472 2355  
Fax: 472 1477

TABUBIL  
Phone: 548 9045  
Fax: 548 9155

RABAUL  
Phone: 982 1244  
Fax: 982 1129



# Radio Australia Tok Pisin News

Harim TOK PISIN long Radio Australia  
**101.9FM Port Moresby**

Yu ken harim Radio Australia  
long ol dispela Sof Wev Frikweni  
**Tok Pisin Service**  
6am - 7am : 8080; 7240(KHZ)  
7pm - 9pm : 5985; 8020; 9710; 1280(KHZ)

RADIO TOK PISIN PROGRAM  
TUNE IN: 101.9 FM

Radio Australia Tok Pisin Program - stat long mun  
Maas 2005

**MANDE**  
*Morning*  
6AM Stesen Op - Nius na Karen Afeas  
6.30AM Ol Hettain - Musik na Chat  
6.55AM Hettain na Musik  
7AM Stesen Pas

*Nait*  
7PM Stesen Op  
7.01PM Ol Hettain na Program Priviu  
7.15PM Musik na Chit-Chat  
7.30PM Nius na Karen Afeas  
8PM Hett  
8.15PM Musik  
8.30PM NUIS  
8.40PM Spots Riplei  
8.55PM Musik  
9PM Stesen Pas

**TUNDE**  
*Morning*  
6AM Stesen Op - Nius na Karen Afeas  
6.30AM Nius Hettain - Musik na Chat  
6.55AM Hettain na Musik  
7AM Stesen Pas

*Nait*  
7PM Stesen Op  
7.01PM Ol Hettain na Program Priviu  
7.15PM Musik na Chit-Chat  
7.30PM Nius na Karen Afeas  
8PM Mama Graun  
8.15PM Musik/Spots  
8.30PM NUIS  
8.40PM Hett Riplei  
8.55PM Musik  
9PM Stesen Pas

**TRINDE**  
*Morning*  
6AM Stesen Op - Nius na Karen Afeas  
6.30AM Ol Hettain - Musik na Chat  
6.55AM Hettain na Musik  
7AM Stesen Pas

*Nait*  
7PM Stesen Op  
7.01PM Ol Hettain na Program Priviu  
7.15PM Musik na Chit-Chat  
7.30PM Nius na Karen Afeas  
8PM Focus  
8.15PM Musik/Spots  
8.30PM NUIS  
8.40PM Mama Graun Riplei  
8.55PM Musik  
9PM Stesen Pas

**FONDE**  
*Morning*  
6AM Stesen Op - Nius na Karen Afeas  
6.30AM Ol Hettain - Musik na Chat  
6.55AM Hettain na Musik  
7AM Stesen Pas

*Nait*  
7PM Stesen Op  
7.01PM Ol Hettain na Program Priviu  
7.15PM Musik na Chit-Chat  
7.30PM Nius na Karen Afeas  
8PM Youth  
8.15PM Musik/Spots  
8.30PM NUIS  
8.40PM Focus Riplei  
8.55PM Musik  
9PM Stesen Pas

**FRAIDE**  
*Morning*  
6AM Stesen Op - Nius na Karen Afeas  
6.30AM Ol Hettain - Musik na Chat  
6.55AM Hettain na Musik  
7AM Stesen Pas

*Nait*  
7PM Stesen Op  
7.01PM Ol Hettain na Program Priviu  
7.15PM Musik na Chit-Chat  
7.30PM Nius na Karen Afeas  
8PM Wantok  
8.15PM Musik  
8.30PM NUIS  
8.40PM Youth Riplei  
8.55PM Musik  
9PM Stesen Pas

**SARERE**  
*Morning*  
Solwev i pas long san na long nait i save kamap 2 minit  
pastaim long wanwan aua. Bihain i gat musik na promo i  
go inap long olgeta aua na lusim FM siknet.

*Nait*  
7PM Stesen Op  
7.01PM Ol Hettain na Program Priviu  
7.15PM Musik na Chit-Chat  
7.30PM Nius / Wantok Riplei  
8PM Serah (Famil bilong Serah)  
8.15PM Musik  
8.30PM NUIS  
8.40PM Musik na Chit-Chat  
8.55PM Musik  
9PM Stesen Pas

**SANDE**  
*Morning*  
Solwev i pas long san na long nait i save kamap 2 minit  
pastaim long wanwan aua. Bihain i gat musik na promo i  
go inap long olgeta aua na lusim FM siknet.

*Nait*  
7PM Stesen Op  
7.01PM Ol Hettain na Program Priviu  
7.15PM Musik na Chit-Chat  
7.30PM Nius / Serah Riplei  
8PM Riviu  
8.30PM NUIS  
8.40PM Musik na Chit-Chat  
8.55PM Musik  
9PM Stesen Pas

## PASIFIK NA WOL NIUS

### Nupela Bogenvil Gavman holim miting

NUPELA Autonomous Gavman bilong Bougainville i holim namba wan miting bilong House of Representatives bilong em tude.



Shane McLeod i ripot olsem, dispela i kamap bihainim de bilong ol selebresen bilong makim stret nupela gavman.

De i bin stat wantaim pulim bilong Bougainville Flek long wanpela palamen haus em bai stat long liklik taim tasol na i stap ausait long provinsal kampionat, Buka.

Ol selebresen i bin tanim i go long praimer skul i stap klostu we ol polis na skul pikinini pared na tu ol tubuna dens grup i bin makim inoguresen bilong nupela gavman.

Fopela ten nupela memba bilong House of Representatives namel long ol Presiden Joseph Kabui i bin mekim tok promis long holim wok bilong ol.

Papua Niugini Praim Minista i bin mekim strongpela askim i go long ol Bogenvil pipel long sanap bihain long nupela Presiden bilong ol na mekim ol samtintg bihainim gutpela rot bilong Pis Proses.

### Polis bilong Indonesia pasim benk akaun bilong Ministri of Rilijes Afes

Ripot i kamap pinis long Indonesian Polis i pasim ol benk akaun bilong Ministri bilong Religious Affairs.

Jakarta Post i ripot olsem polis i painim maut olsem ol samtintg i no stret long menesmen bilong ol mani bilong salim ol pipel i go long Mecca.

Ripot i tok, i gat 62 milien US dolas insait long ol dispela akaun, em ministri i yusim bilong dipost moni i kam long Haj pilgrims or pipal.

Mausman bilong polis i tok, ol i bin min long holim moni em oli ino yusim long las trip i go long Mecca long wanpela akaun, tasol ol i putim igo long ol kain kain akaun, na i mekim isi long ol i

paulim dispela moni.

### Pakistan laik opim nupela rot bilong wokpren wantaim Australia

Pakistan i tok em i laik opim nupela stat bilong ol wok bung wantaim Australia.

Pakistan Presiden, Pervez Musharraf i nau raun long Australia olsem hap bilong tripela de raun, we em i bin lukim ol i sainim wanpela agrimen namel long Pakistan na Australia bilong pait agensim terrorism.

Presiden Musharraf i tok Pakistan i nidim tred na invesmen halivim i kam long Australia.

Bihain long ol toktok long Canberra, General Musharraf, i tok em i bin askim Praim Minista, John Howard i go raun lukim Pakistan.

### Biknem tisa bilong Muslim long Indonesia i rausim kot salens

BIKNEM tisa bilong ol lotu Muslim insait long Indonesia ol i bin kalabusim em , Abu Bakar Bashir i bin rausim wanpela kot salens agensim jastis minista na wanpela kalabus sief.

Bashir i bin aplai long wanpela kot salens long las wik na em i bin kolim nem bilong Jastis na Humen Raitis Minista Hamid Awaluddin na Dedi Sutardi, hetman bilong Cipinang haus kalabus long Jakarta olsem defenden.

Mista Bashir nau i stap long kalapus insait long Cipinang haus kalabus wantaim ol sas bilong kamapim ol tingting nogut we em i kamapim ol bom pairap long Bali long mun October 2002.

Wanpela loya bilong Mista Bashir i tok - dispela tisa i skelim tingting long i noken i go het moa long dispela kot salens na em bai putim strongpela tingting nau long wanpela apil agensim kalabusim bilong en long Suprim Kot.

### Kilim bilong ol pipel i wok long i go het yet insait long sampela rijen

OL I painim bodi bilong wanpela lapun Buddhist man ol i katim nambaut na tromoi i stap insait long haus bilong en.

Police i tok kilim bilong narapela long kain pasin nogut olsem i namba tu taim nau long kamap insait long sampela wik tasol insait long despela region na ol i bilip despela lain i klim ol pipel long en i

mas i gat sampela samtintg long mekim wantaim ol trabel i wok long kamap long saut bilong kantri.

Ol ibin kilim idai moa long 700 pipol stat yet long mun Januari 2004 bihainim wanpela atek long wanpela ami bes i bin kamapim ol paitkros insait long tripela sauten provins bilong Thailand. Ol atoriti long hap i sutim tok long dispela ol trabel i go long wanpela Islamic separatis grup i rerem ol pasin nogut.

### Australia Katolik Sios askim Gavman long apim intanesenel helpim

KATOLIK Sios long Australia i mekim strongpela askim igo long Federal Gavman long dabolim International Aid bilong em bilong go kamap level wantaim mak bilong United Nations.

Wanpela pepa em Catholic Social Justice Council i bin askim long oli rereim i tok, Poverty na Hunger inap igo daun long haf, sapos pipal long politikis i soim laik na tingting bilong halivim.

Father Bruce Duncan husat ibin raitim dispela pepa i tok, ol laik pablis ibin kamap wantaim bihain long Indian Ocean Tsunami i soim stret tru olsem pablik i sapot lo ng oli apim mak bilong Aid.

Em i laikim Australia gavman i apim Aid long Zero point two five per cent bilong Gross national income igo long UN target oa mak bilong Zero point seven per cent.

### Western Turis Asosiasen i kisim provinsal gaman i go kot

WESTEN Tourism Association insait long Solomon Islands i kisim Western Province i go long kot bihain long ol ibin salim Kennedy Island insait long Gizo Lagoon.

Long yar igo pinis, caretaker premia blong Western Province, Clement Base ibin salim dispela ailan igo long spesol advaisa blongen Joseph Douglas.

Association i sutim tok olsem ol i no bin tok aut long prais blong dispela 'sale', i go long ol pipol na itok, ol ibin salim long liklik moni tru.

Em i tok ol gutpela diwai i karamapim ailan, wanpela long ol bikpela 'asset' blong Solomon Islands.

President John F Kennedy na kru blong en i bin suim i go long ailan bihain long wanpela wo-sip blong Japan ibin bamim long tupela hap insait long World War II.

TOKSAVE: YU KEN HARIM RADIO AUSTRALIA TOK INGLIS LONG 24 AUA 7 DE LONG WAN WIK.

# In the Loop

Hosted by: [illegible]

# 101.9FM

Port Moresby  
Daily 11.30am

**RAGBI LIG**

**SP Kap PNGRFL**

Sande Jun 19, 2005  
3:00 Cowboys vs Broncos- POM  
1:00 Gurais vs Lahanis- Goroka  
3:00 Mioks vs Muruks- Goroka  
3:00 Bulldogs vs Bombers- Lae

**POM SP Lig**

Sarere Jun 18, 2005

**PRL 1**  
09:00 DCA vs Dobo Warriors Res  
10:30 Tarangau vs Puma A  
12:00 DCA vs Dobo Warriors A  
1:30 Waliya vs Hawks A  
3:00 Brothers vs Royals A

**PRL 2**  
09:00 Tarangau vs Puma U17  
10:00 DCA vs Dobo Warriors U17  
11:00 Waliya vs Hawks U17  
12:00 DCA vs Dobo Warriors U19  
1:00 Waliya vs Hawks U19  
2:00 Waliya vs Hawks Res

**PRL 3**  
09:00 Brothers vs Royals U17  
10:00 Tarangau vs Puma U19  
11:00 Brothers vs Royals U19  
12:00 Tarangau vs Puma Res  
1:30 Brothers vs Royals Res

Sande 19-Jun, 2005

**PRL 1**  
09:30 Magani vs Kone Tigers A  
11:00 West vs Defence A  
12:30 Souths vs Paga Panthers A  
2:00 School Boys League Dev. Squad

**3:00 Monier Broncos vs Chemica Cowboys**

**PRL 2**  
09:00 West vs Defence U17  
10:00 Souths vs Paga Panthers U19  
11:00 West vs Defence U19  
12:00 Souths vs Paga Panthers Res  
1:30 West vs Defence Res

**PRL 3**  
09:00 Souths vs Paga Panthers U17  
10:00 Magani vs Kone Tigers U17  
11:00 Magani vs Kone Tigers U19

12:00 Magani vs Kone Tigers Res

**SOKA**

**EVEDAHANA SOKA ASOSIESEN**

Sarere Jun 18, 2005

**ESA 1**  
08:00 Texas vs Kepesen Imindos meri  
08:40 Sulu vs Finka Res  
09:20 Kepesen Imindos vs Brothers D2  
10:00 Notna vs AGM Roots D3  
10:40 D-Rats vs Gaidi Utd meri  
11:10 Wasu Crabs vs Nen Konok D3  
11:50 Names vs Texas D1  
12:40 Kilengs vs Gara Utd D1  
13:20 Raitopos vs Simbai Utd D2  
14:00 Liwale vs Gaidi Utd Res  
14:50 Nalas vs Graveside D1

**ESA 2**  
08:00 AGM Roots vs Nen Konok meri  
08:40 Gala Konok vs Namagawi Res  
09:20 Country Roots vs Notna D2  
10:00 Brothers vs TKSS D3  
10:40 BS Natives vs Natore Res  
11:10 Natore vs Graveside meri  
11:50 Wopa Utd vs Batisalem D3  
12:30 K-Top Mahnduz vs Sapphire D2  
13:10 Names vs Gee Neps Res  
13:50 Simbai Utd vs Gee Neps meri  
14:30 Junction vs Siale Res  
Ol dispela ol gem pinisim Gem # 4 ol pilai long Jun 13, 2005.

Sande Jun 19, 2005

**ESA 1**  
08:00 Raitopos vs Notna D3  
08:40 Nalas vs Texas Res  
09:20 Junction vs Gaidi Utd meri  
10:00 Sapphire vs K-Imindos D2  
10:40 Siale vs Names Res  
11:10 Nen Konok vs Kilengs meri  
11:50 Names vs Junction D1  
12:40 Natore vs BS Natives D1  
13:30 Texas vs Nalas D1  
14:20 Gaidi Utd vs Gala Konok D1  
15:50 Kilengs vs Namagawi D1  
16:30 BS Natives vs Graveside Res

**ESA 2**

08:00 Notna vs Graveside meri  
08:40 Simbai Utd vs Wopa Utd D3  
09:20 Gaidi Utd vs D-Rats Res  
10:00 Batisalem vs Brothers D2  
10:40 Sapphire vs Batisalem meri  
11:10 Country Roots vs Outsiders D3  
11:50 AGM Roots vs Notna D2  
12:30 Country Roots vs AGM Roots meri  
13:10 Liwale vs Nalas Res  
13:50 Brothers vs Wasu Crabs D3  
14:30 K-Top vs Nen Konok D2  
15:10 AGM Roots vs Sapphire D3

**PMSA SOKA**

Sarere Jun 18, 2005

**Bisini 1**  
08:00 University vs Souths Utd U21  
09:20 Orogen vs Tarangau D2  
10:30 Naniu vs Mungkas W1  
11:50 Mungkas vs Badili Utd D1  
13:10 LBC Defence vs Jaha W1  
14:20 WMI vs PNG Gardener WP  
16:00 PS Rutz vs Blue Kumuls Pre

**Bisini 2**  
08:00 Rapatona vs Mirel Momase P/Res  
09:20 PS Rutz vs Blue Kumuls U21  
10:30 Bavaroko vs Los Negros D1  
11:50 LBC Defence vs Sunset U21  
13:10 Sunset vs Los Negros W1  
14:20 Lamana GFN vs Guria WP  
16:00 Rapatona vs Mirel Momase Prem

**SJGS - Oval 1**  
08:00 UBOG vs Jaha D2  
10:30 University vs Souths Utd P/Res  
11:50 PS Rutz vs Blue Kumuls P/Res  
13:05 Guria vs Cellnet U21/2  
14:15 Sobou vs Badili Utd U21/2  
15:30 Maset vs Bomana PC D3  
16:45 LBC Defence vs Sunset P/Res

Sande 19 Jun, 2005

**Bisini 1**  
08:00 Cosmos vs Kurti Andra P/Res  
09:20 Rapatona vs Mirel Momase U21  
10:30 Telikom vs Cosmos WP  
11:50 Murat vs Cellnet D1

13:10 Souths Utd vs Sobou W1  
14:20 Guria vs Ela Utd D1  
16:00 Cosmos vs Kurti Andra Prem  
**Bisini 2**  
08:00 Cosmos vs Kurti Andra U21  
09:20 Tawala vs Mopi Soweto W1  
10:30 Rapatona vs Murat WP  
11:50 Manambu vs Pacifica D1  
13:10 University vs PS Rutz WP  
14:20 LBC Defence vs Sunset Prem  
16:00 University vs Souths

Sande 19 Jun, 2005

**Bisini 1**  
08:00 Cosmos vs Kurti Andra P/Res  
09:20 Rapatona vs Mirel Momase U21  
10:30 Telikom vs Cosmos WP  
11:50 Murat vs Cellnet D1  
13:10 Souths Utd vs Sobou W1  
14:20 Guria vs Ela Utd D1  
16:00 Cosmos vs Kurti Andra Prem

**Bisini 2**  
08:00 Cosmos vs Kurti Andra U21  
09:20 Tawala vs Mopi Soweto W1  
10:30 Rapatona vs Murat WP  
11:50 Manambu vs Pacifica D1  
13:10 University vs PS Rutz WP  
14:20 LBC Defence vs Sunset Prem  
16:00 University vs Souths Prem

**SJGS - Oval 1**  
08:00 Manambu vs POMBus Col U21/2  
09:20 Markham Yarang vs KG Utd D3  
10:30 Verave vs Tawala D2

**SJGS - Oval 2**  
08:00 PNG Gardener vs Tawala D2  
09:20 Orogen vs Tarangau D2  
10:30 Maset vs Bomana PC D3  
11:50 Nomads vs Sobou D3

13:05 Raitman vs KG Utd D3  
14:15 Yawata vs Mopi Soweto D3  
15:30 Moonbi vs Zombie D3  
16:45 Nomads vs Sobou D3

Pilai namel long wik

Mande 20 Jun

**Bisini 2**

16:30 Mungkas vs Los Negros

U21/2

Trinde 22 Jun  
Bisini 2  
16:30 Bavaroko vs Markham Y arangs U21/2

Bye: Lus Prutz (D2); Naniu (D1)

**BASKETBOL**

CBL

Sarere 18/06/05

Kot Wan

8:30 Birdwing vs Exodus U19B  
9:30 Birdwing vs Exodus U19G  
10:30 Birdwing vs Exodus RW  
12:00 Birdwing vs Exodus RM  
1:30 Birdwing vs Exodus AW  
3:00 Birdwing vs Exodus AM

Kot Tu

8:30 Souths vs Muruks U19B  
9:30 Souths vs Muruks U19G  
10:30 Souths vs Muruks RW  
12:00 Souths vs Muruks RM  
1:30 Souths vs Muruks AW  
3:00 Souths vs Muruks AM

Sande 19/06/05

Kot Wan


8:30 Tamaraws vs Titans U19B  
9:30 Tamaraws vs Titans U19G  
10:30 Tamaraws vs Titans RW  
12:00 Tamaraws vs Titans RM  
1:30 Tamaraws vs Titans AW  
3:30 Tamaraws vs Titans AM

Kot Tu


8:30 Chariots vs Saints U19B  
9:30 Chariots vs Saints U19G  
10:30 Chariots vs Saints RW  
12:00 Chariots vs Saints RM  
1:30 Chariots vs Saints AW  
3:00 Chariots vs Saints AM

**Toksava**

Sapos yu laik putim spot dro bilong yu long *Wantok Niuspepa* orait salim i kam long feks namba 325 2579, email word@global.net.pg o ringim Wantok Spot Des telepon namba 325 2500.



• 100m meri Fristail long PNG Dolphins Sprins long Sir Donald Cleland pul las wiken. Foto: PNGSI



Tahira Mulas 1, Esther Sural 2 na Jill Kolta 3 long 100m sprin. Foto: PNGSI

**Mista PNG**

**Andrew Molen i raitim**

MASOL tasol i toktok.

2005 Trukai Mr PNG taitol is tap nau long han bilong David Mugarenang bilong Lae husait i winim long nesanol sempionsip long Porgera.

Mugarenang i bin pilai dispela gem i nap 11pela yia nau na e mi gat plant iekspiriens long soim ol masol bilong em.

Tupela bodi bilda bilong Pot Mosbi AleYegiura na Raphael Yokefa i kism seken na ted rana-ap. Dispela sempiosip i kamap las wik Sarere we i lukim ol bodi bilda i kam long Pot Mosbi, Lae, Goroka na Porgera long soim masol bilong ol.

Papua Niugini bodi bilding federesen i tokaut nau long tim bilong ol we bai i go

long saut pasifik sempionsip bilong ol long 21-23 oktoba dispela yia.


Tim e mi stap olsem; Hoxy (Goroka), Mugarenang (Lae), Ale Yegiura (POM), Lucas Wemin (POM), Raphael Yokefa (POM), Michael Siwi na 90kg sempion - Donald Kaiwi na tim mensa em Simon Lumbiridi (Porgera).

Vais presiden bilong federesen Ronald Haihavu it ok Kaiwi husait i saut pasifik sempion bilong anda-90kg divisen bai i lukluk nau long difenim taitol bilong em we e mi kism long 2003 saut pasifik gems long Suva, Fiji.

Haihavu i singaut tu long ol bodi bilda long ol i mas redim K2 500 levi fi bilong ol bipo long pinis bilong Septemba.




• Pot Mosbi bes bodibildas husait i bin kamap long MR PNG resis. Foto: PAUL ZUVANI




1



2



3



4



5



6

**Poto kepsen**

1. Saints pilaia (lep han) i pulim bal wantaim Exodus pilaia long nesanel basketbol klab sempionsip long Kwins Bette wiken long Hohola Kot. Saints win 58-47.

2. Babaka gol kipa Gure Gabina i kalap na kisim bal long Mosbi Wan pilaia long Sauten rijinol soka tonamen long Bisini. Mosbi win 1-0 long ekstra taim.

3. Jnr Hendry bilong Hot Power i kalap na holim bal bipo long ol Crows i kisim long Pot Mosbi osi rul pilai long Colts oval.


4. Australia Boksing tim we i kam long Osenia Boksing Sempionsip long Pot Mosbi.

5. Klia... Yuni Bulldogs senta Lawrence Posu i pusim Defence pilaia long givim wei long em long ron long POM ragbi yunion pilai. Uni win 38-7.

6. Maupa KV na Kaparoko pilaia i traime strong long Sentrol netbol sempionsip. Oi poto: ANDREW MOLEN/NICKY BERNARD.



# NRL NIUS



• Lukluk bilong Ben Kennedy tasol long ragbi lig i ken pretim ol birua pilaia bilong em. Tasol wanpela samting tasol we i pretim NRL tim bilong em Newcastle Knights em long kisim nil long dispela sisen. Nau long dispela taim ol Knights i ron baksait tru bihain long ol i no winim wanpela pilai bilong ol. Tasol dispela i no mekim Kennedy i wari long bungim ol Manly Sea Eagles long pilai bilong ol long Brookvale Ovel long dispela Sande. "Tru tumas mi no ting Newcastle bai mas kisim jiro," Kennedy i tok.



Australia Tes prop na Bulldogs pilaia Mark O'Meley i tok em i gat bilip long tim bilong em maski ol i stap yet daunbilo long NRL kompetisen. Em i wanpela ol Bulldog pilaia husat i kisim bikpela malolo bihain long em i kisim bagarap.

Long dispela Sande ol Bulldog bai pilai wantaim Canberra Raiders long Sidni Sow Graun. Tasol kam bek bilong em i strongim tim nau long dispela taim ol Dog i winim tasol foapela long ol 12-pela pilai bilong ol.

## Raun 15

Fraide, Jun 17 -  
Roosters vs Sharks. Yu ken lukim long EMTV long 8.30 long nait.






Sarere, Jun 18 -  
West Tigers vs Broncos  
Warriors vs Eels  
Storms vs Panthers


Sande, Jun 19 -  
Dragons vs Rabbitohs. Yu ken lukim dispela long EM TV long 4:00-6:00 avinun.




Bulldogs vs Raiders  
Sea Eagles vs Knights  
Bai: Panthers, Roosters, Bulldogs



• ...Bai yu go we? Ol Maroons i holim pas Blues fulbek Anthony Minichello bipo long em i go em i ronawe long ol. Minichello i hatpela pilaia na dispela i mekim em i sevim planti trai bilong ol Blues. Tasol yumi lukluk long namba tri pilai sapos em i ken mekim olsem.



• Blues lok Ben Kennedy i laik abrusim takol bilong Maroons winga Matt Sing. Gutpela tasol i luk olsem Sing i hukim nek pinis.

### NRL Poin Lata

Klab	P	W	D	L	B	P/D	Pts
1 Broncos	13	11	0	2	1	127	24
2 Eels	13	9	0	4	1	75	20
3 Sea Eagles	13	9	0	4	1	29	20
4 Cowboys	13	8	0	5	1	62	18
5 Sharks	13	8	0	5	1	2	18
6 Storm	13	7	0	6	1	127	16
7 Dragons	14	8	0	6	0	36	16
8 Roosters	12	6	0	6	2	23	16
9 Raiders	12	6	0	6	2	-26	16
10 Warriors	13	6	0	7	1	33	14
11 Wests Tigers	13	6	0	7	1	-30	14
12 Bulldogs	12	4	1	7	2	-45	13
13 Panthers	13	4	0	9	1	-34	10
14 Rabbitohs	13	3	1	9	1	129	9
15 Knights	12	0	0	12	2	-25	0


\* P: Pilai, W: Win, D: Dro, L: Lus, B: Bye, P/D: Poin Diferens, PTS: Poin

### Top 10 poin skora

Pilaia	Tim	Poin
1. Hazen El Masri	Bulldogs	132
2. Luke Covell	Sharks	120
3. Michael Witt	Sea Eagles	114
4. Brett Hodgson	Sharks	110
5. Luke Burt	Eels	98
6. Preston Campbell	Rabbitohs	92
7. Darren Lockyer	Broncos	91
8. Matt Orford	Storms	84
9. Clinton Schifcofske	Raiders	82
10. Josh Hannay	Cowboys	78




• Taim bilong amamas... Ol Maroons i amamas bihain long ol i putim trai. Ol i laik soim olsem ol i stap king bilong Orijin pilai. Tasol yumi lukluk long wanem samting bai kamap long laspela pilai long Brisbane, Julai 6.



• I luk olsem ol kirap tasol long silip. Sampela pilaia bilong Blues tim. Ol i kisim dispela poto bipo long ol i go insait long pilai.



• Niu Saut Wels Blues kosa Ricky Stuart i no amamas long wei referi i mekim disison.



# SP Kap kamap hot

## ...Broncos, Bulldogs na Mioks i go pas

James Kila i raitim

COCA Cola Goroka Lahanis husat las wiken i soim stret pawa bilong ol egens Brian Bell Bulldogs bilong Mosbi i redi gut tru nau long skelim strong bilong Agmark Rabaul Guria taim tupela tim i bung insait long namba seven raun bilong SP Inta-siti gems long Sir Danny Leahy pilai graun long Goroka.

Dispela em wanpela bilong tupela gem we bai kamap long Sir Danny Leahy Oval long Goroka. Narapela gem bai lukim Mabey & Johnson Mendi Muruks i train bun wantaim Toyota Enga Mioks.

Lahanis i redi long putim kamap gutpela gem egens ol Rabaul Guria long asples bilong ol bikos ol i laik soim ol sapotas bilong ol long Goroka olsem ol i redi long winim gem na mekim ol sapotas i amamas. Las wiken ol i soim pinis kala na stail bilong ol long Mosbi na nau ol i redi tasol long kilim indai paia bilong ol boi bilong Rabaul Guria.

Ol fowat bilong Lahanis husat bai strongim tim long winim dispela gems egens Guria em tupela strongpela fowat em tupela brata Wayne na Timothy "Mausgras" Warigiso. Dispela tupela brata i strongim tru fowat lain bilong Lahanis las wik egens Bulldogs na ol bai soim gen dispela wiken wantaim sapot i kam long kepten yet Nigel Hukula, Sigfred Gande, huka Martin Wilson, ol winger olsem Alphonse na Jeffrey Bai.

Long hapbek yangpela boi bilong Masi viles Walter Hasu bai kontrolim wantaim sapot i kam long faivet Mack Siwi. Long lok posisen em yangpela Adam Billy bai lukautim.

Kosa bilong Lahanis Leva Tete i luksave pinis long wanem eria em tim bilong em i mas strongim na ol bai train strong long banisim ol lain bilong Rabaul Guria long go putim trai.

Insait long narapela gem we bai kamap long Goroka bai lukim ol boi Mabey &

Johnson Mendi Muruks i skelim strong bilong ol egens Toyota Enga Mioks.

Gem long Mosbi bai lukim Chemica Mt Hagen Cowboys i train strong egens Monier Broncos na long Lae bai lukim gem namel long LBC Lae Bombers wantaim Brian Bell Bulldogs.

Dispela gem long Goroka namel long Mendi Muruks na ol lain brata bilong Enga Mioks bai strong tru bikos tupela tim wantaim i laik winim gem na putim poin long lada bilong kompetisen.

Las wiken ol boi Mendi Muruks i soim stret kala bilong ol taim ol i winim Agmark Rabaul Guria 8-6 na bai redi tasol long soim wankain gem plen long daunim ol boi bilong Enga.

Kosa bilong Mendi Muruks Anton Mal i mas kamap wantaim wanpela gutpela gem-plen we i ken redim gut ol boi bilong em long winim dispela gem egensim Enga Mioks.

Ol Mioks tu i paia gut tru insait long kompetisen na wantaim gutpela sapot ol i save kisim long Gavana bilong ol Peter Ipatas, ol bai kamapim gutpela gem long amamasim spona bilong ol na ol sapota long Enga provins.

Mioks i gat ol stail pilai olsem hapbek Nathan Anjo husat i save ridim gut gem na i ken kamapim spes long ol bois bilong em long putim trai.

Dispela gem long Mosbi bai i lukim ol lain Monier Broncos i winim Chemica Mt Hagen Cowboys, tasol wanpela samting we i ken tanim plet em ol boi Kange i gat bikpela ol fowat husat i ken ron na brukim difens i stap long givim pawa long tim bilong ol.

Broncos tu i gat ol gutpela pilaia husat i save gut long presa futbol olsem senta Eki Ene, Edea Morea na ol bikpela fowat bilong ol olsem Paulus Mondo.

Insait long dispela gem long Lae bai lukim LBC Lae Bombers i bomim ol boi bilong Brian Bell Bulldogs bilong Mosbi.

Ol boi bilong Wopa kantri las wiken i bin

dro wantaim brata tim bilong Mosbi yet 14-14 na nau ol i redi tasol long bagarapim sindaun bilong ol mangi Mosbi Brian Bell Bulldogs.

Tasol Bombers i mas was gut long ol pilaias bilong Bulldogs olsem kepten na hapbek Stanley Hondina, faivet Charle Wabo na ol bikpela fowat olsem Joe Sipa, Joseph Omai na ol winga olsem Emmanuel Palme na huka Andrew Andiki.

Ol boi bilong LBC Bombers tu i stap long sakim pawa bilong Bulldogs em ol lain olsem bikpela fowat na seken rowa Andrew Kami, Taitus Maima na hapbek Nime Kapo long kontrolim gem long daunim ol boi bilong Bulldogs.

Bombers bai pilai long asples bilong ol na dispela bai helpim ol gut long pilai strong long winim dispela gem long dispela wiken.

Kosa bilong LBC Lae Bombers, Joe Katsir em wanpela foma Kumul na em save gut long presa futbol na bai putim kamap wanpela sait bilong em long daunim strong bilong ol boi bilong Brian Bell Bulldogs.

Dispela ol gems bilong SP Inta-siti Kap long dispela wiken em wanpela bikpela gem long olgeta tim long redim ol yet long stap strong insait long kompetisen.

Bihain long raun 6 bilong kompetisen las wiken ol tim i go pas em Monier Broncos, Brian Bell Bulldogs na Enga Mioks i go pas long 8 poin, Agmark Rabaul Guria na Lae Bombers long 7 poin, Goroka Lahanis long 6 poin, Chemica Cowboys long 4 poin na Mendi Muruks long 2 poin.

Sapos Enga Mioks i winim dispela gem bilong em long Sande em bai suruk i go antap long poin lada na tu sapos Broncos i win ol bai go antap na holim nambawan ples.

Olgeta tim i gat sans yet long kompetisen bikos 8-pela moa gems i stap bipo long fainol i kamap stat long mun Ogas 14.

## Yangpela Hasu soim tru kala

SAPOS yu lukim gut dispela yangpela man bai yu ting olsem bagaros ya i no save pilai ragbi. Em i nogat bikpela skin tumas, tasol save bilong em i moa moa yet long ragbi lig.

Givim tasol ragbi bal na em bai soim yu stret stail bilong kikim na tromoi bal olsem tupido.

Yes, dispela yangpela man em hapbek bilong Coca Cola Goroka Lahanis husat las wik i bin kikim wanpela fil gol long helpim tim bilong em long rausim trausis bilong biknem tim bilong Mosbi Brian Bell Bulldogs 17-12.

Walter Hasu em bilong liklik ples Masi klostu long Goroka. Em i save pilai gut tru long op-sisen kompetisen bilong Gahuku Lig long Goroka na kan stail bilong em long pilai long viles kompetisen em smat tru.

Las wiken em i pilai strong tru long atek na difens bilong em. Em i resis wantaim ol bikpela man olsem Stanley Hondina bilong Bulldogs tasol em i no wari. Hasu i pilai normal gem bilong em na givim het-pen stret long ol boi bilong Bulldogs.

Dispela fil-gol Hasu i bin kikim long las wiken long Mosbi em nambawan taim tru em i kikim long kain bikpela ples olsem Lloyd Robson oval long Mosbi, ples we planti ol intanesinol gems i save kamap. Ating dispela bai pas strong tru long lewa bilong dispela yangpela resa mangi bilong Masi viles.

Ol narapela pilaias bilong Lahanis husat i soim trupela gem stret las wiken em Wayne Warigiso na stail mangi long wing em Alphonse Tela.

Dispela kain strongpela ron na spit bilong Alphonse i mekim ol biknem pilaia bilong Bulldogs olsem Stanley Hondina i mas wari tru bikos Hondina i bihainim em long takolim em tasol Alphonse i trikim em na slip pinis antap long trailain.

Planti ol Goroka Lahanis sapotas i amamas tru long dispela win bilong tim bilong ol na i redi long sapotim ol gem dispela wiken taim ol i bungim Agmark Rabaul Guria long Mosbi.

Las wiken gem i soim tru-pela kala bilong Coca Cola Goroka Lahanis. Ol pilaias bilong ol i pilai strong tru na daunim stret win bilong ol lain Brian Bell Bulldogs, maski olsem ol i gat ol PNG Kumuls pilaias.

Narapela bikpela guria tru i bin kamap las wiken taim ol boi bilong Mabey & Johnson Mendi Muruks i kilim indai paia bilong ol lain Agmark Rabaul Guria na winim ol 8-6. Dispela win bilong Mendi Muruks i brukim kiau long wokabaut bilong ol insait long kompetisen. Kepten bilong Muruks Cedrik Kengi i bin soim tru strong bilong em olsem lida insait long dispela gem na bringim ol lain bilong em long daunim ol boi bilong Is Nu Briten.

## Eksen poto namel long Brian Bell Bulldogs na Coca-Cola Lahanis

Ol poto: NICKY







# WANTOK SPOTS



## NSW Blues kik bek

PURIPURI bilong Andrew Johns long kikim ol gutpela bal na pasim gutpela ol bal i lukim ol Nius Saut Wels Blues i kikim bek Kwinslen Maroons 32-22 long namba tu Stet ov Orijin pilai long Telstra Stedum long Sidni bipo long 82,000 manmeri long nait.

Na gen moa ol manmeri long Australia na PNG na ol narapela hap bilong graun i lukim tu dispela pilai long television.

Long stat ol Blues i go insait long pilai wantaim planti tingting- lus i min olsem ol i lus olgeta. Maski long namba tri pilai! Na tru tumas wari i pulap long bel bilong ol taim ol i krungutim pilai graun.

Long fes 15 minit dispela i soim stret we ol Blues i mekimsave gut long ol manki Maroons.

Tasol long narapela sait ol Maroons olsem ol lukluk i bin stap long en ol i no wari. Ol i save olsem win i stap pinis long sait bilong ol. Sapos ol i lus ol i no lus olgeta, i gat namba tri pilai i stap.

Na kain tingting i mekim ol olsem na ol i no pilai hat olsem ol i mas pilai long em.

Tasol sampela kain laki pilai i mekim ol i bin go pas long hap taim 12-8.

Tasol ol i no bin tingting tumas long skruim yet dispela ron bilong pilai. Nogat.

Long lukluk long pilai stret Blues i skoa long 15 minit taim fulbek Anthony Minichello i bihainim gut kik bilong hap bek Andrew Johns we Johns i kikim bal i go long fran we bal i pas long gol pos na bauns bek we i paulim Maroons fulbek Billy Slater na winga Matt Sing we Minichello i ron i go kisim bal na skoa. Craig Fitzgibbon i konvet na Blues i go pas 6-0.

Bihain long dispela Fitzgibbon i kikim tupela moa poin bihain long asua bilong Kwinslen na hapim poin i to long 8-0.

Tasol wanem samting em Johns bilong Blues i mekim Darren Lockyer bilong Maroons i ken mekim. Dispela i lukim Lockyer i mekim wanpela bom we Brad Thorn i yusim save bilong ragbi yunion long hukim bal olsem em i save kisim long lain aut na skoa klostu long pos.

Huka Cameron Smith i konvet long em na Maroons i bihainim tasol Blues long 6-8 long 23 minit. Long dispela taim ol manmeri i tingting planti yet olsem husat tru bai skoa.



• NSW Blues fulbek Anthony Minichello i amamas long kepten Danny Buderus bihain long em i skoa. Blues win 32-22. Lukim NRL stori long pes 29

wanpela kona bilong pilai graun na go long narapela hap. Smith i no inap konvet na olsem skoa i sanap 12-8 long sait bilong Kwinslen. Skoa i stap olsem yet na tupela tim i go aut long hap taim malolo.

Long namba tu hap tupela hap wantaim i kisim strongpela toktok long ol kosa bilong ol na ol i laik mekim samting stret.

Tasol i luk olsem ol Blues i mekim samting stret taim Johns i kikim wanpela bal we Minichello i ron i go na kisim bal long skoaim namba tu trai bilong em long 43 minit.

Fitzgibbon i konvet na dispela i lukim ol Blues i go pas 14-12. Pilai i go moa yet na long foapela minit bihain Steve Menzies i putim narapela Blues trai we Johns i konvet na dispela i lukim skoa i go antap 20-12. Long 59 minit Matt Cooper i skoa na wantaim konvesen skoa i go antap 26-12.

Tasol Maroons i kam bek strong long 71 minit we i lukim fes Orijin golden boi bilong Maroons Matt Bowen i skoa i na kisim skoa bilong ol i go antap long 16-26.

Faipela minit bihain na Blues kepten Danny Buderus i skoa na wantaim konvesen i kisim skoa i go antap long 32-16.

Laspela trai bilong ol Maroons i kam long prop Petero Civonцева husat i skoa aninit long pos na wantaim konvesen bilong Smith i kisim skoa i go antap long 32-22 long fultaim.

Laspela Stet ov Orijin pilai bai kamap long Lang Pak, Brisbane long Julai 6.



• Kosa Ricky Stuart na Andrew John amamas na krai.

• pes 30  
Lukim ol stori

Long Stedum em ol sapota bilong Blues. Tasol ausait mipela i no save. Singaut i sta yet ina long 31 minit we Maroons fulbek Billy Slater i ron olsem klostu 90 mita, klostu long

**Brian Bell** & Co. Limited

Shop with a friend

**B June**

SPORTING GOODS, GLASSWARE,  
CUTLERY, GIFTWARE, AUDIO VISUAL,  
SMALL APPLIANCES, MAJOR APPLIANCES,  
TOYS AND MUCH MORE!

HUNDREDS  
OF LINES  
REDUCED!

# CLEARANCES SALE

Port Moresby 325 5411 Lae 472 3200 Tootown 479 1918 Madang 852 1899 Goroka 732 1622 Mt Hagen 542 1999 Kokopo 982 9027



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.